

## ኢያሱ ማጽፋ ጊደ ቆፋ

ኢያሱ ማጽፋይ ኢስራኤል አሳይ ሙሴ ሶሆን ጊዲ ደሬቲዳ ኢያሱይ ካለፈን ካናኔ ኢዚ ዋሰቲ ኦሊ ኦይኪዳኮ የቲዛ ታሪኬ። ሃ ማጽፋዛን ጸፊቲዳ ጊታ ታሪኬታ ጊደፌ ዋናቲ፣ ዮርዳኖሴ ሻፋ ፒኔል፣ ኢያርኮ ገምቤዛ ላሌቱል፣ አዬ ጌቲቲዛ ካታማን ዴንዲዳ ኦላኔ ዴሬዚ ጸሳራ ጫቄቲዳ ጫቆዛ ኦራጺሶ ጊሻሰ የቲቲሰ። ማጽፋዛ ጋርሳን ኬሂ ኤሬቲዳይታፔ ኢሶይ፣ «ኢንቲ ጎይናና ኮዪዳይሳ ሃች ደሪቲ፣ ታኒኔ ታሶ አሳይ ጊዲኮ ጸሳሰ ጎይናና» ጊዛይታ (24:15)።

### ሃ ማጽፋይ ኦይኪዳ ኩሜሳ ቆፋ

ካናኔ ጸኔቱል 1:1—12:24

ጋዴ ጊሼቱል 13:1—21:45

ዮርዳኖሴፔ ሄ ፒንላን ኣርሼይ ሞኪዛሶ ባጋራ ዲዛ ጋዴ 13:1-33

ዮርዳኖሴፔ ሄ ፒንላን ኣርሼይ ዉሊዛ ባጋራ ዲዛ ጋዴ 14:1—19:51

ኢስታን ባቃቲ አቲዛ ካታማታ 20:1-9

ሌዌታሰ ኢሜቲዳ ካታማታ 21:1-45

ኣርሼይ ሞኪዛ ባጋፌ ዪዳ ቆሞቲ ባ ዴሬ ሲሞ 22:1-34

ኢያሱይ ዉርሴላን ጊዳ ቃላ 23:1-16

ሴኬሜን ጫቆ ቃላ ኦራጺሶ 24:1-33

### ጎዳይ ኢያሱ ኣዛዚዳ ኣዛዘ

<sup>1</sup> ጎዳ ኣይሌ ሙሴይ ሃይቂዳፔ ጉዬ ጎዳይ ሙሴ ማዲዛ ናዌ ና ኢያሱሰ።

<sup>2</sup> «ሄኮ ታ ኣይሌ ሙሴይ ሃይቂዳሰ፤ ሃኢ ኔኒኔ ሃይሲ ዴሬዚ ዴንዲቲ፣ ታኒ ካሴ ኢስራኤል አሳሰ ኢማና ጊዳ ቢታ ጌላናሰ ዮርዳኖሴ ሻፋ ፒኒቲ።

<sup>3</sup> ታኒ ካሴ ሙሴሰ ኢሚዳ ሂዶታ ማላ ኢንቲ ቶሆይ ዬጳዛ ቢታ ኡባ ታ ኢንቲሰ ኢማና።

<sup>4</sup> ኢንቲ ቢታ ዛዋይ ባዞፌ ዶሚዲ ሊባኖሴ፣ ዋጋ ሻፋ ኤፊራጺሴፔ ቢዲ ሂቲ ዴሬ ኡባ ኦይኪዲ ኣርሼይ ዉሊዛ ባጋራ ቢዲ ዋጋ አባ ጋካናሳ።

5 ኔኒ ዲዛ ዋዴ ኡባን ኔናራ ኦኒካ ኤቁታና ዳንዳዬና፤ ታኒ ካሴ ሙሴራ ጊዲዳ ማላ ኔናራካ ጊዳና፤ ሙሌካ ታ ኔና ዩጊኬኔ ኣጊኬ።

6 «ሚና! ጸላ ጊዳ፤ ታኒ ካሴ ኢስታ ኣዋታስ ኢማና ጋዳ ጫቂዳ ቢታ ሃ ዴሬዛ ካሌፋዳ ላቲሳናይ ኔና ጊዲዳ ጊሻስ ሚና።

7 ኣይኮይ ባ፤ ኔኒ ሚኖ ጸላ ሚና፤ ታ ኣይሌ ሙሴይ ኔስ ኢሚዳ ዋጋዛ ኡባ ሎኤፋ ኣዛዜታ፤ ኔ ቢዳሶ ኡባን ጊጋ ጊዳና ማላ ሃዲርስ ኡሻቕ ጎፓ።

8 ሃይሲ ዋጋ ማጽፋይ ኔ ደናፔ ሻኬቶፎ፤ ኢዛ ጊዶን ዲዛይሳ ኔ ሎኤፋ ናጌታዳ ፖላና ማላ ጋላስ ጊዲን ኦማርስ ዛራ ዛራ ቆፓ፤ ኔ ሄሳሶ ኦሊኮ ኔ ቆፒዳ ኡባይ ኔስ ሱራናኔ ሃናና።

9 ኔኒ ቢዛሶን ኡባን ጎዳ ኔ ጸሳይ ኔናራ ዲዛ ጊሻስ ኣይኮይ ባ፤ ሚና፤ ያዮፋ፤ ዳጋሞፋ ጋዳ ታ ኔና ኣዛዛቤኪና!» ጊዴስ።

10 ሄሳፌ ካሊዲ ኢያሶይ ኢሰራኤሌ ኣሳ፡

11 «ኢንቴ ጌዴ ኣሳይ ዲዛሶ ቢዲ፤ ሳኒቴ ሄዡ፡ ጋላሳፌ ጉዬ ካሴ ጎዳ ኢንቴ ጸሳይ ኢንቴና ላቲሳናስ ኢንቴስ ኢሚዛ ቢታዮ ላታናስ ዮርዳኖሴ ፒናና ጊሻስ ኢንቴስ ሸንቄ ጊግሲቴ» ጊ ዮቴቴ» ጊ ኣዛዚዴስ።

12 ኢያሶይ ኦርቤሌ ቆሞታስ፤ ጋዴ ቆሞታስ፤ ሄሳሶካ ሚናሴ ቆሞታፔ ባጋይታስ፡

13 «ጎዳ ኣይሌ ሙሴይ፤ ሳኒቴ ኢንቴ ጸሳይ ኢንቴና ሸምፒሳና፤ ሃኖ ቢታዮካ ኢዚ ኢንቴስ ኢማና» ጊ ኢሚዳ ኣዛዛዛ ኣኬኪቴ።

14 ኢንቴ ማቹቴ፤ ኢንቴ ናይቴኔ ኢንቴ ሜሄቴካ ካሴ ሙሴይ ኢንቴስ ዮርዳኖሴ ሻፋፔ ሄ ፒንፋን ኢሚዳሶን ሄን ዲሼቶ፤ ጊዶ ኣቲን ኢንቴ ኦላ ኣሳይ ኡባይ ኩሜሶ ኦላ ሚሻራ ኢንቴ ባጋታ ኢሰራኤሌ ኣሳ ማዳናስ ካሴቴዲ ዮርዳኖሴ ፒኔቶ፤ ኢንቴካ ኢንቴ ኢሻታራ ኢሲፌ ኦላስ ኬዚቴ።

15 ሄሲካ ጎዳይ ኢስታ ሸምፒሳና ጋካናሴ ኢንቴስ ኢዚ ኦሳይሳሶ ኢስቲካ ጎዳ ኢንቴ ጸሳይ ኢስታስ ኢሚዳ ቢታ ጋኪ ላታና ጋካናሳ፤ ሄሳፌ ጉዬ ኢንቴ ሰሚ ዪዲ ኣርሼይ ሞኪዛ ባጋራ ዮርዳኖሴ ሻፋፔ ሄ ፒንፋን ጎዳ ኣይሌ ሙሴይ ኢንቴስ ኢሚዳ ቢታ ኢንቴ ላታና» ጊዴስ።

16 ኢስቲካ ኢያሶስ፡ «ኔኒ ኦስ ዮቶይሳ ኦኒ ኡባ ፖላና፤ ኔ ኪቲዛሶ ኣዋካ ባና።

17 ኑኒ ሙሴስ ኡባ ዋዴ አዛዜቲዳ ማላ ኔስካ አዛዜታና፤ ጎዳ ኔ ጸሳይ ካሴ ሙሴራ ጊዲዳ ማላ ኔናራካ ኢዚ ጊዶ! 18 ኔናራ ኤቁቲዛዴይኔ ኔስ አዛዜቶንታዴ ኡባይ ሃይቆ፤ ኔ ሚና፤ አይኮይ ባ፥ ኔ ሚኖ ሚና» ጊዳ።

## 2

### ኢያሶይ ከቲዳ ዋቹ አሳታ

1 ናቄ ና ኢያሶይ ቢታ ዋቹዛ ናምኡ አሳታ ሺጺሜ ጌቲቲዛሶፔ ቆታን ከቲዴስ፤ ከቲሼ ኢስታስ፥ «ቢቴ፤ ቢዲ ቢታ ዋቹቴ፤ ሃራፔካ ኢያርኮ ካታማ ዲማሲ ዋቹቴ» ጊዴስ።

ሂስቲን ኢስቲ ቢዲ ኤራኣቦ ጌቲቲዛ ላይማ ማጫሳይ ሶ ጌሊዲ አቂዳ።

2 ሂስቲን ኢያርኮ ካዎይ፥ «ኢስራኤሌ አሳፔ ከቲቲዳይቲ ሃ ቢታ ዋቻናስ ኦማርስ ዪዳ» ጊዛ ዮኦ ሲዪዴስ።

3 ኢያርኮ ካዎይ ኤራኣቢኮ፥ «ኔ ሶ ዪ ጌሊዳ አሳታ ኬሳ አማ። አይስ ጊኮ ኢስቲ ቢታ ኡባ ዋቻናስ ዪዳ» ጊዛ ኪታ ዬዲዴስ።

4 ጊዶ አቲን ሚሺሬያ ሄ ናምኡ አሳታ ቆታ ዋላዳ፥ «ኤ አሳቲ ታኮ ዪዳኮሺን ኢስቲ አዋፔ ዪዳኮ ታ ኤሪቤኬ።

5 ኦማርስ ካታማ ፔንጌ ጎርዳና ጊዛ ዋዴ ኢስቲ ኬዚ ቢዳ፤ ኢስቲ አዋ ቢዳኮ ታ ኤሪቤ፤ ኤሶቲዲ ካሊዛ ጊዲኮ ኢንቴ ኢስታ ኦይካና» ጋዲስ።

6 ጊዶ አቲን ኤራኣባ አሳታ ፖቄ ማላ ኦሴቲዳሶ ኬሳዳ ሚጩቲዳ ታልባ ቡጸ ጊዶን ኢስታ ቆታ ዋላዲስ።

7 አሳቲ ጸሞሲዛይታ ኮያናስ ኬዚዲ ዮርዳኖሴ ሻፋ ፒንል ኤፊዛ ኦጌ ኦይኪዲ ቢዳ፤ ኮይዛይቲ ካታማፔ ኬዚዳ ማላ ካታማ ፔንጌይ ጎርዴቲዴስ።

8 ዋቹዛይቲ ጴስካናፔ ካሴታዳ ኢዛ ኢስታኮ ፑዴ ኬዛዳ ኢስታስ፥

9 «ጎዳይ ሃ ቢታ ኢንቴስ አሚዳይሳ፥ ኢንቴስ ያሻቲል ኑናን ኩሚዳይሳኔ ሃ ቢታን ዴኢዛ አሳ ዋዚናይ ኢንቴስ ሂርጋን ሴሪዳይሳ ታ ኤራይስ።

10 ጊብጼ ቢታፊ ኢንቴ ኬዚዳ ዋዴ ኢንቴ ሲንፋን ዞኦ አባ ጎዳይ ዋስቲ ሜሊሲዳኮ ኑኒ ሲዪዶስ፤ ቃሴ ዮርዳኖሴ ሻፋፔ ኣርሼ ኬሳሶ ባጋራ ዲዛ ኣሞሬ ቢታ ካዎታ ናምኣታ፥ ሲሆኔኔ ኣጌ ኢንቴ ዋስቲ ኡባ ጴይሲዳኮ ኑ ሲዪዶስ።

11 ኑ ሄሳ ሲዬዳ ማላ ኑ ዋዚናይ ሴሪዳሰ፤ ኢንቴስ ያሻቴላፌ ዴንዲዳይሳን ሺርቶንታ ኣሲ ዴና፤ ጎዳ ኢንቴ ጸሳይ ቦላ ሳሎንካ ጋርሳ ቢታንካ ኢዚ ጸሳ።

12 ሄሳ ጊሻስ ታኒ ኢንቴስ ኪዬዳ ማላ ኢንቴካ ታ ኣዋ ኬላ ኣሳስ ኪያና ማላ ታስ ጎዳን ጫቂቴ፤ ሄሳስካ ኣማንፊዛ ማላታ ታስ ኢሚቴ።

13 ታ ኣዋኔ ታ ኣዪዮ፡ ታ ኢሻታኔ ታ ሚቹታ ኢስታስ ሸምፖራ ዲዛ ኡባ ዋጵፒቴ፤ ኑና ሃይቆፔ ኣሺቴ» ጋዱሰ።

14 ሄ ኣሳቲ፡ «ኑ ኔስ ጫቂዳ ቃላ ማላ ፖሎንታ ኣጊኮ ጸሲ ኑና ዋጵ! ኑ ኦሊዳይሳ ኔ ኦናስካ ዮቶንታ ኣጊኮ፡ ጎዳይ ሃና ቢታዮ ኑስ ኢሚዛ ዋዴ ኑ ኔስ ሎኦ ኦላና ማላ ጫቆስ» ጊዳ።

15 ኤራኣባ ዲዛ ኬላይ ካታማ ዲርሳራ ኦይኬቲ ኬጾቲ ኡቲዳ ጊሻስ ኣሳታ ዋዶሮን ቃቻዳ ማስኮቴራ ዲጌ ዋላዱሰ።

16 ኤራኣባ ኢስታስ፡ «ኢንቴና ኮይዛይቲ ዴሞንታ ማላ ፑዴ ዙምቡላታ ቦላ ኬዚዲ ሄን ሄሹ ጋላስ ቆቴቲቴ፤ ሄሳፌ ጉዬ ኢንቴ ባናሶ ቢቴ» ጋዱሰ።

17-18 ኣሳቲካ ኢዚሰ፡ «ኑኒ ኔ ቢታ ጌሊዛ ዋዴ ሃ ዘኦ ዋዶሮዛ ኔኒ ኑና ኬሲዳ ማስኮቴ ቦላ ቃቻንታ ኣጊኮ ኔ ኣዋ፡ ኔ ኣዪዮ፡ ኔ ኢሻታኔ ኔሶ ኣሳ ኡባ ኔሶ ኤሆንታ ኣጊኮ ኔኒ ኑና ጫቂሲዳ ጫቆይ ኑስ ጎሚቴና።

19 ኦኒካ ኔ ኬላፌ ካሬ ኬዚ ኦጌ ቦላ ቤቲ ሃይቂኮ ሄሲ ኢዛ ጎሚ፤ ኑኒ ሄሳን ኦይሼቶኮ፤ ጊዶ ኣቲን ኔናራ ሶን ኢሲፌ ዲዛይ ኦኒካ ቦሼቲኮ ኢዛ ሱላ ጎሚይ ኑና ጋኮ።

20 ኑ ኦሊዳይሳ ኔ ሃራስ ዮቲዛ ጊዲኮ ኔኒ ኑና ጫቂሊዳ ጫቆይ ኑስ ጎሚቴና» ጊዳ።

21 ኢዛካ፡ «ኢንቴ ጊዳ ማላ ሃና» ጋዳ ኢስታ ሞይዛዱሰ፤ ኢስቲ ቢዳፔ ጉዬ ዘኦ ዋዶሮ ባ ማስኮቴ ቦላ ቃጳዱሰ።

22 ኢስቲ ፑዴ ዙምቡላታኮ ቢዳ፤ ጎዴሊዳይቲ ኢያርኮ ሲማና ጋካናስ ሄን ሄሹ ጋላስ ቆቴቲዳ። ጎዴሊዳይቲ ኦጌ ኡባን ኮዬዳ ሺን ኢስቲ ዴሚቤቴና።

23 ሄሳፌ ጉዬ ሄ ናምኡ ኣሳቲ ዙምቡላታፔ ዋጲ ዮርዳናሴ ሻፋ ፒኒዲ ናዌ ና ኢያሶኮ ቢዲ ባና ጋኪዳ ኡባ ኢዛስ ዮቲዳ።

24 ኢስቲ ኢያሶስ፡ «ጎዳይ ቱማፔ ቢታ ኡባ ኑስ ኣሊ ኢሚዴሰ፤ ቃሴ ሄ ቢታን ዲዛ ኣሳይ ዉሪ ኑስ ያሻቴላፌ ዴንዲዳይሳን ኢስታ ዋዚናይ ሴሪዳይሳ ኑ ቤኢዶስ» ጊዳ።

# 3

ኢስራኤል አሳይ ዮርዳኖሴ ሻፋ ፒኔል

<sup>1</sup> ኢያሱይኔ ኢስራኤል አሳይ ማላዶ ዋንታራ ዴንዲዳ፤ ኢስቲ ሺጺሜ ጌቲቲዛሶፔ ዴንዲዲ ዮርዳኖሴ ሻፋኮ ቢዲ ፒናንታ ሄን ታኪዳ።

<sup>2</sup> ሄዙ ጋላሳፌ ጉዬ ኦላ ጋዳዋቲ ኢስቲ ዴንካኒዳሶን ጌሊዲ፤

<sup>3</sup> አሳሰ፤ «ጎዳ ኢንቲ ጸሳ ጫቆ ቃላ ታቦታኔ ኢዛ ቶኪዳ ሌዌ ዛሬ ቄሴታ ቤኢዛ ዋዴ ኢንቲ ዴንካኒዳሶፔ ዴንዲዲ ኢስታ ካሊቲ።

<sup>4</sup> ኢንቲ ካሴ ሄ ኦጌራ ቢ ኤርንታ ገሻሰ ኢንቲ ባና ኦጌ ኢስቲ ኢንቲና ቤሳና፤ ገዶ ኦቲን ጫቆ ቃላ ታቦታኮ ሺቆፒቲ፤ ጫቆ ቃላ ታቦታፔ 2,000 ዋቆ ገዲዛይሳ ማላ ሃሆን ኤቂቲ» ገ ኣዛዘ ኢሚዳ።

<sup>5</sup> ኢያሱይ አሳ፤ «ጎዳይ ዋንቶ ኢንቲ ገዶን ማላሊሲዛዘ ኦፋና ገሻሰ ኢንቲ ጌይቲ» ገዴሰ።

<sup>6</sup> ቃሴካ ኢያሱይ ቄሴታሰ፤ «ኢንቲ ጫቆ ቃላ ታቦታ ቶኪዲ አሳፔ ሲንፊ አጁቲ» ገ ዮቲዴሰ፤ ኢስቲ ጫቆ ቃላ ታቦታ ቶኪዲ ዴራፔ ሲንፊ ሲንፊ ቢዳ።

<sup>7</sup> ጎዳይ ኢያሱሰ፤ «ታኒ ሙሴራ ገዲዳ ማላ ኔናራ ገዳናይሳ ኢስራኤል አሳይ ዉሪ ኤራና ማላ ሃቕ ኢስታ ሲንፋን ታኒ ኔና ቶቂ ቶቂ ኦፋናሰ ዶማና።

<sup>8</sup> ኔኒ ጫቆ ቃላ ታቦታ ቶኪዛ ቄሴታ፤ «ዮርዳኖሴ ሻፋ ዶና ጋኪዛ ዋዴ ሃፋን ጌሊዲ ኤቂቲ» ጋዳ ኣዛዛ» ገዴሰ።

<sup>9</sup> ኢያሱይ ኢስራኤል አሳ፤ «ሃ ዪቲ፤ ዪዲ ጎዳ ኢንቲ ጸሳ ቃላ ሲዪቲ።

<sup>10</sup> ዴኦ ጸሲ ኢንቲ ገዶን ዲዛይሳኔ ኢዚ ቱማፔ ካናኔታ፤ ሂቲታ፤ ሂዌታ፤ ፓሪዜታ፤ ጌርጌሴታ፤ አዋሬታኔ ያቡሴታ ኢንቲ ሲንፋፌ ኬሳናይሳ ኢንቲ ሄሳን ኤራና።

<sup>11</sup> ሳኦ ኡባ ጎዳ ጫቆ ቃላ ታቦታይ ኢንቲፌ ሲንፋቲዲ ዮርዳኖሴ ሻፋ ጌላና።

<sup>12</sup> ሃኢ ኢስራኤል ዛሬታፔ 12 አሳታ ዶሪቲ፤ ኢሲ ኢሲ ዛሬፔ ኢሲ ኢሲ አሰ ገዶ።

<sup>13</sup> ሳኦ ኡባ ጎዳ ጫቆ ቃላ ታቦታ ቶኪዳ ቄሴታ ቶሆይ ዮርዳኖሴ ሃፋ ቦቺዳ ማላ ፑዴሃፔ ዴጌ ጎጊዛ ዮርዳኖሴ ሃፋ ሄራካ ጎጌላ አጋጋና፤ ዶሬ ማላ ገዲ ኤቃ ጋና» ገዴሰ።

<sup>14</sup> አሳይ ዮርዳኖሴ ሻፋ ፒናናሰ ባ ዴንካኔፔ ኬዚዳ ዋዴ ጫቆ ቃላ ታቦታ ቶኪዳ ቄሴቲ አሳፔ ሲንፋቲ ቢዳ።

15 ካላ ሺሾ ወደን ኡባን የርዳኖሴ ሻፋይ ከጼሰ፤ ጊዲኮካ ጫቆ ቃላ ታቦታ ቶኪዳ ቄሴቲ የርዳኖሴ ሻፋ ጋኪዲ ኢሰታ ቶሆይ ሃላ ጋጸ ዩጲዳ ማላ።

16 ጎጊዛ ሃላይ ኤቂዴሰ፤ ሄን ዳር ሃሆሶን ጳርታኔ ማታን ዲዛ አዳሜ ጌቲቲዛ ካታማ ጋካናሰ ኢሲሶ ሸቂዲ ዶሬቲዴሰ፤ ዲጌ አራቤ ጋታን ዲዛ ማጸኔ አባን ጎጊዛ ሃላ ኡባይ ዱጸ አቲዴሰ፤ ሂሰቲን አሳይ ኢያርኮ ካታማ ገናራ ፒኒዴሰ።

17 ኢሰራኤሌ አሳይ ሜላ ቢታ ዩጲ ፒኒዛ ዎዴ አሳይ ወሪ ፒናና ጋካናሰ ጎዳ ጫቆ ቃላ ታቦታ ቶኪዳ ቄሴቲ የርዳኖሴ ሻፋ ጊዶን ሜላ ቢታን ኤቃ ጊዳ።

## 4

### ሃሳኢሲዛ ሹቻታ ኤሶ

1 ካዎቴሳይ ወሪ የርዳኖሴ ሻፋ ፒኒዳፔ ጉዬ ጎዳይ ኢያሶ።

2 «ኢሰራኤሌ አሳፔ 12 አሳታ ዶራ፤ ኢሲ ኢሲ ቆሞሬ ኢሲ ኢሲ አሰ ጊዶ።

3 ሂሰታዳ ኢሰታሰ። «የርዳኖሴ ሻፋ ጊዶን ቄሴታ ቶሆይ ኤቂዳሶፔ 12 ሹቻታ ኤኪቲ፤ ሄ ሹቻታ ቶኪ ኤፊዲ ሃች ኢንቲ አቂዛሶን ዎሊቲ» ጋዳ የታ» ጊዴሰ።

4 ሄሳ ገሻሰ ኢያሶይ ኢሰራኤሌ ቆሞታፔ ኢሲ ኢሲ አሰ ኤኪዲ ታማኔ ናሞኡ ዶሬቲዳይታ ጼይጊዴሰ።

5 ሂሰቲዲ ኢሰታሰ። «ጎዳ ኢንቲ ጸሳ ጫቆ ቃላ ታቦታይ ዲዛሶሆ የርዳኖሴ ሻፋ ጌሊቲ፤ ኢሰራኤሌ ቆሞታ ቆዳን ወሪካ ኢሲ ኢሲ ሹች ኢንቲ ሃሼን ሃሼን ቶኪቲ።

6 ሃ ሹቻቲ ጎዳይ ሃች ኦሊዳይሳ ኢንቲና ሃሳኢሲዛ ማላታ ጊዳና፤ ዎዴፔ ኢንቲ ናይቲ ኢንቲና። «ሃ ሹቻቲ አዜ?» ጊዲ ኦይቺዛ ዎዴ።

7 ኢንቲ። ሳዳ ጫቆ ቃላ ታቦታይ ፒኒዛ ዎዴ የርዳኖሴ ሻፋይ ጎጊዛይሳ አጊ ኤቂዴሰ፤ ሃ ሹቻቲ ሄ ሶሆን ሃኒዳይሳ ኡባ ሜርናሰ ኢሰራኤሌ አሳ ሃሳኢሲዛይታ» ጊዲ ኢሰታሰ የቲቲ» ጊዴሰ።

8 ኢሰራኤሌ አሳይ ኢያሶይ አዛዚዳ ማላ ኦሊዴሰ፤ ጎዳይ ኢያሶሰ የቲቲ ማላ ኢሰራኤሌ ቆሞታ ቆዳን 12 ሹቻታ የርዳኖሴ ሻፋ ጊዶሬ ኤኪዳ፤ ቶኪ ኤሂዲ ባ አቂዳ ሶሆን ዎሊዳ።

9 ኢያሶይ ጫቆ ቃላ ታቦታ ቶኪዳ ቄሴታ ቶሆይ የርዳኖሴ ሻፋ ጊዶን ኤቂዳሶን 12 ሹቻታ ኤሲዴሰ፤ ሄ ሹቻቲ ሃች ጋካናሰ ሄን ዴቲሰ።

10 ጎዳይ ኢያሱ አዛዚዳይሳ ኡባ አሳይ ፖላና ጋካናሰ ጫቆ ቃላ ታቦታ ቶኪዳ ቄሴቲ ዮርዳኖሴ ሻፋ ጊደን ኤቂ ጋምኢዳ፤ ሙሴይ ኢያሱ አዛዚዳ አዛዘይካ ሄሳ፤ አሳይ ኤሶቲዲ ሻፋ ፒኒዴሰ።

11 አሳይ ዉሪ ፒኒዳፔ ጉዬ ጎዳ ጫቆ ቃላ ታቦታይኔ ቄሴቲ አሳይ ኢሰታ ጸሊሺን ፒኒዳ።

12 ሙሴይ አዛዚዳ ማላ ኦርቤሌ ዛሬቲ፥ ጋዴ ዛሬቲኔ ሚናሴ ዛሬታፔ ባጋይ ኦላ ሚሻ ኦይኪዲ ኢሰራኤሌ አሳፔ ሲንፋቲዲ ፒኒዳ።

13 ቆዳን 40,000 ጊዲዛ አሳይ ቶራኔ ጎንዳሌ ኦይኪ ኦላሰ ጊፔቲዲ ጎዳ ሲንፋን ኢያርኮ ማታን ዲዛ ዴምባ ፒኒዳ።

14 ሄ ጋላሰ ጎዳይ ኢያሱ ኢሰራኤሌ አሳ ኡባ ሲንፋን ቆቁ ቆቁ ሂሰቲዴሰ፤ አሳይ ሙሴ ቦንቹዳ ማላ ኢያሶካ ኢዚ ዲዳ ላይል ኡባን ቦንቹዴሰ።

15 ሄሳፌ ጉዬ ጎዳይ ኢያሶስ፥

16 «ጫቆ ቃላ ታቦታ ቶኪዳ ቄሴቲ ዮርዳኖሴ ሻፋፔ ኬዛና ማላ አዛዛ» ጊ ዮቲን፤

17 ኢያሶይ ቄሴታ፥ «ዮርዳኖሴ ሻፋፔ ኬዚቴ» ጊ አዛዚዴሰ።

18 ጎዳ ጫቆ ቃላ ታቦታ ቶኪዳ ቄሴቲ ዮርዳኖሴ ሻፋ ጊደፌ ኬዚዲ ሜላ ቢታ ኢሰቲ ዬጲዳ ማላ ሄራካ ዮርዳኖሴ ሃላይ ካሴ ማላ ሻፋ ኩሚዲ ጎጌል ኦይኪዴሰ።

19 አሳይ ኮይር አገናን ታማንፋ ጋላሳን ዮርዳኖሴ ሻፋ ፒኒዲ ኢያርኮን አርሼይ ሞኪዛሶ ባጋራ ዛዋቲዛ ጌልጌላን ዲንካኒዴሰ።

20 ኢያሶይ ዮርዳኖሴ ሻፋፔ ኤሂዳ 12 ሹቻታ ጌልጌላን ኤሲዴሰ።

21 ኢሰራኤሌ አሳሰ፥ «ዎዴፔ ኢንቴ ዛሬቲ ባ አዋታ፥ «ሃ ሹቻቲ አዜ?» ጊ ኦይቹዛ ዎዴ፥

22 «ኢሰራኤሌ አሳይ ዮርዳኖሴ ሻፋ ሜላ ቢታ ዬጲዲ ፒኒዳይሳ ሃሳኢሲዛይሳ» ጊዲ ዮቲቴ።

23 ኦኒ ፒናና ጋካናሰ ጎዳ ኦ ጸሳይ ዞኦ አባ ካሴ ኦ ሲንፋን ሜሊሲዳ ማላ ኢንቴካ ፒናና ጋካናሰ ጎዳ ኢንቴ ጸሳይ ዮርዳኖሴ ሻፋ ኢንቴ ሲንፋን ሜሊሲዴሰ።

24 ሄሳሉ ኢዚ ኦፊዳይ ሳኦን ዲዛ አሳይ ዉሪ ጎዳ ዎልቃይ አይ ማላ ጊታኮ ኤራናሲኔ ኢንቴካ ጎዳሰ ኢንቴ ጸሳሰ ሜርናሰ ያያናሳ» ጊዴሰ።

## 5

1 ዮርዳኖሴ ሻፋፔ አርሼይ ዉሊዛ ባጋራ ዲዛ አዋሪታ

ካዋቲኔ ሜዲቴራኔ አባ ላንቄ ላንቄ ኦይኪዲ ዲዛ ካናኔታ ካዋቲ ወሪ ኢስራኤል አሳይ ፒናና ጋካናስ ጎዳይ ዮርዳኖሴ ሻፋ ሃፋ ሜሊሲዳይሳ ሲዩዳ ዋዴ ኢስታ ዋዚናይ ባቦን ሴሪዴስ። ሂስቲን ኢስቲ ኢስራኤል አሳራ ኤቄታናስ ጸሊቤቴና።

### ቃጸራ

<sup>2</sup> ሄ ዋዴ ጎዳይ ኢያሱስ፡ «ሳሎ ሹቻ ቃራ ኤካዳ ቃጸሬቶንታ ኢስራኤል አቱማ አሳ ናምኣንሶ ቃጸራ» ጊዴስ።

<sup>3</sup> ሂስቲን ኢያሱይ ሳሎ ሹቻ ቃራሲዲ ጊቢኣዜ ኤሎቴ ጌቴቲዛሶን ኢስራኤል አቱማሳ ቃጸሪዴስ።

<sup>4</sup> ኢዚ ሄሳ ኦሊዳ ጋሶይካ ጊብጾፔ ኬዚዳ አሳን ላይላይ ኦላስ ጋኪዳ አቱማ አሳይ ወሪ ጊብጾፔ ኬዚዳፔ ጉዬ ባዞን ኦጌ ቦላ ሃይቂዴስ።

<sup>5</sup> ጊብጾፔ ኬዚዳ አቱማ አሳይ ወሪ ቃጸሬቲዴስ፤ ጊዶ አቲን ባዞን ዩዩዛ ዋዴ ዩሊቲዳ አቱማ ናይታፔ ኢሶይካ ቃጸሬቲቤና።

<sup>6</sup> ኢስራኤል ካዋቲላይ ጎዳስ አዛዜቶንታ ኢጲዳ ጊሻስ ጊብጾፔ ኬዚዛ ዋዴ ላይላይ ኦላስ ጋኪዳ አቱማ አሳይ ወሪ ሃይቂዲ ወራና ጋካናስ ባዞን 40 ላይሳ ዩዩዴስ፤ ሄሳን ጎዳይ ኢስታስ፡ «ኤሲኔ ማሊ ጎጊዛ አራዳ ቢታ ታኒ ካሴ አንቴ አዋታስ ኢማና ጊዳ ሄ ቢታ አንቴ ቤዩኬታ» ጊዳ ቃላይ ፖሌታናሳ።

<sup>7</sup> ሄሳ ጊሻስ ጎዳይ ኢስታ ናይታ ኢስታሶሆን ዴንሊዴስ፤ ኢያሱይ ቃጸራ ጌልሊዳይቲ ሄይታንታ፤ ኢስቲ ኦጌ ቦላ ሄሜቲሼ ዲዛ ጊሻስ ቃጸሬቲቤቴና።

<sup>8</sup> ካዋቲላይ ወሪ ቃጸሬቲዳፔ ጉዬ ማዲንላይ ፓጻና ጋካናስ ባ ዲንካኒ ዲዛሶን ታኪዴስ።

<sup>9</sup> ጎዳይ ኢያሱስ፡ «ሃች ታኒ ጊብጾታ ቦሬ አንቴፌ ጌንዴሪሳ ዲጋዲስ» ጊዴስ፤ ሂስቲን ሄ ሶሆዛ ሱንላይ ሃች ጋካናስ ጌልጌላ \* ጌቴቴስ።

<sup>10</sup> ኢስራኤል አሳይ ኢያርኮ ዴምባን ጌልጌላን ዲንካኒ ዲሼ አጊናይ ጌሊን ታማኔ ኦይዳንላ ጋላሳ ኦማርስ ፓዚጋ ባኣሌ ቦንቺዴስ።

<sup>11</sup> ፓዚጋፔ ጉዬ ዋንቴላ ጋላስ ቢታን ሞኪዳ ካላ አይፌፔ ኢርሾይ ጌሎንታ ኡኬቲዳይሳኔ ጫጩቲዳ ቲያ ሚዴስ።

---

5:6 ታይ 14:28-35 \* 5:9 ጌልጌላ፡ ጌልጌላ ጉሳይ ኢብራቂታ ቃላን ጌንዴሪሲ ዲጊዴስ ጉሳ። 5:10 ኬሳ 12:1-13

12 ሄ ቢታን ሞኪዳ ካላ አይፌ ሚዳ ጋላስ ማናይ ዩስ አጊዴስ፤ ሄሳፌ ጉዬ ኢስራኤል አሳስ ማናይ ዩቤና፤ ጊዶ አቲን ሄ ዎዴፔ ዶሚዲ ኢስቲ ካናኔን ሞኪዳ ካል ሚሼ ዴኢዳ።

### ማሻ ኦይኪዲ ኢያሱራ ጋይቲዳዴ

13 ኢያሱይ ኢያርኮ ማታን ዲሼ ጾቄ ጊ ጸሊዲ ጊላ ማሻ ሾዲ ኦይኪዳ ኢሲ አሲ ኢዛ ሲንላን ኤቂዳይሳ ቤኢዴስ፤ ኢያሱይ ኢዛኮ ሸቂዲ፡ «ኔኒ ኑ ባጋዬ ኑ ሞርኬታ ባጋ?» ጊ ኦይቺዴስ።

14 ኢዚካ፡ «ታ ኦና ባጋካ ጊዲኬ፤ ጊዶ አቲን ታኒ ጎዳ ኦላንቻታ ጋዳዋ ጊዲዳ ጊሻስ ያዲስ» ጊ ዛሪዴስ።

ኢያሱይካ ሳኦን ጉፋኒ ጎይኒዲ፡ «ታ ጎዳዉ! ታስ ኔ አይሌዛስ ኔ አይ ዮታኔ?» ጊዴስ።

15 ጎዳ ኦላንቻታ ጋዳዋይ፡ «ኔኒ ኤቂዳሶይ ጌሽ ጊዲዳ ጊሻስ ኔ ቶሆፕ ጫማ ኬሳ» ጊዴስ፤ ሂስቲን ኢያሱይ ኢዚ አዛዚዳ ማላ ኦላዴስ።

## 6

### ኢያርኮ ኩንዴል

1 ኢስራኤል አሳስ ያዱዳ ጋሶን ኢያርኮ ካታማ ዲርሳ ፔንጌቲ ጎርዴቲዳ፤ ካታማ ጌላናሲኔ ካታማፔ ኬዛናስ ዳንዳይዛይ ኦኒካ ዴና።

2 ጎዳይ ኢያሱስ፡ «ሄኮ ታኒ ኢያርኮ ካታማዮ ኢዚ ካዎዛራ ኢዚ ሚኖ ኦላንቻታራካ ኔ ኩሼን አላ አማዲስ።

3 ኔኒኔ ኔ ኦላንቻቲ ጨፍሪዲ ኡሱፑን ጋላስ ጋካናስ ሃች ሃች ካታማ ዲርሳ ኢሲቶ ዩዪ አጂቴ።\*

4 ቃሴ ላፑን ቄሴቲ ላፑን ዛዬታ ኦይኪዲ ጎዳ ጫቆ ቃላ ታቦታ ሲንል አጼቶ፤ ላፑንላ ጋላስ ቄሴቲ ዛዬታ ፑኒሺን ኦላንቻቲ ጨፍሪዲ ኢሲፌ ካታማዮ ላፑንቶ ዩዪ አጼቶ።

5 ሄሳፌ ጉዬ ዛዬይ ቃንጾይ ባይንዳ ፑኔቲዛይሳ ሲዩዳ ማላ አሳይ ዉሪ ባ ቃላ ጾቄ ሂስቲ ዋሶ፤ ሂስቲዳ ማላ ካታማይ ጊምቤይ ላሌታና፤ አሳይ ዉሪ ላዉሁ ጊ ኬኢዲ ካታማይ ጊዶ ሲቲ ጊ ጌላና» ጊዴስ።

6 ናዌ ና ኢያሱይ ቄሴታ ጸይጊዲ፡ «ጎዳ ጫቆ ቃላ ታቦታ ቶኪቴ፤ ኢንቴፌ ላፑን ቄሴቲ ላፑን ዛዬታ ኦይኪዲ ጫቆ ቃላ ታቦታፔ ሲንፊ አጂ ቢቴ» ጊዴስ።

---

5:12 ኬሳ 16:35 \* 6:3 ጨፍራ ጊዛይሳ ኢሲ ኢሲ ባጋ ጋሞላ ቃላን ዚሬ ጉሳ።

7 ዴሬዛካ፡ «ጌዴ ሲንፍ ቢቴ፤ ካታማ ዩዩ አዲቴ፤ ኦላንቻቲካ ጎዳ ጫቆ ቃላ ታቦታ፤ ሲንፋቲ ቤቶ፤ ካታማዮካ ዩዩቴ» ጌዲ አዛዚዴሰ።

8 ኢያሱይ አሳሰ ሃሳይዳ ማላ ላፑን ቄሴቲ ላፑን ዛዬታ ጎዳ ሲንፋን ኦይኪዲ ፑኒሼ ሲንፋቲ ቢዳ፤ ቃሴ ጎዳ ጫቆ ቃላ ታቦታይ ኢሰታ ካሊዴሰ።

9 ኦላሰ ጊጌቲዳይቲ ዛዬታ ፑኒዛ ቄሴታ፤ ሲንፋራ ቢሺን ጉዬራ ናጊዛ ኦላንቻቲ ጫቆ ቃላ ታቦታ ካሊዳ፤ ሄ ዎዴ ዛዬይ ቃንጾይ ባይንዳ ፑኒቲዴሰ።

10 ጌዴ አቲን ኢያሱይ አሳ፡ «ታኒ አንቴና፡ (ዋሲቴ!)» ጋና ጋላሳይ ጋካናሰ ኦላ ዋሶ ዋሶፍቴ፤ አንቴ ቃላይ ሲዬቶ፤ ኢሲ ቃላካ ቃቶፍቴ፤ ታ ዋሲቴ ጊኮ ሄ ዎዴ ዋሲቴ፤» ጌ አዛዚዴሰ።

11 ሄሳ ጊሻሰ ጎዳ ጫቆ ቃላ ታቦታይ ቶኬቲዲ ሄ ካታማ ኢሲቶ ዩዩ አዳና ማላ ኦሊዴሰ፤ ሄሳፌ ጉዬ አሳይ ባ ዱንካኒዳሶ ሲሚዲ ኦማርሰ ሄን አቂዴሰ።

12 ዎንቴላ ጋላሰ ኢያሱይ ዎንታቲ ዴንዲዴሰ፤ ቄሴቲካ ጎዳ ጫቆ ቃላ ታቦታ ቶኪዳ።

13 ላፑን ዛዬታ ኦይኪዳ ላፑን ቄሴቲ ሲንፍ አዲዲ ዛዩሼ ጎዳ ጫቆ ቃላ ታቦታ፤ ሲንፍ ሲንፍ ቢሼ ዛዬዛ ቃንጾይ ባይንዳ ፑኒዳ፤ ኦላሰ ጊጌዳይቲ ኢሰታፌ ሲንፋራ ቢሺን ጉዬራ ናጊዛ ኦላንቻቲካ ጎዳ ጫቆ ቃላ ታቦታ ካሊ ቤቴሰ፤ ሄ ዎዴ ቄሴቲ ቃንጾይ ባይንዳ ዛዬ ዛዬቴሰ።

14 ናዎአንሶ ጋላሰ ካታማ ኢሲቶ ዩዩ አዲዲ ባ ዱንካኒዳሶ ሲሚዳ፤ ኡሱፑን ጋላሰ ጋካናሰ ሄሳሶካ ኦሊዳ።

15 ላፑንፋ ጋላሰ ባዞይ ዞኢሺን ዴንዲዲ ካሴይሳሶካ ካታማዮ ላፑንቶ ዩዩ አዲዳ፤ ሄ ጋላሰ ጸላ ካታማዮ ላፑንቶ ዩዩ አዲዳ።

16 ላፑንሶ ዩዩሼ ቄሴቲ ዛዬታ ፑኒሺን ኢያሱይ ዴራ፡ «ጎዳይ ሃኖ ካታማዮ አንቴሰ አሊ ኢሚዳ ጊሻሰ ዋሲቴ!

17 ካታማያኔ ካታማይ ጊዶን ዲዛ ኡባይ ጎዳሰ ዴማ ጊዲዳ ጊሻሰ ኢዞ ሙሌራ ጳይሲቴ፤ ኑኒ ቢታዮ ዎቻናሰ ከቲዳ አሳታ ቆታ አሺዳ ጊሻሰ ላይማ ማጫሰ ኤራኣባኔ ኢዚ ሶን ኢዚራ ኢሲፌ ዲዛ አሲ ጸላ አታና።

18 ጌዴ አቲን አንቴ ጎዳሰ ዴማቲዳይሳፌ አይኮካ ኤኮንታ ማላ አንቴ ሁኤሰ ናጌቴቴ፤ አንቴ ሂሰቶንታ ኣጊኮ ኢሰራኤሊቲ ዱንካኒዳሶ ኢታሰ አሊ ኢማና፤ ሂሰቲዲ ሄ ሶሆዛ ቦላ ሜቶ ጋላና።

19 ቢራይኔ ዋርቃይ ወሪ ቃሴ ጸርቂማላፔኔ ቢራታፔ ኦሴቲዳ ሚሻቲ ኡባይ ጎዳሰ ዱማ ጊዲዳ ጊሻሰ ጎዳ ሚንጃ ኬል ጌሎ» ጊዴሰ።

20 ሄሳ ጊሻሰ ዛዬይ ፑኔቲን አሳይ ዋሲዴሰ፤ ዛዬዚ ፑኔቲሺን ዴሪዚ ባ ቃላ ቆቁ ሂሰቲዲ ዋሲን ካታማ ዲርሳይ ላሌቲዴሰ፤ ሄሳፌ ጉዬ አሳይ ወሪ ሲቲ ጊዲ ጌዴ ካታማዮ ጌሊዴሰ።

21 ካታማን ሼምፖራ ፓጸ ዲዛይታ ኡባ ኦይኪዲ ማጫ፥ አቱማ፥ ናይታ፥ ጨማታ፥ ሚዝ፥ ዶርሳኔ ሃሬ ኡባ ቃራ ማሻን ዋዲዴሰ።

22 ኢያሶይ ቢታ ዋቻናሰ ኪቴቲዳ ናምኡ አሳታ፥ «ላይማ ማጫሰ ኤራኣቢ ሶ ቢቴ፤ ሂሰቲዲ አንቴ ኢዚሰ ጫቂዳ ማላ ኣኔ ኢዞኔ ኢዚ ሶ አሳ ኡባ ቆሪ ኬሲቴ» ጊዴሰ።

23 ሄሳ ጊሻሰ ቢታ ዋቹዳ አሳቲ ቢዲ ኤራኣቦ፥ ኢዚ አዋ፥ ኢዚ አዪዮ፥ ኢዚ ኢሻታኔ ኢዚ ዳቦታ ኡባ ቆሪ ኬሲዳ፤ ኢሰራኤሌ አሳይ ዱንካኒ ዲዛሶፔ ጋጸራ ዋሏዳ።

24 ሄሳፌ ጉዬ ካታማዮኔ ኢዚ ጊዶን ዲዛ ኡባ ታማን ጸጊዳ፤ ጊዶ አቲን ቢራኔ ዋርቃ፥ ጸርቂማላፔኔ ቢራታፔ ኦሴቲዳ ሚሻታ ጎዳ ሚንጃ ኬላን ዋሏዳ።

25 ቃሴ ኢያሶይ ላይማ ማጫሰ ኤራኣቦ ኢዚ አዋ ሶ አሳኔ ኢዚራ ዲዛ ዳቦታ ኡባ አሺዴሰ፤ ጋሶይካ ኢያሶይ ኢያርኮ ካታማዮ ዋቻናሰ ኪቴቲዳ አሳታ ኢዛ ካሴ ቆታዳ አሺዳ ጊሻሳ፤ ኢዚ ዛሬቲ ሃቕ ጋካናሰ ኢሰራኤሌ ቢታን ዴቴሰ።

26 ሄ ዋዴ ኢያሶይ፥ «ሃኖ ካታማዮ ዛሪ ኤሲዛ ኣሲ፥ «ጎዳ ሲንላን ቃንጌቲዳዴ ጊዶ።

ዮቕ ዩጊዛ ዋዴ  
ኢዛሰ ባይራ ናይ ቆዮ።  
ጊምቤታ ኤሲሺን  
ወርሴላ ናይ ቆዮ»  
ጊዲ ቃንጊዴሰ።

27 ሃ ኡባን ጎዳይ ኢያሶራ ጊዲዴሰ፤ ኢያሶ ጎባቴላ ዋሪይ ቢታ ኡባ ጋኪዴሰ።

## 7

### አካኔ ናጋራ

1 ኢሰራኤሌ አሳይ ጎዳሰ አማኔቶንታ ኢዲዲ ፒላ ሚሽ ኤኪዴሰ፤ ሄሳ ኤኪዳይ አካኔ፤ አካኔይ ካርሜ ና፤ ካርሜይ

ዚሚሬ ና፤ ዚሚሬይ ዩሁዳ ቆሞፌ ዛራሄ ና፤ ሂሰቲን ጎዳ ሃንቆይ ኢስራኤል አሳ ቦላ ኤጺ ኬዚደስ።

2 ኢያሱይ ቤቴሌ ካታማፔ ኣርሼይ ሞኪዛ ባጋራ ቤቲ-አዌኔ ማታን ዲዛ አዬ ካታማ ኢያርኮፌ አሰ ከቲዲ፡ «ጌዴ ኬኢቲ፤ ቢታዮካ ዎቹቲ» ጌደስ። አሳቲካ ቢዲ አዬ ካታማ ዎቹዳ።

3 ዎቹዳ አሳቲ ኢያሱኮ ሲሚ ዪዲ፡ «አዬ ካታማ ኦላናስ ኡባ አሳይ ባናስ ኮሼና፤ ናሞኡ ዎይኮ ሄቹ ሺ አሰ ዬዳ፤ አዬን ጉላ አሲ ዲዛ ገሻስ አሳይ ወሪ ዳቡሮፖ» ጌዳ።

4 ሂሰቲን 3,000 ጌዲዛ አሳይ ኦሌታናስ አዬ ካታማ ቢደስ፤ ጌዶ አቲን አሳይ አዬ ካታማ አሳ ሲንላፌ ባቃቲደስ።

5 አዬ ካታማ አሳይ ኢስራኤል አሳ ካታማ ገምቤ ፔንጌፌ ቢዲ ሺባርሚ ጋካናስ ዱጉንላን ጎዲሼ ሾጪደስ፤ ኢስታፌ 36 አሰ ዎቹዳ፤ ሄሳን አሳ ዎዚናይ ሴሪዲ ሃላ ማላ ጉኪደስ።

6 ሄሳፌ ጉዬ ኢያሱይ ባ ማይኦ ዳኪደስ፤ ሂሰቲዲ ጎዳ ታቦታ ሲንላን ኦማርስ ጋካናስ ጉፋኒደስ። ኢስራኤል ጪማቲካ ሄሳ ማላ ሃኒዳ፤ ባ ሁኡንካ ጉዲላ ማኪዳ።

7 ሂሰቲን ኢያሱይ፡ «አዬ አና! ኡባ ሃሪዛ ጎዳወ! ኑና አሞሬ አሳስ አላ አማዳ ወርሲሳናስ አይስ ዮርዳኖሴ ሻፋ ፒንላዳ ኤሃዲ? ኑ ፒኖንታ ሄን አቲዳኮ አዜ ዲዛይሺን!

8 አቤት ጎዳወ! ኢስራኤል አሳይ ጸኔቲዲ ባ ሞርኬታ ሲንላፌ ባቃቲደይሳ ታኒ አይ ጎ?

9 ካናኔ አሳይኔ ሃ ቢታን ዲዛ ሃራ አሳይ ወሪ ሃ ዮኡዛ ሲዪዲ ኑና ዶዳና፤ ቢታ ቦላፌ ኑ ሱንሐ ቆይሳና፤ ሂሰቲን ኔ ጌታ ሱንላ ገሻስ ጋዳ ኔ አይ ኦላኔ?» ጌደስ።

10 ጎዳይ ኢያሱ፡ «ዴንዳ ኤቃ! አይስ ጉፋናዲ?

11 ኢስራኤል አሳይ ናጋራ ኦሊደስ፤ ታኒ ኢስታራ ጫቄቲዳ ታ ጫቆዛ ሜንሊደስ፤ ኢስቲ ፒላ ሚሻታፔ ኤኪዳ፤ ካይሶቲዳ፤ ዎርዶቲዳ፤ ቃሴ ባንቲ ኤኪደይሳ ባንታ ሚሻራ ዋላኪዳ።

12 ኢስራኤል አሳይ ባንታ ሞርኬታራ ኤቄታናስ ዳንዳዮንታይ ሄሳ ጋሶና፤ ኢስቲ ቆዮስ አቋ ኢሜቲዳ ገሻስ ባንታ ሞርኬታ ሲንላፌ ጉዬ ሲሚ ባቃቲዳ፤ ፒላ ሚሽ ኢንቲ ጌዶፌ ኢንቲ ቆይሶንታ አጊኮ ሃይሳፌ ጉዬ ታኒ ኢንቲናራ ጌዲኬ።

13 «ዴንዳ! አሳ ጌሻ፤ ኢስታስ፡ ሳዳ ኢስራኤል ጸሳይ ኢንቲና፡ ኢስራኤሌቶ! ፒላ ሚሽ ኢንቲ ጌዶን ደስ፤ ኢንቲ ሄሳ ኢንቲ ጌዶፌ ዲጋና ጋካናስ ኢንቲ ሞርኬታ ሲንላን ኤቃናስ ዳንዳዬኬታ፤ ዎንቶስ ኢንቲና ጊሊሳናስ ኢንቲና ጌሺቲ።

14 ዋንቶ ማላዶ አንቴ ቆሞን ቆሞን ሸቂቱ፤ ጎዳይ ሻኪዳይሲ፡ ዛሬን ዛሬን፡ ዛርኬን ዛርኬን፡ ኬላን ኬላኒኔ ሁኔን ሁኔን ሲንሐ ኬዛና።

15 ሄሳፌ ጉዬ ፒላ ሚሺ ኢዛ እቻን ቤተዳዳይኔ ኢዛሰ ዲዛ ኡባይ ታማን ጽጌታና። ጋሶይካ ጎዳ ጫቆ ቃላ ላሊዲ ኢሰራኤል ጊዶን ዬላቺዛ ኦሶ ኦሊዳ ጊሻሳ ጋ» ጊዴሰ።

16 ኢያሶይ ዋንቴላ ጋላሰ ዋንታራ ዴንዲዲ ኢሰራኤል አሳይ ባ ቆሞን ቆሞን ሺቃና ማላ ኦሊዴሰ፤ ሄሳፌ ጉዬ ዩሁዳ ቆሞይ ሻኬቲዴሰ።

17 ዩሁዳ ቆሞይ ሸቂን፡ ዛራሄ ዛሬይ ሻኬቲዴሰ፤ ዛራሄ ዛሬይ ሸቂን፡ ዘሚሬ ሶ አሳይ ሻኬቲዴሰ።

18 ዘሚሬ ሶ አሳይ ሸቂን፡ ዉርሴላን ዘሚሬ ና፡ ካርሜ ና አካኔይ ሻኬቲዴሰ።

19 ሂሰቲን ኢያሶይ አካኔ፡ «ታ ናዞ! ጎዳ ኢሰራኤል ጸሳ ቦንቻ፤ ኢዛሰ ፓጻ፤ እኔ ኔኒ ኦሊዳይሳ ቆቶንታ ዳሼ ታሰ ዮታ» ጊዴሰ።

20 አካኔይካ ኢያሶሰ፡ «ኤ ቱማ! ታኒ ጎዳ ኢሰራኤል ጸሳ ቆሃዲሰ፤ ታኒ ኦሊዳይ ሃይሳ፤

21 ዲኤቲ ዪዳ ሚሻ ጊዶፌ ታኒ ኢሲ ሎኢዛ ሳናኦሬ ካባ፡ ናምኡ ጾቱ ሳቂሌ ቢራኔ ባጋ ኪሎ ጊዲዛ ዋርቃ ቤአዳ አሞቲዳ ጊሻሰ ኤካዲሰ። ሂሰታዳ ታ ዲንካኔ ጊዶን ቦካዳ ቢራ ጋርሳራ ሂጸ ሞጋዲሰ» ጊዴሰ።

22 ሂሰቲን ኢያሶይ አሰ ኪቲዴሰ፤ ኢሰቲ ኢዛ ዲንካኔኮ ዋጺ ቢዲ ቢራዚ ጋርሳራ ሂጸቲ ሃንኮ ሚሻታራ ሞጌቲዳይሳ ዴሚዳ።

23 ኪቲቲ ቢዳ አሳቲ ሚሻ ዲንካኔዛ ጊዶፌ ኤኪዲ፡ ኢያሶኮኔ ኢሰራኤል አሳኮ ኤሂዲ ጎዳ ሲንላን ዋሊዳ።

24 ሄሳፌ ጉዬ ኢያሶይኔ ኢሰራኤል አሳይ ኡባይ ኢሲፌ ዛራሄሰ ናዛ ና ካርሜ ና አካኔ፡ ቢራ፡ ካባ፡ ዋርቃ፡ ኢዛ አቱማ ናይታኔ ማጫ ናይታ፡ ኢዛ ሚዛ፡ ሃሬታኔ ዶርሳታ፡ ኢዛ ዲንካኔኔ ኢዛሰ ዲዛይሳ ኡባ ኤኪዲ አኮሬ ዙሌ ኤሂዴሰ።

25 ኢያሶይ አካኔ፡ «ሃይሳ ማላ ሜቶ ኑ ቦላ አይሰ ኤሃዲ? ጎዳይ ሃቾ ኔ ቦላካ ሜቶ ኤሃና» ጊዴሰ።

ሂሰቲን ኢሰራኤል አሳይ ዉሪ አካኔኔ ኢዛ ሶ አሳ ሹቻን ኩራኪ ዋጲዲ ኢዛሰ ዲዛ ኡባ ታማን ጽጊዴሰ።

26 ኢስቲ እካኔ ቦላን ሃች ጋካናስ ዲዛ ዳሮ ሹች ኮሪዳ። ሄሳፌ ጉዬ ጎዳይ ያሺሲዛ ባ ሃንቆዛ ዛሪዴስ፤ ሄሳ ጊሻስ ሃች ጋካናስ ሄ ሶሆይ እኮሬ ዙሌ ጌቴቴስ። \*

## 8

### እዬ ካታማ ጸኔቴል

1 ጎዳይ ኢያሱስ፡ «ያዮፋ፤ ዳጋሞፋ! ኦላንቻታ ኡባ ኔናራ ኤካዳ፡ እዬ ካታማ ባዳ ኦላ። ሄኮ እዬ ካታማ ካዎ፡ ኢዛ ዴራ፡ ኢዛ ካታማኔ ኢዛ ቢታ ታኒ ኔ ኩሼን አላ ኢማዲስ።

2 ኔኒ ኢያርኮ ካታማኔ ኢዛ ካዎዛ ቆይሲዳ ማላ እዬ ካታማኔ ኢዛ ካዎዛዛ ቆይሳና። ጊዶ አቲን ቦንቂዳ ሃርዛኔ ዲኢዳ ሜሄዛ ኢንቴስ ኤኪቴ። ካታማፔ ጉዬ ባጋራ ዛማዲ ናጊዛ ኦላንቻታ ዋላ» ጊዴስ።

3 ሂስቲን ኢያሶይኔ ኦላንቻቲ ኡባይ እዬ ኦላናስ ዴንዲዳ። ኢያሶይ ባ ኦላንቻታ ጊዶፌ 30,000 ጊዲዛ ሚኖ ኦላንቻታ ዶሪዲ ቃማራ ዬዲዴስ።

4 ኢያሶይ ኢስታስ፡ «ሰዪቴ፡ ካታማፔ ጉዬ ባጋራ ዛማዲ ናጊቴ፤ ካታማፔ ሃኮፍቴ፤ ኡባይካ ሚኒ ናጊቴ።

5 ታኒኔ ታናራ ዲዛ አሳ ኡባይ ካታማይኮ ሺቃና፤ ሄ ዎዴ እዬ ካታማ አሳይ ካሴይሳዳካ ኑናራ ኦሌታና ጊዲ ኑኮ ኬዚሺን ኑኒ ኢስታፌ ባቃታና።

6 ካታማፔ ኢስቲ ኡባይ ኬዛና ጋካናስ ኑኒ ኢስታ ሲንፋፌ ባቃታና፤ ሂስቲዳ ማላ ኢስታስ፡ «ካሴይሳዳ ኢስራኤሌቲ ኑ ሲንፋፌ ባቃቴቴስ» ጊሼ ኑ ኢስታ ካሌዲዲ ሃሲ ኤፋና ጋካናስ ኢስቲ ኑና ካላና፤ ኑኒካ ኢስታፌ ባቃታና።

7 ሄ ዎዴ ኢንቴ ቆቴቲዳሶፔ ኬዚዲ ካታማኖ ኦይካንዴታ፤ ጎዳ ኢንቴ ጸሳይ ካታማኖ ኢንቴስ አሏ ኢማና።

8 ካታማኖ ኦይኪዳፔ ጉዬ ጎዳይ አዛዚዳ ማላ ታማን ጸጊቴ፤ ቤአቴ ታኒ ኢንቴና አዛዛዲስ» ጊዴስ።

9 ሂስቲዲ ኢያሶይ ኦላንቻታ ዬዲዴስ፤ ኢስቲ ቢዲ እዬ ካታማፔ አርሼይ ዉሊዛሶ ባጋራ ዲዛ ቤቴሌሲኔ እዬስ ጊዶን ዛማዲ ናጊዳ፤ ጊዶ አቲን ኢያሶይ ሄ ጋላሳ ኦማርስ አሳራ ኢሲፌ አቂዴስ።

\* 7:26 እኮሬ ዙሌ ጉሲ ሜቶ ዙሌ ጉሳ።

10 ኢያሱ ወንጌላ ጋላስ ወንጌላ ደንዲዲ ኦላንቻታ ኡባ ሺሺደስ፤ ኢዚኔ ኢስራኤል ጋዳዋቲ ኦላ ኣሳ ካሌሊዲ ኣዬ ቢዳ።

11 ኢዛራ ዲዛ ኦላንቻቲ ኡባይ ካታማይስ ሲንሐ ቢ ማቲዳ፤ ሄሳፌ ጉዬ ቃሴ ኣዬ ካታማፔ ፑዴሃ ባጋራ ዲዛ ሾባፌ ሄ ፒንላን ዲንካኒዳ።

12 ኢያሱይ 5,000 ጊዳና ኦላንቻታ ኤኪዲ ካታማይፔ ኣርሼይ ዉሊዛ ባጋራ ቤቴሌፔኔ ኣዬፔ ጊዳን ዛማዲ ኡታና ማላ ኦሊደስ።

13 ካታማይፔ ፑዴሃ ባጋራ ዲዛ ኦላንቻታኔ ካታማይፔ ኣርሼይ ዉሊዛ ባጋራ ዛማዲ ኡቲዳ ኦላንቻታ ኡባ ሶሆ ሶሆ ኦይሊደስ። ሄ ጋላሳ ኦማርስ ኢያሱይ ዲጌ ሾባ ዋዲደስ።

14 ኣዬ ዴሬ ካዋይ ሄሳ ቤኢዲ ኢዚኔ ኢዛ ኦላንቻቲ ኡባይ ኢስራኤል ኣሳ ኦላናስ ኣራቤፔ ሲንላ ባጋራ ዲዛሶሆ ዪዳ። ጊዳ ኣቲን ካዋዚ ካታማይፔ ጉዬ ባጋራ ዛማዲ ናጊዛይቲ ዲዛይሳ ኤሪቤና።

15 ኢያሱይኔ ኢስራኤል ኣሳይ ኡባይ ጸኔቲዳ ሚሳቲዲ ባዞ ሲሚ ባቃቲዳ።

16 ኣዬ ኣሳይ ኡባይ ኢስታ ዬዴላናስ ጴጌጌቲዳ፤ ኢያሱካ ዬዴሊዳ፤ ሄሳላ ኦሊዲ ኣዬ ኣሳይ ካታማፔ ሃካና ማላ ኦሊዳ።

17 ኢስራኤል ኣሳ ዬዴላናስ ኣዬፔኔ ቤቴሌፔ ኬዞንታ ኣቲዳ ኣቱማሲ ዴና፤ ካታማዮ ዶያ ዬጊዲ ኢስራኤል ዬዴሊዳ።

18 ሄሳፌ ጉዬ ጎዳይ ኢያሱስ፡ «ካታማዮ ታ ኔ ኩሼን ኣላ ኢማና፤ ኔ ኦይኪዳ ቶራ ኣዬ ቦላ ጸንጋናስ ማላ ጴላ» ጊደስ። ሂስቲን ኢያሱይ ባ ቶራ ካታማኮ ዛሪዲ ማሊደስ።

19 ኢያሱይ ቶራ ሄ ዛሪ ማሊዳ ማላ ካሴ ዛማዲ ኡቲዳ ኦላንቻቲ ባንቲ ቆቲቲዳሶፔ ኤሶን ኬዚዳ። ዋጺ ጌሊዲ ኦይኪዳ፤ ሄራካ ኢዞ ታማን ጸጊዳ።

20 ኣዬ ኣሳይ ጉዬ ሲሚዲ ጴሊሺን ካታማይፔ ጨዋይ ሳሎ ኬዚዛይሳ ቤኢዳ። ባዞ ባቃቲዳ ኢስራኤል ኣሳይ ኢስታ ቦላ ሃ ሲሚ ዋዲዳ ጊሻስ ኢስታስ ቢዛሶይ ጳይደስ።

21 ኢያሱይኔ ኢስራኤል ኣሳይ ኡባይ ዛማዲ ኡቲዳ ኦላንቻቲ ካታማ ኦይኪዳይሳኔ ጨዋይ ሳሎ ኬዚዳይሳ ቤኢዳ ማላ ጉዬ ሲሚዲ ኣዬ ኣሳ ቦላ ሜቶ ዬጊዳ።

22 ዛማዲ ኡቲዳ ኦላንቻቲካ ካታማይፔ ኢስታ ቦላ ኬዚዳ። ሄሳ ጊሻስ ኢስራኤል ኦላንቻቲ ኢስታ ያራ ሃራ ጊደሊዲ ዲፒ ሂስቲዳ፤ ኢሲ ኣሲካ ኣቲቤና።

23 ጊዳ ኣቲን ኣዬ ካዋ ጸላ ሼምፖራ ፓጻ ኦይኪዲ ኢያሱኮ ኤሂዳ።

24 ኢስራኤል አሳይ አዩ አቱማ አሳ ኡባ ዩዳሊዳ ዴሞባኒኔ ባዘን ኢሳ ኢሳ ቃራ ማሻን ዋጂ ወርሲዳፔ ጉዬ ሲሚዲ ካታማዮ ቢዲ ሄን ቤቲዳ አስ ኡባ ዋጂዳ።

25 ሄ ጋላስ አዩ አሳይ ኡባይ ሃይቂዳስ፤ ሃይቂዳ አሳ ኡባ ቆዳይ 12,000 ጊዲዳስ።

26 ኢያሱይ አዩ ካታማይን ዲዛ አሳ ሙሌራ ቆይሳና ጋካናስ ካታማኮ ማሊ ዋሊዳ ቶራ ዲጌ ዋሊቤና።

27 ጊዶ አቲን ጎዳይ ኢያሱ አዛዚዳ ማላ ኢስራኤል አሳይ ሄ ካታማይን ዲዛ ሜደሳታኔ ዲኢዳ ሚሻታ ባስ ኤኪዳ።

28 ኢያሱይ አዩ ካታማ ጸጊዳስ፤ ሃች ጋካናስ ቤቲዛ ማላ ሜርናስ ቢዲንሳ ዶሬኔ ቡላ ኬሲዳስ።

29 አዩ ዴሬ ካዎ ሚሳ ቦላ ካቂዳስ፤ ኢዛ አሃዛ ኦማርስ ጋካናስ ሄ ሚሳ ቦላ አጋጊዳስ፤ አርሼይ ወሊሺን ኢያሱይ ኢዛ አሃ ካታማ ፔንጌ ቦላ ዩጋና ማላ አዛዚዳስ፤ ኢዛ ቦላ ዳር ሹች ኮሪዳ፤ ሹቻይ ሃች ጋካናስ ሄ ሶሆን ዳስ።

**ኤባሌ ዙማ ቦላ ኦሪዲዳ ጫቆ ቃላ**

30 ሄሳፌ ጉዬ ኢያሱይ ኤባሌ ዙማ ቦላ ጎዳስ ኢስራኤል ጸሳስ ያርሾ ያርሺዛሶሆ ገግሲዳስ።

31 ጎዳ አይሌ ሙሴይ ኢስራኤል አሳ አዛዚዳ ማላኔ ሙሴ ዋጋ ማጻፋን ጸፊቲዳ ማላ ያርሺዛሶሆዚ ማሴቶንታኔ ቢራታይ ቦቾንታ ሹቻፌ ኬሌቲዳስ። ኢዛን ጎዳስ ጸጌቲዛ ያርሾኔ ኢሲፌቴላ ያርሾ ያርሺዳ።

32 ኢያሱይ ሙሴይ ጸፊዳ ዋጋ ማጻፋ ኢስራኤል አሳይ ጸሊሺን ሹቻ ቦላ ዋጪ ጸፊዳስ።

33 ኢስራኤል አሳይ ኡባይ፣ ቤቲ አሳቲ፣ ጨማቲ፣ ሹሜቲኔ ዳናቲ ኡባይ ጎዳ ጫቆ ቃላ ታቦታ ቶኪዳ ለዌ ዛሬ ጊዲዳ ቄሴታ ሲንላን ጫቆ ቃላ ታቦታፔ ኡሻቻ ባጋራኔ ሃዴርሳ ባጋራ ኤቂዳ። ጎዳ አይሌ ሙሴይ ካሴ አዛዚዳ ማላ ኢስራኤል አሳ አንጃናስ ኢስታፌ ባጋ አሳይ ጋሪዛኔ ዙማኮ፣ ባጋ አሳይ ኤባሌ ዙማኮ ሲሚ ኤቂዳስ።

34 ሄሳፌ ጉዬ ዋጋ ማጻፋን ጸፊቲዳ ማላ ኢያሱይ ዋጋ ቃላ አንጃኔ ቃንጌላ ኡባ ናባቢዳስ።

35 ሙሴይ አዛዚዳ ኡባፌ ኢያሱይ ናባቢንታ ኦጊዳ ኢሲ ቃላይካ ዳና። ኩሜላ ኢስራኤል ዴራስ፣ ማጫሳስ፣ ናይታሲኔ ኢስታ ጊዶን ዲዛ ቤቲ አሳታስ ኡባስ ናባቢዳስ።

# 9

## ጌባኦኔ አሳይ ኢያሱ ባሌሊዳ ባሌላ

<sup>1</sup> ዮርዳኖሴ ሻፋፔ አርሼይ ወሊዛ ባጋራ ፑዳ ጌዜን ዲዛ ዳሬይ፡ ጋጃን ዲዛ ዳሬይ ሊባኖሴ ጋካናሰ ዲዛ ጌታ አባ ጋጃን ዲዛ ሂቲታ፡ አሞሬታ፡ ካናኔታ፡ ፓሪዜታ፡ ሂዌታኔ ያቡሴታ ካዎቲ ኡባይ ኢሰራኤል አሳይ ጸኒዳይሳ ሲዪዳ።

<sup>2</sup> ሂስቲዲ ኢያሶኔ ኢሰራኤል አሳ ኦላናሰ ኢሲ ቦላ ዴንዲ ዪዳ።

<sup>3</sup> ጌባኦኔ አሳይ ጌዲኮ ኢያሶይ ኢያርኮ ካታማኒኔ አዬ ካታማን ኦሊዳይሳ ሲዪዳ ዎዴ፡

<sup>4</sup> ባሌላናሰ ኮዪዲ ጋልኣ ኦጎርኔ ዎይኔ ኡሹ ኢዛን ዎሊዛ ሲኬቲዳ ሉካዎ ሃሬን ጫኒዳ።

<sup>5</sup> አሳቲ ጋልኣኔ ሲኬቲዳ ጫማ አሊዳ፤ ጋልኣ ማይኦካ ማይኢዳ፤ ማሊዲ ቡቂዳ ሺንቄ ኦይኪዳ።

<sup>6</sup> ሃሳፌ ጉዬ ኢሰቲ ኢያሶይ ዱንካኒዳሶ ጌልጌላ ቢዲ ኢያሶሲኔ ኢሰራኤል አሳሰ፡ «ኮኒ ሃሆ ቢታፌ ዪዶሰ፤ ሃኢ ኮናራ ጫቂቲቱ» ጌዳ።

<sup>7</sup> ኢሰራኤል አሳይ ሂዌታሰ፡ «ኢንቲ ኑ ማታን ዲዛ አሳኮ ኑ አይ ኤሪዲ ኢንቲናራ ጫቂታኔ?» ጌዳ።

<sup>8</sup> ኢሰቲ ኢያሶሰ፡ «ኮኒ ኔ አይሌታ» ጌዳ።

ኢያሶይ፡ «ኢንቲ ኦኔ? አዎፔ ዪዳቲ?» ጌዲ ኦይቺዳሰ።

<sup>9</sup> ኢሰቲካ፡ «ኮኒ ኔ አይሌቲ ጎዳ ኔ ጸሳ ጌታቱላ ሲዪዲ ዳሮ ሃሆ ቢታፌ ዪዶሰ። ኢዛ ጌታቱላኔ ኢዚ ጌብጾ ቢታን ኦሊዳይሳ ኡባ ሲዪዶሰ።

<sup>10</sup> ቃሴ ዮርዳኖሴ ሻፋፔ ሄ ፒንፋን ዲዛ አሞሬ ካዎታ ናሞኣታ፡ ሄይቲካ ሃሴቦኒ ካዎ ሲሆኔ፡ አሰታሮቲ ሃሪዛ ባሳኔ ካዎ ኣጌ ቦላ ኢዚ ኦሊዳይሳካ ኑ ሲዪዶሰ።

<sup>11</sup> ኑ ዳሬ ጨማቲኔ ኑ ቢታን ዲዛ አሳይ ኡባይ ኑና፡ ኢንቲሰ ኦጌ ሺንቄ ኦይኪዲ ኢሰታራ ቢዲ ጋይቲቲ፤ ኢሰታሰ፡ «ኮኒ ኢንቲሰ አይሌታ ጌዳና፤ ኢንቲ ኑናራ ጫቂቲቱ» ጌዳ።

<sup>12</sup> «ኮኒ ኢንቲኮ ያናሰ ኑ ሶፔ ሃይሳ ሺንቄዚ ሆኑ ዲሺን ኤኪ ዪዶሰ፤ ጌዶ አቲን ማሊዳይሳኔ ቡቂዳይሳ ሃይሳ ቤኢቲ!

<sup>13</sup> ሃይቲ ኡሳ ሉካሞቲ ኮኒ ኩንሊዛ ዎዴ ኦራላ፤ ጌዶ አቲን ሃኢ ኢሰቲ ዋኒ ዳኬቲዳኮ ቤኢቲ! ኑ ሃሆ ኦጌ ሄማቲዳ ጌሻሰ ኑ ማይኦይኔ ጫማይ ወሪዳሰ» ጌዳ።

14 ጎዳ ኦይቸንታ ኢሰራኤል ኣሳይ ኢስታ ሺንቄፌ ጉፋራ ኤኪዴስ።

15 ኢያሱይ ኢስቲ ሳሮን ዴኣና ማላ ኢስታራ ጫቄቲዴስ፤ ዴራ ካሌሊዛይቲካ ሄ ጫቆዛ ሚንፋናስ ቃላ ጌሊዳ።

16 ኢስታራ ጫቄቲዳ ሄሸንፉ ጋላሳፌ ጉዬ ሄ ኣሳቲ ኢስታ ዶል ጊዲዳይሳ ኢሰራኤሌቲ ሲዪዳ።

17 ኢሰራኤሌ ኣሳይ ሄሸ ጋላስ ሄሜቲዲ ጌባኦኔ፥ ካፊፊ፥ ቢኤርቴኔ ቂሪያቴ-ዪኣሪሜ ጌቲቲዛ ካታማታ ጋኪዴስ።

18 ጊዲኮካ ዴራ ካሌሊዛይቲ ጎዳ ኢሰራኤሌ ጸሳ ሱንፋን ጫቂዳ ጊሻስ ኢሰራኤሌቲ ኢስታ ኦሊቤቴና፤ ኩሜፋ ማባራይካ ኢስታ ቦላ ዙዙሚዴስ።

19 ጊዶ ኣቲን ዴራ ካሌሊዛይቲ፥ «ኦኒ ጎዳ ኢሰራኤሌ ጸሳ ሱንፋን ጫቂዳ ጊሻስ ሃኢ ሲሚዲ ኢስታ ቦላ ሜቶ ጋፋናስ ዳንዳዮኮ።

20 ኦኒ ኢስታስ ኦፋና ዳንዳይዛይ ኢስታስ ጌሊዳ ጫቆ ቃላ ሜንሊን ሃንቆይ ኦ ቦላ ጋኮንታ ማላ ኢስታ ዎጵፒቴ።

21 ጊዶ ኣቲን ኢስቲ ኩሜፋ ማባራስ ሚል ሚጺሼኔ ሃል ዱቂሼ ዴቶ» ጊ ዛሪዳ። ሄሳ ጊሻስ ማባራ ካሌሊዛይቲ ጌሊዳ ቃላይ ናጌቲዴስ።

22 ኢያሱይ ጌባኦኔ ኣሳታ ጶይጊዲ፥ «ኢንቴ ሃን ኦ ማታን ዴኢሼ፥ ሓኒ ኬሂ ሃሆ ቢታፌ ዪዶስ» ጊዲ ኣይስ ኦና ባሌሊዴቲ?

23 ሄሳ ጊሻስ ሃኢ ኢንቴ ቃንጌቲዳይታ፤ ጉፋቲ ታ ጎዳ ኬፋን ሚል ሚጺዛኔ ሃል ዱቂዛ ኣይሌታ ጊዳና» ጊዴስ።

24 ኢስቲ ኢያሱስ፥ «ኦኒ ኔ ኣይሌቲ ጎዳ ኔ ጸሳይ ሃ ቢታ ኡባ ኢንቴስ ኢማናይሳኒ ኢዛን ዲዛ ኣሳ ኡባ ኢንቴ ሲንፋፌ ጳይሳናስ ባ ኣይሌ ሙሴ ኣዛዚዳይሳ ጌሺ ሲዪዶስ። ሄሳ ጊሻስ ኢንቴፌ ዴንዶይሳን ኦ ሹምፖስ ሂርጊዲ ሃይሳ ኦሊዶስ።

25 ሄኮ ሃኢ ኦኒ ኔ ኩሼን ዶስ፤ ኔስ ሎኦኔ ሱፊ ሚሳቲ ቤቲዳ ማላ ኦ ቦላ ኦፋ» ጊ ዛሪዳ።

26 ሂሰቲን ኢያሱይ ጌባኦኔ ኣሳታ ኢሰራኤሌታ ኩሼፔ ኣሺዴስ፤ ኢስቲካ ዎጲቤቴና።

27 ሄ ጋላስ ኢያሱይ ጌባኦኔ ኣሳታ ኢሰራኤሌ ማባራሲኔ ጎዳይ ዶሪዳሶሆን ኤቂዳ ያርሾዞዛስ ኢስቲ ሃኝ ጋካናስ ሚል ሚጸናሲኔ ሃል ዱቃና ማላ ኦሊዴስ።

# 10

## አርሼ ኤቆ

<sup>1</sup> ኢያሱይ ካሴ ኢያርኮ ካታማ ኦሊ ዳይሲዲኔ ኢስታ ካዋዛ ዋዲዳ ማላ፡ አዬ ካታማ ኦሊዲ ኡባ ዳይሲዲይሳኔ ኢስታ ካዋዛካ ዋዲዳይሳ ዩሩሳላሜ ካዋ አዶኒ-ጸዴቄይ ሲዩዴሰ። ቃሴ ጌባኦኔ አሳይ ኢሰራኤሌ አሳራ ሳርን ዴአናሰ ጫቄቲዳይሳኔ ሃኢ ኢስታራ ኢሲፌ ዲዛይሳ ሲዩዴሰ።

<sup>2</sup> ሄሳን ኢዚኔ ዴሬዚ ዳጋሚዳ፤ ጋሶይካ ጌባኦኔይ ካዋታ ካታማ ማላ ካታማታ ኡባፌ ጌታ ካታማ፤ ጎሞፓይ አዬ ካታማይፔ ዳሬሰ፤ ኢዚን ዲዛ አሳይካ ሚኖ ኦላንቻ።

<sup>3</sup> ሄሳ ጌሻሰ ዩሩሳላሜ ካዋይ አዶኒ-ጸዴቄይ፡ ኩብርኔ ካዋ ሆሃሚሰ፡ ያርሙቲ ካዋ ጲርአሚሰ፡ ላኪሼ ካዋ ያፊአሲኔ ኤጊሎኔ ካዋ ዳቢሬይ።

<sup>4</sup> «ጌባኦኔ ካታማ አሳይ ኢያሶራኔ ኢሰራኤሌ አሳራ ሳር ዴያናሰ ጫቄቲዳ ጌሻሰ ኢስታራ ኦሌታናሰ ዩዲ ታና ማዴርኬቲ!» ጌዴሰ።

<sup>5</sup> ሄሳፌ ጉዬ አሞሬታ ካዋቲ ኢቻሻቲ ዩሩሳላሜ ካዋይ፡ ኩብርኔ ካዋይ፡ ያርሙቲ ካዋይ፡ ላኪሼ ካዋይኔ ኤጊሎኔ ካዋይ ባ ኦላንቻታ ኢሲፌ ጋሊዲ ኡባ ኤኪ ቢዲ፡ ጌባኦኔ ካታማ ዶዲ ኦይኪዲ ኦሊዳ።

<sup>6</sup> ጌባኦኔ አሳይ ጌልጌላን ዱንካኒዳ ኢያሶኮ ከቲዲ፡ «ኦና ኔ አይሌታ አጎፋ፤ ኤሶን ኦኮ ያዳ ኦና አሻ። ጌዜ ዴሬን ዲዛ አሞሬታ ካዋቲ ዉሪ ኦና ኦላናሰ ባ ኦላንቻታ ኡባ ሺሺ ኤኪዲ ዩዛ ጌሻሰ ኦና ኔ አይሌታ ማዳ» ጌዳ።

<sup>7</sup> ሄሳ ጌሻሰ ኢያሶይ ባ ኦላንቻታኔ ሚኖ አሳታ ኡባ ሺሺ ኤኪዲ ጌልጌላፔ ኬዚዴሰ።

<sup>8</sup> ጎዳይ ኢያሶ፡ «ኔ ኢስታሰ ያዮፋ፤ ታኒ ኢስታ ኔ ኩሼን አላ አማዲሰ፤ ኢስታፌ ኢሳዴይካ ኔናራ ኤቄታናሰ ዳንዳዬና» ጌዴሰ።

<sup>9</sup> ሄሳፌ ጉዬ ኢያሶይ ጌልጌላፔ ኦማርሳራ ሄማቲሼ አቀዲ ኢስቲ አኬኮንታ ዲሺን ኢስታ ቦላ ዋራጂዴሰ።

<sup>10</sup> ጎዳይ ኢሰራኤሌ አሳ ሲንላን አሞሬታ ቦላ ሺሮ ዩዲዴሰ፤ ኢሰራኤሌ አሳይ ኢስታፌ ዳር አሳ ጌባኦኔን ዋዲዴሰ። ኢሰራኤሌ አሳይ ኢስታ ቤቲ-ሆርኔ ኤፊዛ ኦጌ ፑዴንላን ካሊዴሰ፤ አዜቄፔ ቢዲ ማቄዳ ጋካናሰ ዩዴሊ ዋዲዳ።

<sup>11</sup> ቤቲ-ሆርኔፔ ዱጌ አዜቄ ኤፊዛ ኦጌ ኦይኪዲ ኢስቲ ኢሰራኤሌ አሳ ሲንላፌ ባቃቲሺን ጎዳይ ዋልቃማ ሻቾ ሳሎፔ

ኢስታ ቦላ ቡኪሲደስ። ሂስቲን ኢስራኤል ኣሳይ ማሻን ዎዲዳ ኣሳፔ፡ ሻቻይ ዎዲዳ ኣሳይ ኬሂፔ ዳሮ።

12 ጎዳይ ኣሞሬታ ኢስራኤል ኣሳ ኩሼን ኣሉ ኢሚዳ ጋላስ ኢስራኤል ኣሳ ሲንፋን ኢያሶይ ጎዳስ፡

«ኣርሼይ ጌባኦኔን ኤቆ፤

ኣጊናይካ ኣያሎኔ

ሾባን ኤቆ» ጌደስ።

13 ሄሳ ጊሻስ ኢስራኤል ካዎቲላይ ባ ሞርኬታ ቦላ ሃሎ ኬሳና ጋካናስ ኣርሼይ ኤቂደስ። ኣጊናይካ ቃጸቤኩ። ሄሲካ ያሻሬ ማጽፋን ጸፊቲደስ፤ ኣርሼይ ሳሎስ ጊዶ ኣዳን ኤቂደስ፤ ኢሲ ጋላስ ኩሚል ኣርሼይ ዉሎንታ ፔኢደስ።

14 ጎዳይ ኣሳ ቃላ ሲዪዳ ሄሳ ማላ ጋላሲ ሄሳፊ ካሴካ ጉዬካ ሃኒቤና። ቱሙካ ጎዳይ ኢስራኤል ጊሻስ ኦሌቲደስ።

15 ሄሳፊ ጉዬ ኢያሶይኔ ኢስራኤል ኦላንቻቲ ኡባይ ባ ዱንካኒዳሶ ጌልጌላ ሲሚዳ።

### ኣሞሬ ካዎታ ኢቻሻታ ሃይቆ

16 ሄ ዎዴ ኣሞሬታ ካዎቲ ኢቻሻቲ ባቃቲ ቢዲ ማቄዳን ጎንጎሎ ጊዶን ቆቲቲዳ።

17 ኢያሶይካ ኢቻሽ ካዎቲ ማቄዳን ጎንጎሎ ጊዶን ቆቲቲ ዲዛይሳ ሲዪደስ።

18 ኢያሶይ፡ «ጊታ ሹቻታ ጌንዴሪሲ ኤፊዲ ጎንጎሎዛ ጎርዲቲ፤ ሂስቲዲ ናጋና ዛቤታ ሄን ዎሊቲ።

19 ኢንቲ ሞርኬታ ዬዴሊቲ ኣቲን ኣዛሎፍቲ፤ ኢስታ ካሊ ካሊ ሜቶ ጋሊቲ፤ ኢስቲ ባ ካታማ ቢ ጌሎንታ ማላ ዲጊቲ፤ ሄኮ ጎዳ ኢንቲ ጸሳይ ኢስታ ኢንቲ ኩሼን ኣሉ ኢሚደስ» ጌደስ።

20 ሄሳ ጊሻስ ኢያሶይኔ ኢስራኤል ኣሳይ ኢስታ ሙሌራ ዲፒ ሂስቲዳ፤ ኢስታፊ ኣቲዳ ጉላቲ ካሴ ባ ዲዛ ጊሞቤቲዳ ካታማታ ሲሚ ጌሊዳ።

21 ሄሳፊ ጉዬ ኣሳይ ኡባይ ሳሮን ሲሚዲ ኢያሶይ ዱንካኒ ዲዛሶ ማቄዳ ዪደስ፤ ኢስራኤል ኣሳ ቦላ ኢሲ ቃላካ ሃሳይዳ ኣሲ ደና።

22 ኢያሶይ ኢስታስ፡ «ጎንጎሎዛ ደይዲ ሄ ኢቻሽ ካዎታ ኬሲዲ ታስ ሃ ኤኪ ዪቲ» ጌደስ።

23 ኢስቲካ ሄ ኢቻሽ ካዎታ ዬሩሳላሚ ካዎ፡ ኬብሮኔ ካዎ፡ ያርሙቲ ካዎ፡ ላኪሼ ካዎኔ ኤጊሎኔ ካዎ ኬሲዲ ኢዛኮ ኤሂዳ።

24 ኢስቲ ሄ ካዎታ ኢያሱኮ ኤሂን ኢያሶይ ኢስራኤል አቱማ አሳ ኡባ ባኮ ደይጊዲ ባናራ ዲዛ ኦላ ጋዳዎታ፡ «ሃ ዪዲ ሃይታ ካዎታ ቆዴ ቦላ ዬዲ ኤቂቲ» ጊዴስ። ኢስቲካ ሲንሐ አዲዲ ባ ቶሆን ካዎታ ቆዴ ቦላ ዬዲ ኤቂቲ።

25 ኢያሶይካ ኢስታስ፡ «ባቦፍቲ፤ ዳጋሞፍቲ፤ ሚኒቲኔ ጸለቲ፤ እንቴናራ ኦሌቲዛ እንቴ ሞርኬታ ኡባታ ቦላ ጎዳይ ሃይሳቶ ኦፋና» ጊዴስ።

26 ሄሳፌ ጉዬ ኢያሶይ ኢቻሽ ካዎታ ዎዲዲ ኢቻሽ ሚላ ቦላ ኢስታ አሃ ካቂዴስ፤ ኦማርሲ ጋካናስ ኢስታ አሃይ ሚላ ቦላፌ ዎዲቤና።

27 አርሼይ ወላና ሃኒሺን ኢያሶይ አዛዚን ሚላ ቦላፌ ካዎታ አሃ ዎሒዲ ካሴ ኢስቲ ቆቴቲዳ ጎንጎሎዛን ኤፊ ዬጊዳ። ሂስቲዲ ጎንጎሎዛ ጊታ ሹቻታን ቱጨዳ፤ ሄ ሹቻቲ ሃቶ ጋካናስካ ሄን ዴቲስ።

### ኢያሶይ ጸኒ ኦይኪዳ ሃራ ካታማታ

28 ሄ ጋላስ ኢያሶይ ማቂዳ ካታማ ኦይኪዴስ፤ ካታማዮኔ ኢዚ ካዎዛ ጊላ ማሻን ሲፊዴስ፤ ኢዚ ጊዶን ዲዛ አሳፔ ኢሲኖካ አሾንታ ዲሼ ዲፒ ሂስቲዴስ፤ ኢያርኮ ካዎ ቦላ ኦላዲይሳሶካ ማቂዳ ካዎ ቦላካ ኦላዴስ።

29 ሄሳፌ ጉዬ ኢያሶይኔ ኢዛራ ዲዛ ኢስራኤል አሳይ ኡባይ ማቂዳፌ ሊቢና ቢዲ ኦሊዳ።

30 ጎዳይ ሄ ካታማዮኔ ኢዚ ካዎዛ ኢስራኤል አሳ ኩሼን አላ ኢሚዴስ፤ ኢያሶይ ካታማዮኔ ኢዚ ጊዶን ዲዛ ኡባ ኢሲኖካ አሾንታ ጊላ ማሻን ዲፒ ሂስቲዴስ፤ ኢያርኮ ካዎ ቦላ ኦላዲይሳሶካ ሊቢና ካዎ ቦላካ ኦላዴስ።

31 ሄሳፌ ጉዬ ኢያሶይኔ ኢዛራ ዲዛ ኢስራኤል አሳይ ኡባይ ሊቢናፔ ላኪሼ ቢ ዶዲ ኦሊዳ።

32 ጎዳይ ላኪሼ ኢስራኤል አሳ ኩሼን አላ ኢሚዴስ፤ ኢያሶይ ሄ ካታማዮ ናሞኣንሶ ጋላሳን ኦይኪዴስ፤ ኢዚ ሊቢናን ኦላዲይሳሶካ ሃኖ ሃ ካታማዮኔ ኢዚ ጊዶን ዲዛ ኡባ ጊላ ማሻን ሲፊዴስ።

33 ሄ ዎዴ ጌዜሬ ካዎ ሆራሜይ ላኪሼ ካዎ ማዳናስ ዪዴስ፤ ጊዶ አቲን ኢያሶይ ኢዛካ ኢዛ አሳካ ኢሲኖ አሾንታ ኡባ ዲፒ ሂስቲዴስ።

34 ሄሳፌ ጉዬ ኢያሶይኔ ኢዛራ ዲዛ ኢስራኤል አሳይ ኡባይ ላኪሼፔ ኤጊሎኔ ቢዲ ሄ ካታማ ዶዲ ኦይኪ ኦሊዳ።

35 ሄ ጋላስ ኤጊሎን ኦሊ ኦይኪዲ ጊላ ማሻን ጳይሲዳ፤ ካሴ ላኪሼን ኦሊዳ ማላ ኤጊሎን ካታማን ዲዛ አሳ ሙሌራ ጳይሲዳ።

36 ሄሳፌ ጉዬ ኢያሶይን ኢዛራ ዲዛ ኢሰራኤሌ አሳ ኡባይ ኤጊሎን፤ ኬዚ ቢዲ ኬብሮን ኦሊዳ።

37 ሄ ካታማዮን ካታማይ ጊዶን ዲዛ ሚሽ ኡባ ኢሲኖካ አሾንታ ጊላ ማሻን ዲፒ ሂስቲዳ፤ ካሴ ኤጊሎን ኦሊዳ ማላ ሃኖ ካታማይ ጊዶን ዲዛ ኡባ ሙሌራ ዲፒ ሂስቲዳ።

38 ሄሳፌ ጉዬ ኢያሶይን ኢዛራ ዲዛ ኢሰራኤሌ አሳይ ኡባይ ጉዬ ሲሚዲ ዳቢሬ ኦሊዳ።

39 ካታማዮን ኢዚ ካዋዛ፤ ኢዚ ሄራን ዲዛ ቄሪ ካታማታካ ኡባ ጊላ ማሻን ሲፊዳ፤ ኢዚ ጊዶን ዲዛይሳፌ ኢሲኖካ አሾንታ ኡባ ዲፒ ሂስቲዳ፤ ካሴ ሊቢናኒን ሊቢና ካዋ ቦላ ኦሊዳ ማላ፤ ኬብሮን ቦላ ኦሊዳ፤ ካሳይ ሳዳካ ዳቢሬ ቦላን ኢዚ ካዋ ቦላ ኦሊዳ።

40 ሄሳፋካ ኢያሶይ ዙምቡላቲ ዳሪዛ ቢታ፤ ኔጌቤ፤ አርሼይ ወሊዛ ባጋራ ዲዛ ጋፋ ቢታ፤ ዙም ላዴታ፤ ቢታ ኡባ ካዋታራ ጋሊ ኦይኪዳ። ጎዳ ኢሰራኤሌ ጳሳይ አዛዚዳ ማላ ቢታ ቦላ ሽምጉራ ዲዛ ኡባ ዲፒ ሂስቲዳ፤ አይኮካ ሽምጉራ ፓጻ አሸቤና።

41 ኢያሶይ ኢስታ ቃዴሴ ባሪን፤ ቢዲ ጋዛ ጋካናስ፤ ቃሴ ጎሼን ቢታፌ ዶሚዲ ጌባኦን ጋካናስ ኡባ ጸኒ ኦይኪዳ።

42 ኢያሶይ ኢሲቶ ኦላ ኬዚዲ ሄ ካዋታን ኢስታ ቢታ ኡባ ጸኒዳ። ሄሲካ ሃኒዳይ ጎዳ ኢሰራኤሌ ጳሳይ ባ ዴራስ ኦሊቲዳ ጊሻሳ።

43 ሄሳፌ ጉዬ ኢያሶይን ኢሰራኤሌ አሳይ ኡባይ ባ ዱንካኒዳሶ ጌልጌላ ሲሚዳ።

## 11

### ፑዴሃ ባጋ ካዋታ ጸኔቴላ

1 ሃጸሬ ካዋ ያቢይ ኢሰራኤሌ አሳይ ጸኒዳይሳ ሲዬዳ ዋዴ፤ ሜዶን ካዋ ዮባቤስ፤ ሺሚሮን ካታማስ፤ አኪሻፌ ካዋስ ኪታ ዬዲዳ።

2 ሄሳፋካ ፑዴሃ ባጋራ ሻራ ሜንቶን ዲዛ ካዋታስ፤ ዱጌሃ ባጋን አራቤ ካዋታስ፤ አርሼይ ወሊዛ ባጋራ ዲዛ ጋፋ ካዋታሲን አርሼይ ወሊዛ ባጋራ ዶሬ ዙማን ዲዛ ካዋታስ ኪቲዳ።

3 ቃሴ አርሼይ ኬዚዛ ባጋራ ወሊዛ ባጋራ ዲዛ ካናኔታስ፤ አዋሬታስ፤ ሂቲታስ፤ ፓሪዜታስ፤ ሻራ ሜንቶን ዲዛ ያቡሴታሲን

ሚጸጸ ቢታን ሄርሞኔ ዙማፔ ጋርሳ ባጋራ ዲዛ ሂዌ ካዎታስ ከቲዴስ።

4 ሂስቲን ኢስቲ ባ ኦላንቻታ ኡባ ዴንጲዲ ዳሮ ፓራታኔ ፓራ-ጋሬታ ኢሲፌ ኢሰራኤል ኦላናስ ኤኪ ዪዳ። ኢስታስ ቆዳይ አባ ደናን ዲዛ አንጮ ማላ ጮራ።

5 ሄ ካዎቲ ዉሪ ኢሲፌ ባ ዎልቃ ሚንጲዲ ኢሰራኤል ኦላናስ ሜሮሜ ሃላ ማታን ዲንካኒዳ።

6 ጎዳይ ኢያሶስ፣ «ኔኒ ኢስታስ ባቦፋ! ታኒ ዎንቶ ሃኒ ዎዴ ኢስታ ኡባ ሃይቂዳ አሳ ማላ ሂስታ ኢሰራኤል ኩሼን አላ ኢማና። ኔኒ ኢስታ ፓራታ ኡባ ገልዳያና፤ ኢስታ ፓራ-ጋሬታካ ታማን ጹጋና» ገዴስ።

7 ሂስቲን ኢያሶይኔ ኢዛ ኦላንቻቲ ኡባይ ኢስቲ ቆፖንታ ዲሺን ሜሮሜ ሃላ ማታን ኢስታ ቦላ ፑቱ ገዲ ኢስታ ኦሊዳ።

8 ጎዳይ ኢስታ ኢሰራኤሌታ ኩሼን አላ ኢሚዴስ፤ ሂስቲን ኢሰራኤሌቲ ኢስታ ጸኒዲ ገታ ሲደና ቢታ ኤፊዛ ኦኔራ፣ ማሲራፎቲ-ማይማ ጋካናስ ቃሴካ አርሼይ ሞኪዛ ባጋራ ሚጸጸ ሾባ ጋካናስ ዬዴላዳ። ኢስታፌ ኢሲ አሲካ ሼምፖራ ፓጻ አቲቤና።

9 ኢያሶይ ጎዳይ ኢዛ አዛዚዳይሳ ኡባ ኢስታ ቦላ ፖሊዴስ፤ ኢስታ ፓራታካ ገልዳይዴስ፤ ኢስታ ፓራ-ጋሬታካ ታማን ጹገዴስ።

10 ሄ ዎዴ ኢያሶይ ጉዬ ሲሚዲ ሃጾሬ ካታማ ኦይኪዴስ፤ ሄ ካታማ ካዎዛካ ገላ ማሻን ሲፊዴስ፤ ሃጾሬ ካታማስ ሄ ዎዴ ዲዛ ካዎቲላታ ኡባ ቦላ አላፊቲላ ዴስ።

11 ሄ ካታማን ዲዛ አሳ ኡባ ገላ ማሻን ሲፊዳ፤ ሼምፖራ ፓጻ ዲዛ ኡባ ኢሲኖካ አሾንታ ዎዲዳ፤ ካታማኖካ ታማን ጹገዳ።

12 ጎዳ አይሌ ሙሴይ አዛዚዳ ማላ ኢያሶይ ሄ ካታማታኔ ኢስታ ካዎታ ኡባ ዳይሲዴስ፤ ገላ ማሻንካ ሲፊዴስ።

13 ገዲኮካ ኢያሶይ ሃጾሬ ካታማ ጹጎይሳፌ አቲን ኢሰራኤሌ አሳይ ዙማታ ቦላ ኬጾቲዳ ካታማታ ጹገቤና።

14 ኢሰራኤሌ አሳይ ሄ ካታማታፔ ቦንቂዳ ሚሽ ኡባኔ ሜሄ ኡባ ባንታስ ኤኪዳ፤ ገዶ አቲን አሳ ገላ ማሻን ዳይሲዳ፤ ሼምፖራ ፓጻ ዲዛ ኢሲኖካ አሺቤቲና።

15 ጎዳይ ባ አይሌ ሙሴ አዛዚዳ ማላ ሙሴይካ ኢያሶ አዛዚዴስ። ሂስቲን ኢያሶይካ አዛዘዛ ፖሊዴስ፤ ጎዳይ ሙሴስ አዛዚዳ ኡባፌ ኢዚ ኦላንታ አገዳ አይ ሚሺካ ዴና።

ኢያሶይ ኦይኪዳ ቢታ

16 ሄሳዳ ሂስቲዲ ኢያሶይ ሄ ቢታ ኡባ ጌዜ ቢታ፡ ኔጌቤ ቢታ፡ ጎሼኔ ቢታ፡ ኣርሼይ ዉሊዛሶ ባጋራ ዲዛ ጋዳኔ ኣራቤ ቢታ ቃሴካ ኢሰራኤሌ ጌዜኔ ጋዳ ኡባ ሺሺ ኦይኪዴሰ።

17 ሄሲካ ሴይሬ ጋካናሰ ዲዛ ሃላቄ ዙማፔ ቢዲ ሄርሞኔ ዙማፔ ዳንኤ ባጋራ ሊባኖሴ ዙሌን ባኣሊ-ጋዴ ጋካናሰ ዲዛ ቢታ ኡባ ጋኪዴሰ። ኢስታ ካዎታካ ኡባ ኦይኪዲ ዋዲዴሰ።

18 ኢያሶይ ዳር ዋዴ ሄ ካዎታ ኡባራ ኦሌቲሼ ጋሞኢዴሰ።

19 ጌባኦኔን ዲዛ ሂዌታፔ ኣቲን ሃራ ካታማይ ኢሶይኔ ኢሰራኤሌታራ ባርቲፋን ዴኣና ጫቄቲቤና፤ ኢሰራኤሌቲ ኡባታካ ኦሊ ኦይኪዲ።

20 ጎዳይ ሙሴ ኣዛዚዳ ማላ ኢያሶይ ኢስታስ ቃዴቶንታ ኡባ ዋዲዴሰ። ጋሶይካ ኢስቲ ኢሰራኤሌታራ ኦሌታና ማላ ጎዳይ ኢስታ ዋዚና ዳሚሲዴሰ።

21 ሄ ዋዴ ኢያሶይ ቢዲ፡ ጌዜ ቢታን ኬብርኔ ካታማን፡ ዳቢሬ ካታማን፡ ኣናቤ ካታማን፡ ዩሁዳኒኔ ኢሰራኤሌ ጌዜ ቢታ ኡባን ዲዛ ኤናቄ ዛሬታ ኡባኔ ኢስታ ካታማ ኡባ ዳይሲዴሰ።

22 ኢስታፊ ጉፋቲ ጸላ ጋዛን፡ ጌቲኒኔ ኣሽዶዴን ኣቲዳ፤ ጊዶ ኣቲን ኢሰራኤሌን ሽምፖራ ፓጸ ኣቲዳ ኤናቄ ዜሬላ ዳና።

23 ጎዳይ ሙሴ ኣዛዚዳ ማላ ኢያሶይ ቢታ ኡባ ኦይኪዴሰ፤ ሂስቲዲ ኢሰራኤሌ ኣሳሰ ኢስታ ቆሞን ቆሞን ሻኪ ኢሚዴሰ፤ ሄሳፊ ጉዬ ቢታይ ኦላፔ ሽምፕዴሰ።

## 12

### ሙሴይኔ ኢያሶይ ጸኒዳ ካዎታ

1 ኢሰራኤሌ ኣሳይ ዮርዳኖሴ ሻፋፔ ኣርሼይ ሞኪዛ ባጋራ ዲዛ ኣራቤ ቢታ ኡባ ኦይኪዲ ኣርኖኔ ዙሌራ ቢዲ ሄርሞኔ ዙማ ጋካናሰ ዲዛ ሄ ዴሬ ካዎታ ጸኒዲ ዋላ ኤኪዴሰ። ሄ ጸኔቲዳ ካዎቲ ሃይሳፊ ካሊ ጸፊቲዳይታ።

2 ሃሴቦኔ ካታማን ኡቲዲ ኣይሲዛ ኣሞሬታ ካዎይ ሲሆኔ። ኢዚ ኣርኖኔ ሾባ ላንቄን ዲዛ ኣርኤሬ ዙሌራ ካንላ ቢዲ ኣሞኔታ ዛዋ ያቦቄ ሻፋ ጋካናሰ ሃሪዴሰ፤ ሄሲ ጋላኣዴ ቢታፊ ባጋ ጉጂ ኤኬሰ።

3 ቃሴካ ኣርሼይ ሞኪዛ ባጋራ ዮርዳኖሴ ሾባፊ ቢዲ ጋለላ ኣባ ጋካናሰ፡ ቤቲ-ያሺሞቲ ባጋራ ቢዲ ማጺኔ ኣባፊ ዱጌሃ ባጋራ ዲዛ ፒዝጋ ዙማሰ ዳንኤ ባጋ ጋካናሰ ዲዛሶዛ ሃሪዴሰ።

4 አስታርቴኒኔ ኤዲራኤን ኡቲዲ ሃሪዛ ኤራፋይሜ ዜሬላታፔ ወርሴላ ቦላ ካዋቲዲይ ባሳኔ ካዋ ኣኼ።

5 ኢዚ ሄርሞኔ ዙማ፥ ሳላካ፥ ባሳኔ ቢታ ኡባ፥ ቢዲ ጌሹሬታኔ ማኢካቲ ዛዋ ጋካናሰ፥ ቃሴካ ጋላእዴ ቢታፌ ባጋ ኤኪ ቢዲ ሃሴቦኔ ካዋ ሲሆኔ ዛዋ ጋካናሰ ሃሪዴሰ።

6 ጎዳ አሽካራ ሙሴይኔ ኢሰራኤል አሳይ ሃ ካዋታ ጸኒዳ፤ ሂሰቲዲ ጎዳ አይሌ ሙሴይ ኢሰታ ቢታ ኦርቤሌ ቆዋታሰ፥ ጋዴ ቆዋታሲኔ ሚናሴ ቆዋታፔ ባጋይታሰ ጸንጾ ጊዳና ማላ ሻኪ ኢሚዴሰ።

7 ኢያሶይኔ ኢሰራኤል አሳይ ዮርዳኖሴ ሻፋፔ ኣርሼይ ወሊዛ ባጋን ዲዛ ካዋታ ኡባ ጸኒዳ። ሄይቲ ሃሪዛ ዛዋይ ሊባኖሴ ሾባን ዲዛ ባኣሊ-ጋዴፔ ዶሚዲ ሴይሬን ሃላቄ ዙማ ጋኬሰ፤ ኢያሶይ ሄ ቢታታ ሻኪዲ ኢሰራኤል ቆዋታሰ ጸንጾ ሂሰቲ ኢሚዴሰ።

8 ሄ ቢታቲ፥ ጌዜ ዴሬ፥ ኣርሼይ ወሊዛሰ ባጋን ዲዛ ዙምቡላታ ላዴ፥ አራቤ ዙማታ ላዴ፥ ባዞ ቢታኔ ኔጌቤ ቢታ። ሄ ቢታቲ ካሴ ሂቲቲ፥ አዋሬቲ፥ ካናኔቲ፥ ፓሪዜቲ፥ ሂዌቲኔ ያቡሴቲ ዴኢዛ ቢታ።

9 ኢሰራኤል አሳይ ጸኒዳ ካዋቲ ሃይሳፌ ካሊ ዲዛይታ፤ ኢያርኮ ካዋ፥ ቤቴሌ ማታን ዲዛ አዬ ካዋ፥

10 ዬሩሳላሚ ካዋ፥ ኬብሮኔ ካዋ፥

11 ያርሙቲ ካዋ፥ ላኪሼ ካዋ፥

12 ኤጊሎኔ ካዋ፥ ጌዜሬ ካዋ፥

13 ዳቢሬ ካዋ፥ ቤቲ-ጋዴራ ካዋ፥

14 ሆርማ ካዋ፥ አራዴ ካዋ፥

15 ሊቢና ካዋ፥ አዲላሚ ካዋ፥

16 ማቄዳ ካዋ፥ ቤቴሌ ካዋ፥

17 ታጵሄ ካዋ፥ ሄፌሬ ካዋ፥

18 አፌቄ ካዋ፥ ላሻሮኔ ካዋ፥

19 ሜዶኔ ካዋ፥ ሃጸሬ ካዋ፥

20 ሺሚሮኔ-ሚሮኔ ካዋ፥ አኪሻፌ ካዋ፥

21 ታኢናኬ ካዋ፥ ማጊዶ ካዋ፥

22 ቃዴሴ ካዋ፥ ቃርሜሎሴን ዲዛ ዮቂናአሚ ካዋ፥

23 ዙምቡላታ ቦላ ዲዛ ዶሬ ካዋ፥ ጌልጌላን ዲዛ ጎይሜ ካዋ፥

24 ቲርጸ ካዋ። ሄይቲ ኢሲ ቦላ 31 ካዋታ።

# 13

## ቡሮ ኦይኬቲቤና ቢታታ

<sup>1</sup> ኢያሱይ ጨሚን ኢዛስ ላይላይ ኬሂ ቢዳ ዋዴ ጎዳይ፥ «ኔኒ ኬሂ ጨማዳሳ፤ ላይላይካ ኔስ ኬሂ ቢዴስ፤ ጊዶ ኣቲን ቡሮ ኦይኬቶንታ ዳሮ ቢታይ ዴስ።

<sup>2</sup> ቡሮ ኦይኬቲቤና ቢታቲ ሃይታ፤ ፊሊስጶሜታ ቢታኔ ጌሹሬታ ቢታ ኡባታ።

<sup>3</sup> ጌብጾፔ ኣርሼይ ሞኪዛ ባጋራ ዲዛ ሺሆሬ ሻፋፔ ዶሚዲ፥ ፑዴሃ ባጋራ ዲዛ ኣቃሮኔ ዛዋ ጋካናስ ዲዛ ቢታቲ ወሪ ካናኔ ቢታ ማላ ቆዴቲቲስ። ኢቻሽ ፊሊስጶሜ ካዋቲ ሃሪዛ ካታማቲ ጋዛ፥ ኣሽዶዴ፥ ኣስቄሎና፥ ጌቲኔ ኣቃሮኔ ጌቲቲዛይታ ጊዲሺን ሄይቲካ ኣዌታ ቢታ።

<sup>4</sup> ዲጌሃ ባጋራ ካናኔታ ቢታይ ወሪ፥ ሲዶናታስ ዲዛ ማኣሬ ጌቲቲዛሶፔ ዶሚ ቢዲ ኣሞሬታ ቢታን ዲዛ ኣፌቄ ካታማ ጋካናስ።

<sup>5</sup> ጌባሌታ ቢታ፥ ኣርሼይ ሞኪዛ ባጋራ ባኣሊ-ጋዴፔ ቢዲ ሄርሞኔ ዙማስ ዳንኤ ባጋራ ኣፄ ቢዲ ሃማቲ ፑርዴ ጋካናስ ዲዛ ሊባናሴ ቢታ ኡባ።

<sup>6</sup> «ሊባናሴፔ ቢዲ ማሲራፎቲ-ማይማን ዲዛ ጌዜ ዴሪን ሲዶናታ ቢታይካ ኦይኬቲቤና። ታኒ ታ ሁኤስ ኢስራኤል ኣሳ ሲንሳፌ ኢስታ ጎዳ ኬሳና። ታኒ ኔና ኣዛዚዳ ማላ ኔኒ ሃ ቢታታ ኢስራኤል ኣሳስ ጸንጾ ሂስታ ሻካ።

<sup>7</sup> ኔኒ ሃ ቢታ ኡዲፋን ቆሞታሲኔ ሚናሴ ቆሞታፔ ባጋይታስ ጊሻ» ጊዴስ።

## ዮርዳኖሴ ሻፋፔ ኣርሼይ ሞኪዛ ባጋራ ዲዛ ቢታ ጊሹሬላ

<sup>8</sup> ሚናሴ ቆሞታፔ ባጋቲ፥ ኦሮቤሌ ዛሬቲኔ ጋዴ ዛሬቲ ጎዳ ኣይሌ ሙሴይ ዮርዳኖሴ ሻፋፔ ሄ ፒንላን ኣርሼይ ሞኪዛሶ ባጋራ ኢስታስ ኣሚዳ ቢታ ኤኪዳ።

<sup>9</sup> ኢስታ ቢታይ ኣርኖኔ ሾባ ላንቄን ዲዛ ኣርኤሬ ካታማፔ ዶሚዲ ሄ ሾባ ጊዶን ዲዛ ካታማ ኦይኪዲ ሜዴባ ጌቲቲዛ ጌዜ ዴሬ ካንሉ ቢዲ ዲሶኔ ጋኬስ።

<sup>10</sup> ቃሴ ሃሴቦኔን ኡቲዲ ኣሞኔታ ዛዋ ጋካናስ ሃሪዳ ኣሞሬታ ካዋ ሲሆኔ ካታማታ ኡባ ጋሉ ኦይኬስ።

<sup>11</sup> ሄሳሳካ ጋላኣዴ ቢታ፥ ጌሹሬታ ቢታ፥ ማኣካቲ ቢታ፥ ሄርሞኔ ዙማ ኡባ፥ ባሳኔ ቢታ ቢዲ ሳላካ ጋካናስ ኦይኬስ።

12 ሄሲካ አስታሮቲ ካታማኒኔ ኤዲራኤ ካታማን ዲሹ ሃሪዳ አጌ ካዋቲፋ ኡባ ኦይኬስ፤ አጌይ ወርሹ አቲዳ ኤራፋይሜ ዛሬታፔ አሳ። ሙሴይ ሄ አሳ ጸኒ ጎዲዲ ኢስታ ቢታ ኦይኬዳስ።

13 ጊዶ አቲን ኢሰራኤል አሳይ ጌሹሬ አሳኔ ማእካቲ አሳ ኬሲ ጎዶንታ አጊዳ ጊሻስ ኢስቲ ሃቕ ጋካናስ ኢሰራኤል አሳ ጊዶን ዴቲስ።

14 ሙሴይ ሌዌ ቆዋታስ ጸንጾ ኢሚቤና፤ ጎዳይ ሙሴስ ጊዳ ማላ፡ ጎዳስ ኢሰራኤል ጸሳስ ታማን ጸጌቲዛ ያርሾይ ኢስታስ ጸንጾ።

### ኦርቤሌ ቆዋታ ጋኪዳ ጸንጾ

15 ሙሴይ ኦርቤሌ ቆዋታስ ኢስታ ዛርኬን ዛርኬን ጊሹሬላ ኢሚዳ ቢታይ ሃይሳፌ ካሊ ዲዛይሳ።

16 ኢስታ ዛዋይ አርኖኔ ሾባ ላንቄን ዲዛ አርኤሬ ካታማፔኔ ሄ ሾባ ጊዶን ዲዛ ካታማ ኦይኬዳ፡ ሜዳባ ጌዜ ዳሬ ካንላ ቢዲ፡

17 ሃሴቦኔኔ ጌዜ ዳሬን ዲዛ ካታማታ ኡባ፡ ቃሴ ዲቦኔ፡ ባዋቲ ባኣሌ፡ ቤቲ-ባኣሊ-ሜኦኔ፡

18 ያሃጾ፡ ቂዲሞቲ፡ ሜፋኦቲ፡

19 ቂሪያታይሜ፡ ሴባማ ሾባ ጊዶን ዲዛ ዙሞቡላ ቦላ ዲዛ ዳሬቲ-ሻሃሬ፡

20 ቤቲ-ፔኦሬ፡ ፒዝጋ ዲጉንፋታኔ ቤቲ-ያሺሞቲ።

21 ሄሲካ ጌዜ ቢታን ዲዛ ካታማታ ኡባኔ ሃሴቦኔ ካታማን ኡቲዲ ሃሪዳ አዋሬታ ካዋ ሲሆኔ ቢታ ኡባ ኦይኬስ። ሙሴይ ካዋ ሲሆኔኔ ሄ ቢታን ዲዛ ዳናታ፡ ኤዋ፡ ኤሬቄሜ፡ ጹሬ፡ ኡሬኔ ኤሬባኤ ጌቲቲዛ ሚዲያሜ ሃላቃታ ኦሊ ጸኒዳስ።

22 ኢሰራኤል አሳይ ኦላን ዋዲዳ አሳፔ ሃሪ፡ ቢኦሬ ና ማር ባላሜካ ማሻን ሲፊዳ።

23 ኦርቤሌ ቆዋታ ዛዋይ ዮርዳኖሴ ሻፋ። ኦርቤሌ ቆዋቲ ባ ዛርኬን ዛርኬን ጊሹቲ ኤኪዳ ካታማቲኔ ጉታቲ ሄይታ።

### ጋዴ ቆዋታ ጋኪዳ ጸንጾ

24 ሙሴይ ጋዴ ቆዋታስ ኢስታ ዛርኬን ዛርኬን ጊሹሬላ ኢሚዳ ቢታይ ሃይሳፌ ካሊ ዲዛይሳ።

25 ኢስታ ዛዋይ ኢያዜሬ፡ ጋላኣዴ ካታማታ ኡባ ኤራባ አቻን ዲዛ አርኤሬ ጋካናስ ዲዛ አዋኔታ ቢታፌ ባጋ፡

26 ሃሴቦን፣ ቢዲ ኤራሞቴ-ሚዲያኔ ቤጾንሜ፣ ማሃናይሜ፣ ቢዲ ዳባሬ ዛዋ፣

27 ኣርሼይ ሞኪዛ ባጋራ ዲዛ ዮርዳኖሴ ሾባሰ ጊዶን ሃሴቦን ካዋ ሲሆን ካዋቴፋፌ ኣቲዳይታ፣ ቤቲ-ሃራሜ፣ ቤቲ-ነሚሬ፣ ሱኮቲኔ ጳፎኔ ጌቲቲዛ ካታማታ ኢሲፌ ጋላ ኣይኬሰ።

28 ጋዴ ቆሞቲ ባ ዛርኬን ዛርኬን ጊሼቲ ኤኪዳ ካታማቲኔ ጉታቲ ሄይታ።

### ሚናሴ ቆሞታፕ ባጋይታሰ ጋኪዳ ጸንጾ

29 ሙሴይ ሚናሴ ቆሞታፕ ባጋይታሰ ኢሰታ ዛርኬን ዛርኬን ጊሼሬላ ኢሚዳ ቢታይ ሃይሳፌ ካሊ ዲዛይሳ።

30 ኢሰታ ዛዋይ ማሃናይሜ፣ ዶሚዲ ባሳኔ ቢታ ኡባ ጉጂዲ ባሳኔን ዲዛ 60 ያኢሬ ካታማታ ኡባ ኤኪዲ ባሳኔ ካዋ ኣጌይ ሃሪዛሶ ኡባ ጊዲሺን፣

31 ጋላኣዴፕ ባጋኔ ባሳኔን ኣጌ ካዋቴፋሰ ዋና ካታማታ ኣሰታርቴኔ ኤዲራኤ ጋኬሰ። ሄይቲ ሚናሴ ና ማኪሬ ዛሬታሰ ኢሜቲዳይታ ጊዲሺን ሄይቲካ ማኪሬ ናይታፕ ባጋይታሰ ኢሰታ ዛርኬን ዛርኬን ኢሜቲዳይታ።

32 ዮርዳኖሴ ሄ ፒንፋን፣ ኢያርኮሬ ኣርሼይ ሞኪዛ ባጋራ ዲዛ ሞኣቤ ዴሞባን ዲዛ ዎዴ ሙሴይ ሻኪዲ ኢሚዳ ቢታይ ሄሳ።

33 ጊዶ ኣቲን ሙሴይ ሌዌ ቆሞታሰ ጸንጾ ኢሚቤና፣ ካሴ ጎዳ ኢሰራኤሌ ጾሳይ ኢሰታሰ ዮቲዳ ማላ ኢዚ ኢሰታ ጸንጾ።

## 14

### ዮርዳኖሴ ሻፋፕ ኣርሼይ ዉሊዛሶ ባጋ ቢታ ጊሼሾ

1 ቄሴ ኤልኤዜሬይ፣ ናዌ ና ኢያሶይኔ ኢሰራኤሌ ዛሬታ ኮራፒኔቲ ጊሼቺ ኢሚን ኢሰራኤሌ ኣሳይ ጊሼቲ ኤኪዲ ላቲዳ ቢታይ ሃይሳፌ ካሊዛይሳ።

2 ጎዳይ ሙሴ ባጋራ ኣዛዚዳ ማላ ኢሰቲ ጊሼቲ ኤኪዳ ቢታይ ኡዲፋን ቆሞታሲኔ ባጋይታሰ ሳማን ጋኪዳሰ።

3 ሙሴይ ናምኡ ቆሞታሲኔ ባጋታሰ ዮርዳኖሴ ሻፋፕ ሄ ፒንፋን ኣርሼይ ሞኪዛ ባጋራ ዲዛ ጋዴዛ ኢሰታሰ ጸንጾ ሂሰቲ ኢሚዳሰ፣ ጊዶ ኣቲን ሌዌ ቆሞታሰ ኢሰታ ጊዶን ጸንጾ ኢሚቤና።

4 የሴፌ ናይቲ ሚናሴኔ ኤፍሬሜ ጌቲቲዲ ናሞኡ ዛርኬ ጊዲዲ። ሙሴይ ለዌ ቆሞታሰ ላታ ቢታ ኢሚቤና፤ ጊዶ ኣቲን ለዌ ቆሞታሰ ኢሰቲ ዲዛ ካታማታኔ ኢሰቲ ባ ሜሄኔ ዶርሳ ሄሚዛሶሆ ጸላ ኣቲን ሃራ ጋዴይ ኢሰታሰ ኢሚቲቤና።

5 ሄሳ ጊሻሰ ጎዳይ ሙሴ ኣዛዚዳ ማላ ኢሰራኤል ኣሳይ ቢታ ጊሼቲ ኤከዳ።

### ካሌቤስ ኢሚቲዳ ኩብሮኔ ቢታ

6 ኢሲ ጋላሰ ዩሁዳ ኣሳይ ኢያሶኮ ጌልጌላ ሺቂዴሰ፤ ኢሰታፌ ቄናዜ ዴሬ ኣሰ ዮፊኔ ና ካሌቤይ ኢያሶስ፡ «ኮኒ ቃዴሴ ባሪኔን ዲሺን ጎዳ ኣሰ ሙሴስ ኔ ጊሻሲኔ ታ ጊሻሰ ዮቲዳይሳ ኔ ኤራሳ።

7 ጎዳ ኣይሌ ሙሴይ ቢታዮ ዋቻዳ ያና ማላ ቃዴሴ ባሪኔፔ ታና ከቲዛ ዋዴ ታሰ ላይላይ 40። ሄ ዋዴ ታኒ ኢዛሰ ኣማንሉዛ ዮኦ ኤካ ያዲሰ።

8 ታናራ ቢዳ ኣሳቲ ዴራ ዋዚና ሂርጋን ኩንሉዳ፤ ታኒ ጊዲኮ ጎዳ ታ ጸሳ ኩሜላ ዋዚናፔ ካላዲሰ።

9 ሄ ጋላሰ ሙሴይ፡ ሳኒ ጎዳ ታ ጸሳ ኩሜላ ዋዚናፔ ካሊዳ ጊሻሰ ኔ ቶሆይ ዬጲዳ ቢታይ ሜርናሰ ኔሲኔ ኔ ኬሬላሰ ላታ ቢታ ጊዳና፡ ጊዲ ታሰ ጫቂዴሰ።

10 «ጎዳይ ሃ ዮኦዛ ሙሴስ ዮቶሶፔ ዶሚዲ ኢሰራኤል ኣሳይ ባዘ ቢታን ቶይላቲሺን ታና 45 ላይሳ ናጊዲ ሸምፖራ ፓጸ ዋሊዴሰ፤ ሃኢ ታ ላይላይ 85 ጊዲዴሰ።

11 ጊዲኮካ ሃኢ ታሰ ዲዛ ሚናቴላይ ቤኒ ሙሴይ ታና ከቲዛ ዋዴ ዲዛ ሚናቴላ ማላ። ታሰ ሃኢካ ኦሌታና ባናሰ ቤኒ ዋልቃይኔ ሚናቴሊ ዴሰ።

12 ሄሳ ጊሻሰ ጎዳይ ታሰ ኢማና ጊዳ ሃ ጌዜ ቢታ ሃኢ ታሰ ኢማ። ሄ ዋዴ ኤናቄቲ ሄ ቢታን ዲዛይሳኔ ኢሰታ ካታማቲካ ጌታኔ ገምቤቲዳይታ ጊዲዳይሳ ኔ ሲያዳሳ፤ ጊዶ ኣቲን ጎዳይ ታናራ ጊዲኮ ኢዚ ጊዳ ማላ ታኒ ኢሰታ ሄ ቢታፌ ዬዴላና» ጊዴሰ።

13 ሄሳፌ ጉዬ ኢያሶይ ዮፊኔ ና ካሌቤ ኣንጂዲ ኩብሮኔ ኢዛሰ ጸኒጾ ሂሰቲ ኢሚዴሰ።

14 ጎዳ ኢሰራኤል ጸሳ ኢዚ ኩሜላ ዋዚናፔ ካሊዳ ጊሻሰ ሄ ጋላሳፌ ዶሚዲ ኩብሮኔይ ቄናዜ ዴሬ ኣሰ ዮፊኔ ና ካሌቤስ ጸኒጾ ጊዲዴሰ።

15 ኩብሮኔይ ካሴ ኤናቄታ ኡባፌ ባይራ ጊዲዳ ኣርባኤ ሱንላን ቂሪያቴ-ኣርባኤ ጌቲታ ጸይጌታዲስ።  
ሄሳፌ ጉዬ ሄ ቢታያ ኦላፔ ሸምፓዲስ።

## 15

### ጊሹን የሁዳ ቆሞታ ጋኪዳ ጋዴ

1 የሁዳ ቆሞታስ ኢስታ ዛርኬን ዛርኬን ሳማ ዩጊን ጋኪዳ ጋዴይ ቢዲ ኤዶሜራ ዛዋቲዲ፥ ዲጌሃ ባጋ ጋጸን ዲዛ ጸኔ ጌቲቲዛ ባዞ ጋኬስ።

2 ዲጌሃ ባጋራ ኢስታ ዛዋይ ማጸኔ ኣባስ ዲጌሃ ባጋ ጸራፔ ዶሜስ።

3 ኣኪራቢሜ ፑርዴራ ካንሊዲ፥ ጸኔ ባዞራ ቢዲ ቃዴሴ ባሪኔ ዲጌሃ ባጋ ጋኬስ። ቃሴ ሄሳፌ ሄጺሮሜራ ካንሊ ፑዴ ኣዳሬ ጋኪዲ ቃርቃኮ ሲሜስ።

4 ኣጸሞኔራ ካንሊ ቢዲ ሃሊ ባይንዳ ጊብጼ ሻፋን ጋኪዲ ሚዲቲራኔ ኣባን ዛዋቲስ። ዲጌሃ ባጋራ ዲዛ የሁዳ ዛዋይ ሃይሳ።

5 ኣርሼይ ሞከዛሶ ባጋራ ዲዛ ዛዋይ ማጸኔ ኣባ ጊዲሺን ሄሲካ ዮርዳኖሴ ሻፋይ ኢዛን ቢ ጌሊዛሶ ጋኬስ።

ፑዴሃ ባጋራ ዲዛ ዛዋይ ዮርዳኖሴ ሻፋይ ማጸኔ ኣባን ጌሊዛሶፔ ዶሚዲ፥

6 ፑዴ ቤቲ-ሆጊሌ ኬዚዲ ዮርዳኖሴ ሸባፌ ጋና ባጋራ ካንሊዲ ኦርቤሌ ና ቦሃኔ ሹቻን ዛዋቲስ።

7 ሂስቲዲ ዛዋዚ ኣኮሬ ሸባፌ ዳቢሬ ካታማ ፑዴ ኬዚዲ፥ ሸባፌ ዲጌ ባጋራ ዲዛ ኣዳሚሜ ፑርዴፌ ሲንላራ ካንሊዲ ፑዴሃ ባጋ ጌልጌላኮ ሲሜስ። ቃሴ ኤን-ሺሚሺ ጌቲቲዛ ፑልቶዛራ ካንሊ ቢዲ ፑዴ ኤን-ሮጌሌ ጌቲቲዛሶ ኬዜስ።

8 ሄሳፌ ሄኖሜ ና ሸባራ ካንሊ ቢዲ ያቡሴታ ካታማ ዩሩሳላሚይ ዲዛሶ ዲጌሃ ባጋራ ካንሊዲ ኤራፋይሜ ሸባስ ፑዴሃ ባጋ ጸራራ ካንሊ ቢዲ ሄኖሜ ሸባስ ኣርሼይ ዉሊዛ ባጋራ ዲዛ ዙምቡላ ጸራ ጋኬስ።

9 ሄፔካ ዙምቡላ ጸራፔ ዶሚዲ ኔፍቶ ፑልቶታራ ካንሊዲ ኤፍሮኔ ዳሬን ዲዛ ካታማታኮ ጋኬስ። ሄሳፌ ቃሴ ዲጌ ባኣላ ሆይኮ ቂሪያቴ-ዩኣሪሜ ጌቲቲዛ ካታማኮ ዎዴስ፤

10 ባኣላፔ ኣርሼይ ዉሊዛ ባጋራ ዲዛ ሴይሬ ዙማኮ ሚርቂቲዲ ኪሳሎኔ ጌቲቲ ጸይጌቲዛ ዩኣሪሜ ዙምቡላስ ፑዴሃ ባጋራ ዲዛ ዲጉንላራ ዲጌ ቤቲ-ሺሚሺ ዎዴዲ ቲሚና ፒኔስ።

11 ቃሴ አቃሮስ ፑዳሃ ባጋራ ዲዛ ዲጉንፋራ ካንሉዲ ሸካሮኩ ሚርቁቲዲ ባኣላ ዙማ ቦላራ ኣጂ ቢዲ ያበንኤሌ ጋኬስ፤ ሄሳፌ ጉዬ ዛዋይ ቢዲ ኣባን ኤቁስ።

12 ኣርሼይ ዉሊዛ ባጋራ ዲዛ ዛዋይ ሚዲቴራኔ ኣባ ጋጸ ጋኬስ። ዩሁዳ ቆሞቲ ባ ዛርኬን ዛርኬን ኤኪዳ ዛዋቲ ሃይታንታ።

ካሌቤይ ጸኒ ኦይኪዳ ኬብሮኔኔ ዳቢሬ ቢታ

(ዳና 1:11-15)

13 ጎዳይ ኢዛ ኣዛዚዳ ማላ ኢያሶይ ዩሁዳ ገሻፔ ሻኪዲ ኬብሮኔ ጌቲቲዛሮ ቂሪያቴ-ኣርባኤ ዮፊኔ ና ካሌቤስ ኢሚዴስ፤ ኣርባኤይ ኤናቁ ኣዋ።

14 ካሌቤይካ ኤናቁ ዛሬ ሄዛታ፡ ሻሻዬ፡ ኣሂማኔኔ ታሊማይ ኬብሮኔፔ ኬሲ ጎዲዴስ።

15 ሄሳፌ ጉዬ ዳቢሬ ዳሬ ቦላ ኦላስ ዴንዲዴስ፤ ዳቢሬ ካታማይ ካሴ ቂሪያቴ-ሴፌሬ ጌቲታዉስ።

16 ካሌቤይ፡ «ቂሪያቴ-ሴፌሬ ኦሊዲ ኦይኪዛዴስ ታኒ ታ ናዮ ኣኪሳ ኢማና» ገዴስ።

17 ሄሳ ገሻሰ ካሌቤ ኢሻ ቁናዜ ና ኦቲንኤሌይ ሄ ካታማ ኦሊዲ ኦይኪዴስ፤ ሂስቲን ካሌቤይ ባ ናዮ ኢዛስ ማቾ ኢሚዴስ።

18 ኣኪሳይ ኦቲንኤሌ ጌሊዳፔ ጉዬ ኢዚ ኣዋይ ኢዚስ ጋዴ ኢማና ማላ ባ ኣዋ ዋሳና ማላ ባ ኣዚናስ ሚንፋ ዮታዲስ፤ ኢዛ ሃሬዛ ቦላፌ ዋጂን ካሌቤይ ኢዞ፡ «ታ ኔስ ኣይ ኦፋና ማላ ኮያይ?» ገ ኦይቺዴስ።

19 ኢዛካ ዛራዳ፡ «ታስ ሎኑ ኦፋርኪ! ኔኒ ካሴ ታስ ኔጌቤን ጋዴ ኢሚዳይሳሶ ሃኢካ ፑልቶ ሃፋራ ዲዛ ጋዴ ታስ ኢማ» ጋዲስ። ሂስቲን ካሌቤይ ኢዚስ ፑዴራኔ ዲጌራ ዲዛ ፑልቶ ኢሚዴስ።

ዩሁዳ ቆሞታስ ኢሚቲዳ ጸንጾ

20 ዩሁዳ ቆሞታስ ኢስታ ዛርኬን ዛርኬን ገሻሰ ኢሚዳ ቢታይ ሃይሳፌ ካሊ ዲዛይሳ።

21 ኔጌቤ ሄራን ኤዶሜ ዛዋ ጴራን ዲዛ ዲጌሃ ባጋራ ዲዛ ዩሁዳ ቆሞታ ካታማቲ ቃብጸኤሌ፡ ኤዴሬ፡ ያጉሬ፡

22 ቁና፡ ዲሞና፡ ኣዳዳ፡

23 ቃዴሴ፡ ሃጸሬ፡ ዩቲናኔ፡

24 ዚፌ፡ ቴሌሜ፡ ባኣሎቴ፡

25 ሃጸሬ-ሃዳታ፡ ሄጺሮሜ ጌቲቲዛ ቂሪያቴ-ሃጸሬ፡

26 ኣማሚ፡ ሸማኤ፡ ሞላዴ፡

- 27 ሃጸሬ-ጋዳ፥ ሄሽሞኔ፥ ቤተ-ጳሌዳ፥
- 28 ሃጸሬ-ሹኣሌ፥ ቤርሳቤሄ፥ ቢዚዮቲያ፥
- 29 ባኣላ፥ ኢዩሜ፥ ኤዶሜ፥
- 30 ኤልቶላዳ፥ ኪሲሌ፥ ሆርማ፥
- 31 ጸጊላጌ፥ ማዲማና፥ ሳንሳና፥
- 32 ሌባዎቲ፥ ሺሊሂሜ፥ አዪኔኔ አርሞኔ። ካታማቲኔ ጉታቲ ኢሲ ቦላ ናምኡ ታማኔ ኡዱፋና።
- 33 አርሼይ ወሊዛ ባጋራ ዙሞቡላታ ቶሆሶራ ዲዛይቲ ኤሽታኦሌ፥ ጸራኣ፥ አሺና፥
- 34 ዛኖሄ፥ ኤን-ጋኒሜ፥ ታጵሄ፥ ኤናሜ፥
- 35 ያርሙቲ፥ አዲላሜ፥ ሶኮ፥ አዜቄ፥
- 36 ሻኢራይሜ፥ አዲታይሜ፥ ጋዴሬኔ ጋዴርታይሜ። ካታማቲኔ ጉታቲ ኢሲ ቦላ ታማኔ ኦይዳ።
- 37 ቃሴ ጸናኔ፥ ሃዳሻ፥ ሚጊዳላ-ጋዳ፥
- 38 ዲልኣኔ፥ ሚጸጸ፥ ዮቂቲኤሌ፥
- 39 ላኪሼ፥ ቦዲቃቲ፥ ኤጊሎኔ፥
- 40 ካቦኔ፥ ላሂማሴ፥ ኪቲሊሼ፥
- 41 ጋዴርቲ፥ ቤቲ-ዳጎኔ፥ ናኢማኔ ማቄዳ። ካታማቲኔ ጉታቲ ኢሲ ቦላ ታማኔ ኡሱፑና።
- 42 ቃሴ ሊቢና፥ ኤቴሬ፥ አሻኔ፥
- 43 ዮፍታሄ፥ አሺና፥ ኒዲቤ፥
- 44 ቂኣላ፥ አኪዚቤኔ ማሬሻ። ካታማቲኔ ጉታቲ ኢሲ ቦላ ኡዱፋና።
- 45 አቃርኔይ ባ ሄራን ዲዛ ጉታታራ፥
- 46 ሄሳቶካ አቃርኔፔ አርሼይ ወሊዛ ባጋራ ዲዛ አሽዶዴ ጋካናሰ፥
- 47 ቃሴ አሽዶዴይ ባ ሄራን ዲዛ ጉታታራኔ ጋዛፔ ቢዲ ሃላ ባይንዳ ጊብዳ ሻፋ ጋካናሴኔ ሜዲቴራኔ ጋጻፔ ሃ ሲሚን ዲዛ ካታማታኔ ጉታታ።
- 48 ዙሞቡላታ ቦላ ዲዛ ካታማቲካ ሻሚሬ፥ ዬቲሬ፥ ሶኮ፥
- 49 ዳና፥ ቂሪያቲ-ሲና ዎይኮ ዳቢሬ፥
- 50 አናቤ፥ ኤሽታሞ፥ አኒሜ፥
- 51 ጎሼኔ፥ ሆሎኔኔ ጊሎ፤ ሄይቲ ታማኔ ኢሲኔቲ ኢሰታ ካታማታኔ ኢሰታ ጉታታ።
- 52 ቃሴ አራቤ፥ ዱማ፥ ኤሻኔ፥
- 53 ያኒሜ፥ ቤቲ-ታጵሄ፥ አፌቄ፥

54 ሁሙን፡ ከብሮን ዋይኮ ቂሪያቴ-ኣርባኤን ጸኣ። ሄይቲ ኡዲፋናቲ ኢስታ ካታማታን ኢስታ ጉታታ።  
 55 ቃሴካ ማኣን፡ ቃርሜሎሴ፡ ዚፌ፡ ዩጸ፡  
 56 ኢዘራኤል፡ ዮቂዲእሜ፡ ዛኖሄ፡  
 57 ቃይን፡ ገቢኣን ቲሚና፤ ሄይቲ ታማቲ ኢስታ ካታማታን ኢስታ ጉታታ።  
 58 ቃሴ ሃሊሁሉ፡ ቤቲ-ጸሬ፡ ጋዶ፡  
 59 ማራቴ፡ ቤቲ-ኣኖቴን ኤልቲቆን፤ ሄይቲ ኡሱፑናቲ ኢስታ ካታማታን ኢስታ ጉታታ።  
 60 ሄሳሶካ ቂሪያቴ-ዩኣሪሚ ጌቲቲዳራ ቂሪያቴ-ባኣሌን ኤራባ፤ ሄይቲ ናሞኣቲ ኢስታ ካታማታን ኢስታ ጉታታ።  
 61 ባዞን ዲዛይቲ ሃይሳፌ ካሊዛይታ፤ ቤቲ-ኣራቤ፡ ሚዲና፡ ሲካካ፡  
 62 ኒቢሻን፡ ማጸኔ ካታማን ኤን-ጋዴ፤ ሄይቲ ኡሱፑናቲ ኢስታ ካታማታን ኢስታ ጉታታ።  
 63 ገዶ ኣቲን ዩሁዳ ኣሳይ ዩሩሳላሚን ዲዛ ያቡሴታ ኢስቲ ዲዛሶፔ ኬሲ ጎዳና ዳንዲይቤቴና፤ ሄሳ ገሻስ ያቡሴቲ ሃቕ ጋካናስካ ዩሁዳ ኣሳራ ኢሲፌ ዩሩሳላሚን ዴቴስ።

## 16

### ዮሴፌ ቆሞታ ጋኪዳ ቢታ

1 ዮሴፌ ዛሬታ ጋኪዳ ቢታይ ኢያርኮ ማታን ዮርዳኖሴ ሻፋፔ ደሚዲ ኢያርኮ ፑልቶታፔ ኣርሼይ ሞኪዛ ባጋራ ባዞ ካንሊዲ ጌዜቲዛ ቢታራ ኣጲዲ ቤቴሌ ጋኪስ።  
 2 ሎዛ ጌቲቲዛ ቤቴሌፔ ዴንዲዲ ኣጸሮቲ ጌቲቲዛ ኣርኬታ ቢታ ጋኪስ።  
 3 ሄሳፌ ኣርሼይ ወሊዛ ባጋራ ዲዛ ያፋሌጾታ ቢታ ዴጉንሳ ዴጌ ቤቲ-ሆሮን ዋጂዲ ጌዜሬራ ካንሊ ቢዲ ጌታ ኣባን ጌሌስ።  
 4 ዮሴፌ ቆሞ ሚናሴ ዛሬቲን ኤፍሬሚ ዛሬቲ ባንታና ጋኪዛ ቢታ ላቲዳ።  
 5 ኤፍሬሚ ዛሬታ ኢስታ ዛርኬን ዛርኬን ጋኪዳ ቢታይ ሃይሳፌ ካሊዛይሳ፤ ኢስታ ዛዋይ ኣርሼይ ሞኪዛ ባጋራ ዲዛ ኣጸሮቲ-ኣዳሬፔ ቢዲ ጋና ቤቲ-ሆሮን ጋኪስ።  
 6 ሄፔ ቢዲ ዋጋ ኣባን ጌሌስ። ቃሴ ፑዴሃ ባጋራ ዲዛ ዛዋይ ሚኪማታቴፔ ኣርሼይ ሞኪዛሶ ባጋ ታናቴ-ሺሎራ ሚርቄቲ ሲሚዲ፡ ኣርሼይ ሞኪዛሶ ባጋራ ዲዛ ያኖኬ ጋኪስ።

7 ያናኬፔ ዱጌ አጻሮቴኔ ናራቴ ዱጌንፋ ዋጂዱ ኢያርኮራ ካንሏ ቢዲ ዮርዳኖሴ ሻፋን ጌሌሰ።

8 ዛዋዚ ታጵሄፔ አርሼይ ወሊዛ ባጋራ ቢዲ ቃና ሻፋራ ዋጂ ቢዲ ሜዲቴራኔ አባን ጌሌሰ። ኤፍሬሜ ዛሬቲ ባ ዛርኬን ዛርኬን ላቲዳ ቢታይ ሃይሳ።

9 ሄሲ ሚናሴ ዛሬታ ቢታፌ ኤፍሬሜ ዛሬታሰ አሚዳ ካታማታኔ ኢሰታ ጉታታ ኡባ ጋሏ ኦይኪዳሰ።

10 ሃይሲ ኡባይ ሃኒንካ ኤፍሬሜ ዛሬቲ ጌዜሬ ካታማን ዲዛ ካናኔ አሳታ ኬሲ ጎዲቤቴና። ካናኔ አሳቲ ሃቕ ጋካናሰ ኤፍሬሜ ዛሬታራ ኢሲፌ ዳቴሰ። ጊዶ አቲን ኤፍሬሜ ዛሬቲ ኢሰታ ዋልቃራ ኦሲሴቴሰ።

## 17

### ሚናሴ ቆዋታ ጋኪዳ ቢታ

1 ሚናሴይ ዮሴፌሰ ባይራ ና ጊዲዳ ጊሻሰ ኢዛ ዛሬታ ሳማን ጋኪዳ ቢታይ ሃይሳፌ ካሊ ዲዛይሳ፤ ሚናሴሰ ባይራ ናዚ ማኪሬይ ጋላኣዳታ ኣዋይ ሚኖ ኦላንቻ ጊዲዳ ጊሻሰ ጋላኣዳይኔ ባሳኔይ ኢዛሰ ጊሻ ጊዲዳሰ።

2 ሄሳ ጊሻሰ ሄ ቢታዚ ሃንኮ አቲዳ ሚናሴ ዛሬታሰ ኣቢኤዜሬሰ፣ ሄሌቄሰ፣ ኣሲራኤሌሰ፣ ሴኬሜሰ፣ ሄፌሬሰ፣ ሻሚዳሰ አሜቲዳሰ፤ ዮሴፌ ና ሚናሴ ዛርኬ ጊዲዳ አቱማቲ ሃይሳፌ ካሊ ዲዛይታ።

3 ጸሎፋዳይ ሄፌሬ ና፤ ሄፌሬይ ጋላኣዳ ና፤ ጋላኣዳይ ማኪሬ ና፤ ማኪሬይ ሚናሴ ና። ጸሎፋዳሰ ማጫ ናይታፔ አቲን አቱማ ናይ ዳና፤ ኢዛ ማጫ ናይቲ ማሂሎ፣ ኖኦ፣ ሆጊሎ፣ ሚልኮኔ ቲርጸ ጌቴቴሰ።

4 ኢሰታ ቄሴ ኤልኤዜሬኮ፣ ናዌ ና ኢያሶኮኔ ሃላቃታኮ ሸቂዲ፣ «ኦኒ ኦ አሻታራ ጋዴ ጊሼቲ ኤካና ማላ ጎዳይ ሙሴ ኣዛዚዳሰ» ጊዳ። ሄሳ ጊሻሰ ጎዳይ ኣዛዚዳ ማላ ኢያሶይ ኢሰታ ኣዋ አሻታሳራኔ ኢሰታሳራ ጊሼቺ አሚዳሰ።

5 ሚናሴሰ ጋላኣዳፔኔ ባሳኔፔ ሃራሶን ታሙ ኬዚ ጊሼቲዛ ቢታይ ዮርዳኖሴ አርሼይ ሞኪዛ ባጋራ ዳሰ።

6 ሚናሴ ዛሬታፔ ማጫ ናይቲካ አቱማ ናይታራ ኢሲፌ ቢታ ጊሼቲ ኤኪዳ ጊሻሰ ጋላኣዳ ቢታይ አቲዳ ሚናሴ ዛሬታሰ ጊዲዳሰ።

7 ሚናሴ ዛሬ ቢታ ዛዋይ አሴሬ ቢታፊ ዶሚዲ፥ ሴኬሜፔ አርሼይ ሞኪዛ ባጋራ ዲዛ ሚኪማታቴ ጋኬሰ። ሄ ዛዋይ ሄሳፊ ቢዲ ዲጌሃ ባጋራ ካንሉዲ ኤን-ታጵሃን ዲዛ ዴሬዛካ ጉጄሰ።

8 ታጵሄ ቢታይ ሚናሴሳ፤ ጊዶ አቲን ሚናሴ ዛዋን ዲዛ ታጵሄ ካታማያ ካሴ ኤፍሬሜ ዛሬታሳ።

9 ሄሳፊ ካሊዲ ኢዛ ዛዋይ ቢዲ ቃና ሻፋን ጌሌሰ። ሚናሴ ካታማታ ጊዶን ኤፍሬሜ ካታማቲካ ዴቲሰ፤ ጊዶ አቲን ሚናሴ ዛዋይ ቃና ሻፋፔ ፑዴሃ ባጋራ ቢዲ ሜዲቴራኔ አባን ጌሌሰ።

10 ዲጌሃ ባጋራ ዲዛ ቢታይ ኤፍሬሜሳ፤ ፑዴሃ ባጋራ ዲዛ ቢታይ ቃሴ ሚናሴሳ። ሚናሴ ቢታ ዛዋይ ቢዲ ሜዲቴራኔ አባ ጋኬሰ፤ ፑዴሃ ባጋ ዛዋይ አሴሬ ጋኬሰ፤ አርሼይ ሞኪዛ ባጋራ ዲዛ ዛዋይ ዪሳኮሬ ጋኬሰ።

11 ዪሳኮሬ ቢታኒኔ አሴሬ ቢታን ቤቲ-ሻኦኒይ፥ ዪቢላአሜይ፥ ዶሬ አሳይ፥ ኤን-ዶሬይ፥ ታኢናኬይኔ ማጊዶይ ባ ዩሾን ጉታታራ ኢሲፊ ሚናሴሳ፤ ሄቫንሐዚ ናፎቲ።

12 ጊዶ አቲን ሚናሴ ዛሬቲ ሄ ካታማታ ጸኒ ኦይካና ዲንዳይቤቴና። ጋሶይካ ካናኔ አሳይ ባ ኦይኪዳ ቢታ ዬዶኮ ጊ ሙርቲዳ ጊሻሳ።

13 ኢሰራኤሌ አሳይ ሚኒዳ ዎዴ ካናኔ አሳታ ባንታሰ ሃጋዚሲዳ አቲን ቢታፊ ኢሰታ ኡባ ኬሲ ጎዲቤቴና።

14 ዮሴፊ ዛሬቲ ኢያሱ፥ «ጎዳይ ኑና አንጂን ኑኒ ቆዳን ጮራ ጊዲሺን ላታ ቢታ ሻኮን ኑሰ አይሰ ኢሲ ጊሻ ጸላ ኢማዲ?» ጊዳ።

15 ኢያሶይካ ኢሰታሰ፥ «ኢንቴ ጮራ ጊዲኮ ኤፍሬሜ ጌዜይ ፓሪዜቴኔ ኤራፋይሜቲ ዲዛ ቢታ ቢዲ ዎራ ኢንቴሰ ቄጸቴ» ጊዴሰ።

16 ዮሴፊ ዛሬቲ፥ «ጌዜ ቢታዚ ኑሰ ጊዴና፤ ሄሳ ቦላካ ዴሞባን ዲዛ ቤቲ-ሻኦኒኔ ሄ ሄራን ዲዛይቲ፥ ቃሴ ኢዘራኤሌ ሾባን ዲዛ ካናኔታሰ ቢራታ ፓራ-ጋሬቲ ዴቲሰ» ጊዳ።

17 ኢያሶይ ዛሬዲ ዮሴፊ ዛሬታሰ ኤፍሬሜ ቆሞታሲኔ ሚናሴ ቆሞታሰ፥ «ኢንቴ ጮራኔ ኬሂ ዎልቃማ፤ ኢንቴሰ ኢሲ ጊሻ ጸላይ ጊዴና።

18 ሄሳ ጊሻሰ ጌዜ ቢታይካ ኢንቴሳ፤ ቢዲ ቄጸቴ፤ ወርሴላ ጋጸ ጋካናሰ ዲዛይሲ ኢንቴሰ ጊዴና፤ ካናኔታሰ ቢራታ ፓራ-ጋሬቲ ዲኮካ፥ ኢሰቲ ሚኖ ጊዲኮካ ኢንቴ ኢሰታ ሄፔ ኬሳና» ጊዴሰ።

# 18

## አቲዳ ጋዴ ጊሼቴሰ

<sup>1</sup> ኢስራኤል ማባራይ ወሪ ሴሎን ሺቂዳ፤ ጋይቶቴላ ዲንካኔ ሄን ቶኪዳ፤ ቢታያካ ጮኡ ጋዳ ኢስታሰ ሃሬታዲሰ።

<sup>2</sup> ጊደ አቲን ኢስራኤል አሳፔ ጋዴ ጊሻይ ጋኮንታ አቲዳ ላፑን ቆሞቲ ዳቴሰ።

<sup>3</sup> ሄሳ ጊሻሰ ኢያሶይ ኢስራኤል አሳ፥ «ጎዳ ኢንቴ አዋታ ጸሳይ ኢንቴሰ ኢሚዳ ቢታ ላቶንታ አይዴ ጋካናሰ አዛሌቲ?

<sup>4</sup> ኢሲ ኢሲ ቆሞፌ ሄዡ ሄዡ አሳታ ዶሪቴ። ቢታ ዩዩ ጴሊዲ ኢሲ ኢሲ ቆሞ ጋካናይሳ ታሰ ጸፊ ኢማናይታ ታ ኪታና፤ ኢሰቲካ ታኮ ሃ ሲሚ ያና።

<sup>5</sup> ኢሰቲ ሄ ቢታዮ ላፑን ኬሲ ሻካና። ዱጌሃ ባጋራ ዩሁዳይ፥ ፑዴሃ ባጋራ ዮሴፌይ ባሰ ጸንጾ ሂሰቲ ኦይካና።

<sup>6</sup> ሃ ላፑን ኬዚ ሻኬቲዳ ቢታ ሃኖታ ጸፊዳፔ ጉዬ ታኮ ኤኪ ዩኮ ታኒ ጎዳ ኑ ጸሳ ሲንፋን ኢንቴሰ ሳማ ዩጋና።

<sup>7</sup> ለቄ ዛሬቲ ጸሳሰ ኦሊዛ ኦሶይ ኢስታሰ ጸንጾ ጊዲዳ ጊሻሰ ኢንቴናራ ኢሰቲ ቢታ ጊሼቴቴና። ጋዴ ዛሬቲ፥ ኦርቤሌ ዛሬቲኔ ሚናሴ ዛሬታፔ ባጋይ ዮርዳኖሴ ሻፋፔ ኣርሼይ ሞኪዛሶ ባጋራ ጎዳ አይሌ ሙሴይ ኢስታሰ ኢሚዳ ቢታ ካሴቲ ላቲዳ» ጊዴሰ።

<sup>8</sup> አሳይ ቢታ ሃኖታ ፒልጊ ጴላናሴኔ ጸፋናሰ ቡሰ ዶሚሺን ኢያሶይ፥ «ቢዲ ቢታይ ሃኖታ ፒልጊ ጴሊዲ ፓቲ ጸፊዳፔ ጉዬ ሃ ታኮ ሲሚ ዩቴ። ሃይሳን ሴሎን ጎዳ ሲንፋን ታ ኢንቴሰ ሳማ ዩጋና» ጊዴሰ።

<sup>9</sup> ሄሳ ጊሻሰ አሳይ ቢታ ዩዩ ጴሊዴሰ፤ ካታማታራ ኢሲፌ ላፑን ኬሲ ሻኪዲ ጸላ ዋራቃታን ጸፊዳ፤ ሄሳፌ ጌዴ ኢያሶኮ ሴሎ ሲሚ ቢዳ።

<sup>10</sup> ኢያሶይ ጎዳ ሲንፋን ሴሎን ኢስታሰ ሳማ ዩጊዴሰ፤ ቢታዮ ኢስራኤል አሳሰ ኢስታ ቆሞ ከና ጊሼቺ ኢሚዴሰ።

## በኢያሚ ቆሞታሰ ጋኪዳ ቢታ

<sup>11</sup> ኮይሮ ጊሻይ በኢያሚ ቆሞታ ኢስታ ዛርኬን ዛርኬን ጋኪዴሰ። ሳማን ኢስታ ጋኪዳ ቢታይ ዲዛሶይ ዩሁዳ ዛሬታ ቢታፌኔ ዮሴፌ ዛሬታ ቢታፌ ጊደን ጊዲሺን ሃይሳፌ ካሊዛይሳ፤

<sup>12</sup> ፑዴሃ ባጋራ ኢስታ ዛዋይ ዮርዳኖሴ ሻፋፔ ዶሚዲ፥ ኢያርኮ ፑዱንፋራ ኣጂ ቢዲ ኣርሼይ ዉሊዛ ባጋራ ቶቃ ቢታራ ኦይኪዲ ቤቲ-አዌኔራ ካንሌሰ።

13 ሄሳፌ ዱጌሃ ባጋራ ሎዛ ጌቴቴዛ ቤቴሌ ፑዱንላራ ካንሉዲ ዱጌ ባጋራ ዲዛ ቤቴ-ሆሮኔፔ ዱጌሃ ባጋራ ዲዛ ዙማ ኣቻራ ካንሉ ቢዲ ዱጌ ኣጻሮቴ-ኣዳሬ ጋኬስ።

14 ዱጌሃ ባጋራ ዲዛ ዛዋይ ቤቴ-ሆሮኔስ ሲንላ ባጋራ ዲዛ ዙምቡላፌ ዶሚዲ፥ ኣርሼይ ወሊዛ ባጋራ ዱጌሃ ባጋ ሚርቄቴዲ የሁዳ ቆሞታ ካታማ ጊዲዳ ቂሪያቴ-ባኣሌ ዋይኮ ቂሪያቴ-ዪኣሪሚራ ካንሉ ቤስ፤ ሄሲ ኣርሼይ ወሊዛ ባጋስ ዛዋ።

15 ዱጌሃ ባጋራ ዛዋይ ቂሪያቴ-ዪኣሪሚፔ ዶሚዲ ኔፍቶ ፑልቶ ሃላራ ካንሉስ።

16 ሄ ዛዋዚ ኤራፋይሜ ሾባፌ ፑዳሃ ባጋራ ዲዛ ሄኖሜ ና ሾባ ገናራ ዲዛ ዙምቡላ ቶሆሶ ዋዴስ፤ ሄፔ ያቡሴታ ካታማፔ ዱጌሃ ባጋራ ዲዛ ዱጉንላራ ሄኖሜ ዙሌ ዋዴዲ ኤን-ርጌሌራ ካንሉስ።

17 ቃሴ ፑዳሃ ባጋ ሚርቄቴዲ ኤን-ሸሚሽራ ቢዲ ጌሊሎቴራ ካንሉስ፤ ሄሳፌ ኣዲሚሜ ፑርዴ ገናራ ዲዛ ኦርቤሌ ና ቦሃኔ ሹቻኮ ዱጌ ዋዴስ።

18 ሄሳፌ ቤቴ-ኣራቤ ፑዱንላራ ካንሉዲ ዱጌ ኣራቤ ዋዴስ።

19 ሄሳፌ ቃሴ ቤቴ-ሆጊሌ ፑዱንላፌ ፑዳሃ ባጋራ ካንሉዲ፥ ዮርዳኖሴ ሻፋይ ጎጊ ጌሊዛሶ ማጺኔ ኣባፌ ጋና ባጋ ጋጻ ጋኬስ። ሄሲ ዱጌሃ ባጋስ ዛዋ።

20 ኣርሼይ ሞኪዛሶ ባጋራ ዮርዳኖሴ ሻፋይ ዛዋ። ቢኒያሜ ዛሬቴ ላቲዳ ቢታ ኡባሲካ ዛዋቴ ሄይታንታ።

21 ቢኒያሜ ዛሬቴ ባ ዛርኬን ዛርኬን ኤኪዳ ካታማቴ ኢያርኮ፥ ቤቴ-ሆጊሌ፥ ኣሚቅ-ኬዲጾ፥

22 ቤቴ-ኣራቤ፥ ዛማራይሜ፥ ቤቴሌ፥

23 ኣዊሚ፥ ፓራ፥ ኦፊራ፥

24 ካፌር-ኣሞናዬ፥ ኦፊናኔ ጌባ። ሃይቲ ባንታ ጉታታራ 12 ካታማታ።

25 ቃሴ ጌባኦኔ፥ ኤራማ፥ ቢኤሮቴ፥

26 ሚዲጳ፥ ካፊሬ፥ ሞጻ፥

27 ኤሬቄሚ፥ ዪርጺኤላ፥ ቴራላ፥

28 ጾላ፥ ሄሌፋ፥ ያቡሴታ ካታማ ዬሩሳላሜ፥ ጊቢኣኔ ቂሪያቴ-ዪኣሪሚ። ሃይቲ ባንታ ጉታታራ 14 ካታማታ። ቢኒያሜ ቆሞቲ ባንታ ዛርኬን ዛርኬን ላቲዳ ቢታይ ሃይታ።

## 19

ሲሞና ቆሞታ ጋኪዳ ቢታ

1 ናሞአንሉ ሳማይ ሲሞና ቆሞታ ኢስታ ዛርኬን ዛርኬን ጋኪደስ። ኢስታ ጋኪዳ ቢታይ ዩሁዳ ቆሞቲ ላቲዳ ቢታይ ኢስቲ ላቲዳ ቢታ ጊዶሊ ኡቲደስ።

2 ኢስቲ ላቲዳ ካታማቲ ቤርሳቤሄ፥ ሼባኤ፥ ሞላዴ፥

3 ሃጸሬ-ሹኣሌ፥ ባላ፥ ኤጾሜ፥

4 ኤልቶላዴ፥ ባቱሌ፥ ሆርማ፥

5 ጸጊላጌ፥ ቤቲ-ማርካቦቲ፥ ሃጸሬ-ሱሳ፥

6 ቤቲ-ላባኦቲኔ ሻሩሄኔ። ሄይቲ ኡባይ 13 ካታማታኔ ኢስታ ዩሾን ዲዛ ጉታታ።

7 ቃሴ አዩኔ፥ አርሞኔ፥ ኤቴሬኔ አሻኔ ጌቲቲዛ ኦይዱ ካታማታኔ ኢስታ ዩሾን ዲዛ ጉታታ።

8 ባኣላቲ-ባኤሬ ዎይኮ ኔጌቤን ዲዛ አራማቲሜ ጋካናስ ዲዛ ካታማታ ዩሾን ዲዛ ጉታታ ኡባ ላቲዳ። ሲሞና ቆሞቲ ባ ዛርኬን ዛርኬን ጊሼቲ ኤኪዳ ቢታቲ ሄይታንታ።

9 ዩሁዳ ቆሞቲ ኦይኪዳ ጸንጾይ ኬሂ ኣኮ ጊዲዳ ጊሻስ ሲሞና ቆሞታስ ጸንጾ ጊዲ አሜቲደስ፤ ሄሳ ጊሻስ ሲሞና ቆሞቲ ዩሁዳ ቆሞታ ጊሻፔ ጊሼቲ ኤካና ዳንዳይዳ።

### ዛቢሎኔ ቆሞታ ጋኪዳ ቢታ

10 ሂቭሉ ሳማይ ዛቢሎኔ ቆሞታስ ኢስታ ዛርኬን ዛርኬን ጋኪደስ። ኢስቲ ላቲዳ ቢታ ዛሞይ ሳሪዴ ጋኬስ።

11 ቃሴ ሄሳፌ ቢዲ አርሼይ ወሊዛሶራ ማራላ ባጋራ ካንሊ ቤስ፤ ዳባሼቲ ማታራ ዮቂናኦሜ ኣቻን ዲዛ ሻፋን ቢ ጌሌስ።

12 ሄራ ባጋራ ቃሴ ሳሪዴ ካታማፔ አርሼይ ሞኪዛሶ ባጋ ሲሚዲ ኪሲሎቲ-ታቦሬራ ካንሊ ቢዲ ዳቢራቲራ ጌዴ ያፊኣ ቤስ።

13 ሄራ ጌዴ አርሼይ ሞኪዛ ባጋራ ጌት-ሄፌሬኔ ኤቲ-ቃጺኔ ካንሊ ቤስ፤ ሄፔካ ጌዴ አርሞኔ ጋኪዲ ኒኣ ባጋ ሚርቄቲስ።

14 ፑዴሃ ባጋራ ሃናቶኔ ሲሚዲ ዪፍታሂኤሌ ሾባን ጋኪ ኤቄስ።

15 ቃሴካ ቃጽቲ፥ ናሂላሌ፥ ሺሚሮኔ፥ ኢዳሌኔ ቤቴሊሄሜ ጌቲቲዛ ካታማቲካ ዳቲስ። ኢስቲ ወሪ 12፤ ኢስታ ዩሾን ዲዛ ጉታቲካ ኢስታን ጉጃቲቲስ።

16 ሃይቲ ዛቢሎኔ ቆሞታስ ጸንጾ ጊዲዲ ኢስታ ዛርኬን ዛርኬን ጊሻን ጋኪዳ ካታማታኔ ጉታታ።

### ዪሳኮሬ ቆሞታ ጋኪዳ ቢታ

17 ኦይዳንሉ ሳማይ ዩሳኮሬ ቆሞታ ኢስታ ዛርኬን ዛርኬን ጋኪዴስ።

18 ኢስታ ቢታቲ ሃይሳፌ ካሊዛይታ፤ ኢዝራኤል፥ ካሱሎቴ፥ ሱኔሜ፥

19 ሃፋራኢሜ፥ ሺኦኔ፥ ኣናሃራቴ፥

20 ኤራቢቴ፥ ቂሶኔ፥ ኣቤዴ፥

21 ኤሬሜቴ፥ ኤን-ጋኒሜ፥ ኤን-ሃዳኔ ቤቲ-ጳጳጴ።

22 ሄ ቢታታ ዛዋይ ታቦሬ፥ ሻሃጹሜኔ ቤቲ-ሼሚሽ ቦቺ ቢዲ፥ ዮርዳኖሴ ሻፋን ጌሌስ። ኢስቲ ኡባይ ታማኔ ኡሱቱን ካታማታ፤ ኢስታ ዩሾን ዲዛ ጉታቲካ ኢስታን ጉጃቴቴስ።

23 ሃይቲ ዩሳኮሬ ቆሞታስ ጸንጾ ጊዲዲ ኢስታ ዛርኬን ዛርኬን ጊሻን ጋኪዳ ካታማታኔ ጉታታ።

#### ኣሴሬ ቆሞታ ጋኪዳ ቢታ

24 ኢቻሻንሉ ሳማይ ኣሴሬ ቆሞታ ኢስታ ዛርኬን ዛርኬን ጋኪዴስ።

25 ኢስታ ቢታቲ ሃይሳፌ ካሊዛይታ ሄልቃቴ፥ ሃሌ፥ ቤዴኔ፥ ኣኪሻፌ፥

26 ኣላሜሌኬ፥ ኣማዴኔ ሚሻሌ። ኣርሼይ ዉሊዛሶ ባጋራ ቃርሜሎሴራኔ ሺሆሬ-ሊቢናቴራ ዛዋቴስ።

27 ቃሴ ኣርሼ ኬሳሶ ባጋ ሲሚ ቤቲ-ዳጎኔኮ ሚርቄቲዲ፥ ዛቢሎኔ ቢታኔ ዩፍታሂኤሌ ሾባራ ካንሏ ቢዲ ካሱሌ ሃዲርሳ ቦላ ዩጊዲ ፑዴሃ ባጋራ ቤቲ-ኡሜቄኔ ናኢኤሌ ቤስ።

28 ሄሳፌ ቃሴ ኤቢሮኔ፥ ኤራሆቤ፥ ሃሞኔኔ ቃና ፑዴንላ ኬዚዲ ጌታ ሲዶና ጋኬስ።

29 ዛዋይ ኤራማ ሲሚዳፔ ጊምቤቲዳ ጸርሴ ካታማኮ ሚርቄቲ ጌዴ ሆሳ ሲሚዲ ኣኪዚቤ ባጋራኔ ማሂሌቤ ጌዴ ሜዲቴራኔ ኣባን ጋኪ ጌሌስ።

30 ሄን ኡማ፥ ኣፌቄኔ ኤራሆቤ ጌቲቲዛ ካታማቲካ ዴቴስ። ኢስቲ ኡባይ 22፤ ኢስታ ዩሾን ዲዛ ጉታቲካ ኢስታን ጉጃቴቴስ።

31 ሃይቲ ኣሴሬ ቆሞታስ ጸንጾ ጊዲዲ ኢስታ ዛርኬን ዛርኬን ጊሻን ጋኪዳ ካታማታኔ ጉታታ።

#### ኒፍታሌሜ ቆሞታ ጋኪዳ ቢታ

32 ኡሱቱንላ ሳማይ ኒፍታሌሜ ቆሞታ ኢስታ ዛርኬን ዛርኬን ጋኪዴስ።

33 ኢስታ ዛዋይ ሄሌፌፔኔ ዛናኒሜን ዲዛ ጌታ ዎላፔ ዶሚዲ ኣዳሜ-ኔቄቤ፥ ያቢንኤሌኔ ላቄሜ ካንሏ ቢዲ ዮርዳኖሴ ሻፋ ጌሌስ።

34 ዛዋዚካ ኦርሼይ ወሊዛ ባጋራ ኦዚኖቴ-ታቦሬኮ ሚርቄቴስ፤ ሃሳፌ ቃሴ ሁቆቄ ሲሚዲ ዱጌሃ ባጋራ ዛቢሎኔ ቢታኒኔ ኦርሼይ ጌሊዛ ባጋራ ኦሴሬ ቢታን ዛዋቲዲ ኦርሼይ ኬዚዛ ባጋራ ዮርዳኖሴ ሻፋን ጌሌስ።

35 ጊምቤቲዳ ካታማቲካ ጸዲሜ፥ ጸራ፥ ሃማቴ፥ ኤራቃቴ፥ ከኔሬቴ፥

36 ኣዳማ፥ ኤራማ፥ ሃጸሬ፥

37 ቃዴሴ፥ ኤዲራኤ፥ ኤን-ሃጸሬ፥

38 ዪሮኔ፥ ሚጊዳልኤሌ፥ ሆሬሜ፥ ቤቲ-ኣናቴኔ ቤቲ-ሸሚሼ። ኢሰቲ ወሪ 19፤ ኢሰታ ዩሾን ዲዛ ጉታቲካ ኢሰታን ጉጃቴቴስ።

39 ሃይቲ ኒፍታሌሜ ቆሞታስ ጸንጾ ጊዲዲ ኢሰታ ዛርኬን ዛርኬን ጊሻን ጋኪዳ ካታማታኔ ኢሰታ ዩሾን ዲዛ ጉታታ።

### ዳኔ ቆሞታ ጋኪዳ ቢታ

40 ላፑንላ ሳማይ ዳኔ ቆሞታ ኢሰታ ዛርኬን ዛርኬን ጋኪዳስ።

41 ኢሰቲ ላቲዳ ቢታቲ ጸራኣ፥ ኤሽታኦሌ፥ ኢር-ሼሚሼ፥

42 ሻኦልቢኔ፥ ኣያሎኔ፥ ዪታላ፥

43 ኤሎኔ፥ ቲሚና፥ ኣቃሮኔ፥

44 ኤልቴቄ፥ ጋባቶኔ፥ ባኣላቴ፥

45 ዩሁዳ፥ ባኔ-ባራቄ፥ ጌት-ኤርሞኔ፥

46 ሜያርቆኔ፥ ኤራቆኔኔ ዮጼ ካታማ ዩሾን ዲዛ ሄራታ ኡባ ኦይኬስ።

47 ጊዶ ኣቲን ዳኔ ቆሞታስ ኦሜቲዳ ጸንጾይ ኢሰታስ ጊዶንታ ኣጊዳ ጊሻስ ላይሻ ካታማ ኦሊ ኦይኪዳ፤ ሄ ካታማን ዲዛ ኣሳ ጊላ ማሻን ሲፊ ወርሲዲ ካታማ ባስ ኤኪዲ ሄን ኡቲዳ። ሄ ካታማ ሱንላካ ላሚዲ ባ ኣዋ ዳኔ ሱንላን ጸይጊዳ።

48 ሃይቲ ዳኔ ቆሞታስ ጸንጾ ጊዲዲ ኢሰታ ዛርኬን ዛርኬን ጊሻን ጋኪዳ ካታማታኔ ጉታታ።

### ኢያሱ ጋኪዳ ቢታ

49 ኢሰራኤሌ ኣሳይ ባንታና ጋኪዳ ቢታ ኤኪዳፔ ጉዬ ናዌ ና ኢያሱስ ባንታ ቢታፌ ጸንጾ ጋዴ ኦሚዳ፤

50 ጎዳይ ኣዛዚዳ ማላኔ ኢያሱይ ኮይዛ ማላ ኤፍሬሜ ጌዜ ዴሬን ዲዛ ቲሚናቴ-ሴራሃ ጌቲቲዛ ካታማ ኢዛስ ኢሚዳ። ኢዚካ ካታማዮ ሎኤሊዲ ባስ ዱሳሶ ኦሊዳስ።

51 ቄሴ ኤልኤዘሬይ፥ ናዌ ና ኢያሱይኔ ኢስራኤል ቆሞታ ኮራፒኔቲ ሴሎን ጋይቶቴላ ዱንካኔዛ ፔንጌን ጎዳ ሲንላን ሳማ ዩጊዲ ጊሺዳ ጸንጾ ቢታይ ሃይሳ። ኢስቲ ቢታ ጊሼሬላ ጊጊዳ።

## 20

### ባቃቲ ቢ ኣቲዛ ካታማታ

1 ሄሳፌ ጉዬ ጎዳይ ኢያሱ፥

2 «ታኒ ሙሴ ባጋራ ዮቲዳ ማላ ኣሲ ባቃቲ ኣቲዛ ካታማታ ሻካና ማላ ኢስራኤል ኣሳሰ ዮታ፤

3 ኣይ ኣሲካ ኤርንታኔ ኣኬኮንታ ኣሰ ዋዲኮ ሄ ባቃቲ ቢዲ ሱላ ኣጮፔ ኣታና።

4 ኣሰ ዋዲዳይ ሄ ካታማታፔ ኣሳኮ ባቃቲ ቢዲ ካታማ ጌሊዛ ፔንጌን ኤቂዲ፥ ሃኒዳይሳ ሄ ካታማ ጨማታሰ ዮቶ። ኢስቲካ ባንታ ካታማ ኤፊዲ ኢዚ ዳኣናሶ ኢሚኮ ኢዚ ኢስታራ ሄን ዴኦ።

5 ሱላ ኣዛራና ኮይዛይ ኢዛ ካሊዲ ዩኮ ሄ ካታማ ጨማቲ ኢዛ ኣሊ ኢሞፌቶ። ጋሶይካ ባ ሾርዛ ኢዚ ኦዲ ሞርኬቴላ ጊሻሰ ዋዲቤና።

6 ዴራ ሲንላን ፐርዳሰ ኢዚ ኤቃና ጋካናሲኔ ሄ ዋዴን ዲዛ ቄሴታ ሃላቃይ ሃይቃና ጋካናሰ ሄ ካታማን ዴኦ። ሄሳፌ ጉዬ ባቃቲዲ ኬዚዳ ካታማ ጉዬ ሲሚዲ ባ ሶ ጌሎ» ጊዴሰ።

7 ሂስቲን ኢስራኤል ኣሳይ ኒፍታሌሜ ጌዜ ዴሬ፥ ጋለላን ዲዛ ቃዴሴ፥ ኤፍሬሜ ጌዜ ዴሬን ዲዛ ሴኬሜን ዲዛ ሻራ ሜንሶ ቦላኔ ዩሁዳን ሻራ ሜንሶን ዲዛ ቂሪያቴ-ኣርባኤ ዋይኮ ኬብሮኔ ዲማሲዳ።

8 ዮርዳናሴ ሻፋፔ ሄ ፒንላን፥ ኢያርኮፌ ኣርሼይ ሞከዛ ባጋራ ኦርቤሌ ቆሞታ ጸንጾ ጊዶን ባዞን ታቃሶ ቦላ ዲዛ ባጸራ፥ ጋዴ ቆሞታ ጸንጾፌ ጋላኣዴን ዲዛ ኤራሞቴኔ ሚናሴ ቆሞታ ጸንጾፌ ባሳኔን ዲዛ ጎላኔ ዲማሲዳ።

9 ኢስራኤል ኣሰ ኡባሲኔ ኢስታ ጊዶን ዲዛ ቤቴታሰ ዲማሲዳ ካታማቲ ሃይታ፤ ኤርንታ ዲሼ ኣሰ ዋዲዳ ኣይ ኣሲካ ዴራ ሲንላን ኤቃና ጋካናሰ ሱላ ኣዛራና ኮይዛዴ ኩሼን ሃይቆንታ ማላ ሄ ካታማታፔ ኣሳኮ ባቃታናሰ ዳንዳዬሰ።

# 21

## ለዌታስ ኢሜቲዳ ካታማታ

1 ለዌ ዛርኬታ ካሌሊዛይቲ ቄሴ ኤልኤዜሬኮ፡ ናዌ ና ኢያሱኮኔ ኢሰራኤል ዛሬታ ኣዋታኮ ሸቂዳ።

2 ካናኔ ቢታን ዲዛ ሴሎን ኢሰታስ፡ «ኮኒ ዴኣና ካታማታኔ ኮ ሜሄ ሄንሳሶሆታ ኢንቲ ኑስ ኢማና ማላ ጎዳይ ካሴ ሙሴ ባጋራ ኣዛዚ ዋሊዳስ» ጊዳ።

3 ሂሰቲን ጎዳይ ኣዛዚዳ ማላ ኢሰራኤል ኣሳይ ለዌ ቆሞታስ ባ ላቲዳ ጸንጾታፕ ሃ ካታማታኔ ሜሄ ሄንሳሶሆታ ቃንጺ ኢሚዳ።

4 ኮይሮ ሳማይ ቃኣቲ ዜሬላታስ ኢሰታ ዛርኬን ዛርኬን ኬዚዳስ። ቄሴ ኣሮኔ ዛሬ ጊዲዳ ለዌታስ ዩሁዳፕ፡ ሲሞናፕኔ ቢኒያሚ ቆሞታፕ 13 ካታማቲ ሳማን ጋኪዳ።

5 ሃንኮ ኣቲዳ ቃኣቲ ዜሬላታስ ኤፍሬሜፕ፡ ዳኔፕኔ ሚናሴስ ባጋ ቆሞታፕ 10 ካታማቲ ሳማን ጋኪዳ።

6 ጌርሾኔ ዜሬላታስ ዩሳኮሬፕ፡ ኣሴሬፕ፡ ኒፍታሌሜፕኔ ባሳኔን ዲዛ ሚናሴስ ባጋ ቆሞታፕ 13 ካታማቲ ሳማን ጋኪዳ።

7 ሜራራ ዜሬላታስ ኢሰታ ዛርኬን ዛርኬን ኦርቤሌፕ፡ ጋዴፕኔ ዛቢሎኔ ቆሞታፕ 10 ካታማቲ ሳማን ጋኪዳ።

8 ጎዳይ ሙሴ ባጋራ ኣዛዚዳ ማላ፡ ኢሰራኤል ኣሳይ ሃ ካታማታኔ ሜሄ ሄንሳሶሆታ ለዌታስ ሳማን ኢሚዳ።

9 ዩሁዳፕኔ ሲሞና ቆሞታፕ ሃይሳፌ ካሊ ዲዛ ካታማታ ሳማን ጋሊዳ።

10 ኮይሮ ሳማይ ለዌ ቆሞ ቃኣቲፕ ዩሌቲዳ ኣሮኔ ዛሬታስ ኬዚን ኢሰታስ ኢሜቲዳ ካታማቲ ሃይሳፌ ካሊዛይታ።

11 ሄይቲካ ዩሁዳ ቢታን ጌዜቲዛሶን ዲዛ ኬብሮኔ ጌቲቲዛ ቂሪያቲ-ኣርባኤኔ ኢዛ ዩሾን ዲዛ ሜሄ ሄንሳሶሆታ ኢሰታስ ኢሚዳ። (ኣርባኤይ ኤናቄ ኣዋ።)

12 ጊዳ ኣቲን ሄ ካታማ ዩሾን ዲዛ ሜሄ ሄንሳሶሆታኔ ሞላታ ዮፊኔ ና ካሌቤስ ጸንጾ ሂሰቲ ኢሚዳ።

13 ቄሴ ኣሮኔ ዛሬታስ ኣስ ዋጲዳ ኣሲ ባቃቲ ቢዲ ኣቲዛ ኬብሮኔኔ ሊቢና ካታማታ ኢሰታ ሜሄ ሄንሳሶሆራ ኢሲፌ ጋሊ ኢሚዳ።

14 ዩቲሬኔ ኤሽታሞኣ፡

15 ሆሎኔኔ ዳቢሬ፡

16 አደኔ፥ ዩጳ፥ ቤተ-ሾሚሼኔ ኢስታ ሜሄ ሄንሳሶሆራ ኢሲፌ ጋሊ ኢሚዳ። ሃይቲ ኡዲፋን ካታማቲ ዩሁዳ ቆሞታፔኔ ሲሞና ቆሞታ ጸንጾፌ ጊሼቲ ኢሜቲዳይታ።

17 ቢኒያሜ ቆሞታፔ ጌባኦኔ፥ ጌባ፥

18 አናቶቲ፥ አልሞኔ ጌቲቲዛ ኦይዱ ካታማታኔ ኢሰቲ ሜሄ ሄሚዛሶሆራ ኢሲፌ ጋሊ ኢሚዳ።

19 ቄሴ አሮኔ ዜሬሳታሰ ሜሄ ሄንሳሶሆራ ኢሲፌ ጋሊዱ 13 ካታማታ ኢሚዳ።

20 ሃንኮ ኣቲዳ ሌዌ ና ቃኣቲ ዛሬታሰ ኤፍሬሜ ቆሞታፔ ሃይሳፌ ካሊ ዱዛይሲ ሳማን ጋኪዴሰ።

21 ኤፍሬሜ ጌዜ ዳሬን ዱዛ አሰ ዋዲዳ አሲ ባቃቲ ቢዱ ኣቲዛሶ ሴኬሜኔ ጌዜሬ፥

22 ቂቢጻይሜ፥ ቤቲ-ሆሮኔኔ ኢስታ ሜሄ ሄንሳሶሆራ ኢሲፌ ጋሊዱ 4 ካታማታ ኢሚዳ።

23 ዳኔ ቆሞታፔ ኤልቲቄ፥ ጋባቶኔ፥

24 አያሎኔ፥ ጌት-ኤርሞኔኔ ኢስታ ሜሄ ሄንሳሶሆራ ኢሲፌ ጋሊ 4 ካታማታ ኢሚዳ።

25 ሚናሴ ቆሞታሰ ባጋታፔ ታኢናኬ፥ ጌት-ኤርሞኔ ሜሄ ሄንሳሶሆራ ኢሲፌ ጋሊ 2 ካታማታ ኢሚዳ።

26 ሃይቲ 10 ካታማቲ ኡባይ ሜሄ ሄንሳሶሆራ ኢሲፌ ሃንኮ ኣቲዳ ቃኣቲ ዛሬታሰ ኢሜቲዳሰ።

27 ሚናሴ ዛሬታ ባጋታፔ አሰ ዋዲዳ አሲ ባቃቲ ቢዱ ኣቲዛ፥ ባሳኔን ዱዛ ጎላኔ ካታማ ሜሄ ሄንሳሶሆራ ባኤሽቲራ ሜሄ ሄንሳሶሆራ፥ ናሞኡ ካታማታ ኡባ ኤኪዱ፥ ጌርሾኔ ዛሬ ጌዱዳ ሃራ ሌዌታሰ ኢሚዳ።

28 ዩሳኮሬ ዛሬታፔ ቂሶኔ ሜሄ ሄንሳሶሆራ፥ ዳቢራቲ ሜሄ ሄንሳሶሆራ፥

29 ያርሙቲ ሜሄ ሄንሳሶሆራ፥ ኤን-ጋኒሜ ሜሄ ሄንሳሶሆራ፥ ኦይዱ ካታማታ ኡባ ኤኪዱ ኢሚዳ።

30 አሴሬ ዛሬታፔ ሚሻሌ ሜሄ ሄንሳሶሆራ፥ አብዶኔ ሜሄ ሄንሳሶሆራ፥

31 ሄልቃቲ ሜሄ ሄንሳሶሆራኔ ኤራሆቤ ሜሄ ሄንሳሶሆራ፥ ኦይዱ ካታማታ ኡባ ኤኪዱ ኢሚዳ።

32 ሄሳላካ ኒፍታሌሜ ዛሬታፔ አሰ ዋዲዳ አሲ ባቃቲ ቢዱ ኣቲዛ ጋሊላን ዱዛ ቃዴሴ ሜሄ ሄንሳሶሆራ፥ ሃሞቲ-ዶሬ ሜሄ ሄንሳሶሆራ፥ ቃርታ ሜሄ ሄንሳሶሆራ፥ 3 ካታማታ ኡባ ኤኪዱ ኢስታሰ ኢሚዳ።

33 ጌርሾኔ ዛሬ ታ ካታማቲኔ ኢስታ ሜሄታ ሄንሳሶሆቲ ኡባይ ታማኔ ሄሻ።

34 ኣቲዳ ሜራሬ ዛሬ ጌዲዳ ሌዌታስ ኢማቲዳ ቢታቲ ዛቢሎኔ ዛሬታፔ ዮቂናኣሜ ሜሄ ሄንሳሶሆራ፥ ቃርታ ሜሄ ሄንሳሶሆራ፥

35 ዲሚና ሜሄ ሄንሳሶሆራ፥ ናሂላሌ ሜሄ ሄንሳሶሆራ፥ ኦይዱ ካታማታ ኡባ ኤኪዲ ኢሚዳ።

36 ኦርቤሌ ዛሬታፔ ባጺራኔ ሜሄ ሄንሳሶሆታ፥ ያሃጼኔ ሜሄ ሄንሳሶሆታ፥

37 ቂዲሞቲኔ ኢዚ ሜሄ ሄንሳሶሆታ፥ ማፋኣቲኔ ሜሄ ሄንሳሶሆታ፥ ሃይታ ኦይዱ ካታማታ ኡባ ኤኪዲ ኢስታስ ኢሚዳ።

38 ቃሴ ጋዴ ዛሬታፔ ኣስ ዋጂዳ ኣሲ ባቃቲ ቢዲ ኣቲዛ፥ ጋላኣዴን ዲዛ ኤራሞቲ ሜሄ ሄንሳሶሆራ፥ ማሃናይሜ ሜሄ ሄንሳሶሆራ፥

39 ሃሴቦኔ ሜሄ ሄንሳሶሆራ፥ ኢያዜሬ ሜሄ ሄንሳሶሆራ፥ ሃይታ ኦይዱ ካታማታ ኡባ ኤኪዲ ኢስታስ ኢሚዳ።

40 ሜራሬይ ዛሬ ጌዲዳ ሃራ ሌዌታስ ጌሻን ጋኪዳ ካታማቲ ኡባይ ታማኔ ናሞኣ።

41 ኢስራኤሌ ኣሳይ ላቲዳ ቢታን ዲዛ ሌዌታስ ኢማቲዳ ካታማቲ ኢስታ ሜሄ ሄንሳሶሆራ ኡባይ ኢሲ ቦላ ኦይዱ ታማኔ ኦስቸና።

42 ሄ ካታማታ ኡባ ዩሾን ሜሄ ሄሚዛሶሆቲ ዴቲስ። ሜሄ ሄሚዛሶሆይ ባይንዳ ካታማይ ዴና።

43 ሄሳሶ ኦላዲ ጎዳይ ኢስታ ኣዋታስ ኢማናስ ጫቂዳ ቢታ ኡባ ኢስራኤሌ ኣሳስ ኢሚዴስ፤ ሂስቲን ኢስቲ ላቲዲ ሄን ዴኢዳ።

44 ጎዳይ ኢስታ ኣዋታስ ጫቂዳ ማላ ኢስታ ዩሾን ዲዛ ኡባታፔ ኢስታ ሼሞፒሲዴስ። ጎዳይ ኢስታ ሞርኬታ ኡባ ኢስታስ ኣላ ኢሚዳ ጌሻስ ኢስታ ሞርኬታፔ ኢሶይካ ኢስታራ ኤቂታናስ ዳንዲይቤና።

45 ጎዳይ ኢስራኤሌ ኣሳስ ኢማና ጌዳ ሎኦ ቃላ ኡባ ፖሊዴስ ኣቲን ኢሶይኔ ሳኣን ዋጂ ኣቲቤና።

## 22

ባንታሶ ሲሚዳ ኣርሼይ ሞኪዛ ባጋራ ዲዛ ቆሞታ

1 ሄሳፌ ጉዬ ኢያሶይ ኦርቤሌ ቆሞታ፥ ጋዴ ቆሞታኔ ሚናሴ ቆሞታፔ ባጋታ ዴይጌዴስ።

2 ሂስቲዲ፥ «ጎዳ ኣይሌ ሙሴይ ኢንቴና ኣዛዚዳይሳ ኡባ ናጌዴታ፤ ቃሴ ታኒካ ኣዛዚዳይሳ ሙሌራ ፖሊዴታ።

3 ዳር ዋዴ፤ ደሚዲ ሃቕ ጋካናሰ ኢንቴ ኢንቴ ኢሻታ ዩጊቤኬታ፤ ጎዳ ኢንቴ ጸሳይ ኢንቴሰ ኢሚዳ ሃዳራ ፖሊዳታ።

4 ሄኮ ጎዳ ኢንቴ ጸሳይ ኢንቴሰ ኢሚዳ ሂዳታ ቃላ ማላ ኢንቴ ኢሻታ ሼምፒሲዳሰ። ሄሳ ጊሻሰ ጎዳ ኣሸካራ ሙሴይ ኢንቴሰ ዮርዳኖሴ ሻፋፔ ሄ ፒንፋን ኢሚዳ ላታ ቢታን ዲዛ ኢንቴ ሶ ሶ ሲሚቴ።

5 ጎዳ ኣይሌ ሙሴይ ኢንቴና ኣዛዚዳ ኣዛዞዛኔ ዋጋ ኢንቴ ናጊቴ። ጎዳ ኢንቴ ጸሳ ሲቁቴ፤ ኢዛ ኦጌታ ኡባን ሲሜሬቲቴ፤ ኢዛ ኣዛዞታ ፖሊቴ፤ ኢዛካ ሚንሳ ኦይኪቴ፤ ኢንቴ ኩሜላ ዋዚናፔኔ ኩሜላ ሼምፖሬ ኢዛሰ ኦፋና ማላ ኢዚ ኢሚዳ ኣዛዞታኔ ዋጋታ ሚንሳ ናጊቴ» ጊዳሰ።

6 ሄሳሬ ጉዬ ኢያሶይ ኢሰታ ኣንጂ ዬዲን ኢሰቲካ ባንታ ሶ ሶ ሲሚ ቢዳ።

7 ሙሴይ ሚናሴ ቆሞሬ ባጋታሰ ባሳኔ ቢታን ጸንጾ ኢሚዳሰ፤ ሃንኮ ኣቲዳ ባጋታሰ ኢያሶይ ዮርዳኖሴ ኣርሼይ ወሊዛ ባጋሬ ኢሰታ ኢሻታ ጊዶን ኢሰታሰ ጸንጾ ኢሚዳሰ። ኢያሶይ ኢሰታ ባንታ ሶ ሶ ሲማና ማላ ዋይዚዛ ዋዴ ኢሰታ ኣንጂሼ።

8 «ቤኢቴ፡ ኢንቴ ሃኢ ዳር ኣቆታ ኤኪዲ፡ ዳር ሜሄ ወዴ፡ ቢራ፡ ዋርቃ፡ ጸርቂማላ፡ ቢራታኔ ዳር ማይኦ ኤኪዲ ኢንቴ ሶ ሲሚቴ። ሄሳ ጊሻሰ ኢንቴ ሞርኬታፔ ዲኤቲዳይሳ፡ ኢንቴ ኢሻታራ ጊሼቲ ኤኪቴ» ጊዳሰ።

9 ሄሳ ጊሻሰ ኦርቤሌ ቆሞቲኔ ጋዴ ቆሞቲ ሄሳቶካ ሚናሴ ቆሞሬ ባጋቲ ኢሰራኤሌ ኣሳ ካናኔን ዲዛ ሴሎን ኣጊዲ ካሴ ሙሴ ባጋራ ጎዳ ኣዛዞን ላታ ኤኪዳ ጸንጾን ጋላኣዴ ሲሚ ቢዳ።

### ዮርዳኖሴ ሻፋ ማታን ኦሴቲዳ ያርሾሶሆ

10 ኦርቤሌ ቆሞቲ፡ ጋዴ ቆሞቲኔ ሚናሴ ቆሞታፔ ባጋቲ ዮርዳኖሴ ሻፋ ማታን ካናኔ ቢታን ዲዛ ጋላኣዴ ዪዳ ዋዴ ሻፋ ማታን ጌታ ያርሾሶሆ ጊግሲዳ።

11 ሂሰቲን ኢሰቲ ኢሰራኤሌ ቢታን፡ ካናኔ ዛዋን፡ ጋዴን ጌታ ያርሾሶሆ ጊግሲዳይሳ ሃራ ኢሰራኤሌ ኣሳይ ሲዪዳ ዋዴ

12 ኩሜላ ኢሰራኤሌ ኣሳይ ኢሰታ ኦላና ባናሰ ሴሎን ኢሲሬ ሸቂዳሰ።

13 ሂሰቲዲ ኢሰራኤሌ ኣሳይ ቄሴ ኤልኤዜሬ ና ፊኒሃሴ፡ ጋላኣዴ ቢታን ዲዛ ኦርቤሌ ቆሞታኮ፡ ጋዴ ቆሞታኮኔ ሚናሴ ቆሞታፔ ባጋታኮ ኪቲዳሰ።

14 ኩሜላ ኢስራኤል ቆሞታ ባ ቆሞታ ሃላቃታ፤ ኢሲ ኢሲ አስ ደሪዲ፡ ታሙ አስ ፊኒሃሴራ ጋሊ ዩዲዴስ፡ ሃይቲ ኢሶይ ኢሶይ ኢስራኤል ቆሞታ፤ ዩዲ ባንታ ዛርኬን ዛርኬን ደሬቲዳ ሃላቃታ፡፡

15 ኢስቲ ኦርቤሌ ቆሞቲ፡ ጋዴ ቆሞቲኔ ሚናሴ ቆሞታ፤ ባጋቲ ዲዛ ጋላኣዴ ቢታ ቢዲ ኢስታስ፡

16 «ጎዳ አሳይ ኩሜላ ኢንቴና፡ ሲስራኤል ጸሳ ቦላ ኣይሰ ሃይሳ ማላ ኢታ ኦሊዴቲ? ዋኒዲ ኢንቴ ሃራ ያርሾ ያርሺዛሶ ኢንቴሰ ገግሲዴቲ? ጎዳ ቦላ ዋኒ ማካሊዴቲ? ኢዛ ካሊዛይሳካ ዋኒዲ አጊዴቲ?

17 ፔኦሬን ኮኒ ኦሊዳ ናጋራይ ኮስ ጊዴኔ? ኢስራኤል ዴራ ቦላ ቦሻይ ዋዲዳ ጊዲኮካ ሃች ጋካናሰካ ኮኒ ሄ ናጋራ፤ ጌዪቦኮ፡፡

18 ኢንቴ ሃኢካ ጎዳ ካሊዛይሳ አጊዲ ጉዬ ጉዬ ጌቲ?

« ኢንቴ ሃች ጎዳ ቦላ ማካሊኮ ኢዚ ዋንቶ ኩሜላ ኢስራኤል ዴራ ሃንቄታና፡፡

19 ኢንቴ ላቲዳ ቢታይ ቱኒዳ ጊዲኮ ጎዳ ዱንካኔይ ኤቂዳ ጎዳ ቢታ ሃ ዩዲ፡ ኦናራ ጋዴ ገሼቲ ኤኪቴ፡፡ ጊዳ አቲን ካሴፔ ዲዛ ጎዳ ኦ ጸሳ ያርሾሶ፤ ሃራ ያርሾሶሆ ገግሲዲ ጎዳ ቦላ ዋይኮ ኦ ቦላ ማካሎፍቴ፡፡

20 ዛራሄ ና አካኔይ ፒላ ጊዲዳይሳ ኤኪዲ፡ ናጋራ ኦሊዳ ገሻስ፡ ኩሜላ ኢስራኤል ዴራ ቦላ ጎዳ ሃንቆይ ዋዲቤኔ? ኢዛ ናጋራ ጋሶን ሃይቂዳይ ኢዛ ጸላላ ጊዴና፡ ጌቲስ» ጊዳ፡፡

21 ሂሰቲን ኦርቤሌ ቆሞቲ፡ ጋዴ ቆሞቲኔ ሚናሴ ቆሞታ፤ ባጋቲ ኢስራኤል ቆሞታ ሃላቃታስ ዛሪዲ፡

22 «ጎዳይ ዋልቃማ ጸሳይ! ጎዳይ ዋልቃማ ጸሳይ! ኮኒ ሃይሳ ኣይሰ ኦሊዳኮ ኢዚ ኤሬስ! ኮኒ ኣይሰ ኦሊዳኮ ኢንቴካ ኤራና ማላ ኮዮስ፡፡ ኮኒ ሃይሳ ኦሊዳይ ማካላቴላኒኔ ጎዳስ አዛዜቴላ ኢጸን ጊዲኮ፡ ሃች ኦና ማሮፒቴ፡፡

23 ኮኒ ጎዳ ካሊዛይሳ አጊዲ ጽጌቲዛ ያርሾ፡ ካላ ያርሾኔ ኢሲፊቴላ ያርሾ ያርሻናስ ቆፒዲ ገግሲዳ ጊዲኮ፡ ጎዳይ ኦ ቦላ ባ ሃሎ ኬሶ፡፡

24 ኮኒ ሄሳሶ ኦሊዳይ ሲንፋፌ ያና ኢንቴ ዜሬላቲ ኦ ዜሬላታ፡ ሳዳ ኢስራኤል ጸሳራ ኢንቴስ አዛ ጋይቶቴላ ዲዜ?

25 ኢንቴኖ ኦርቤሌኔ ጋዴ ቆሞቶ፡ ጎዳይ ኦ ጊዳኒኔ ኢንቴ ጊዳን ዮርዳኖሴ ሻፋን ዛዋ ዛሪዳ ገሻስ፡ ጎዳን ኢንቴና ጋሊዛ ሚሺ

ዴና ጊዲ አንቴ ዛሬቲ ኑ ዛሬታ ጎዳሰ ጎይናንታ ማላ ቴቆንታ ኣጌቴና ጊ ሂርጊደስ» ጊዳ።

26 «ሄሳ ጊሻስ፡ ኦኒ ኑ ጊደን ያርሾ ያርሺዛሶሆ እኔ ኦላስ፤ ጊደ ኣቲን ጸጌቲዛ ያርሾስ ዋይኮ ሃራ ያርሾስ ጊዴና ጊዳይ ሄሳሳ።

27 ኦኒ ያርሾሶሆ ጊግሲዳይ ጸጌቲዛ ያርሾ፡ ኢሲፊቴፋ ያርሾኔ ሃራ ያርሾ ያርሺዲ፡ ጎዳሰ ኢዛ ዴንካኔን ጎይኒዛይሳ ሃይሲ ያርሾሶሆዚ ኑ ጊደኒኔ አንቴ ጊደን፡ ቃሴ ኑፔ ካሊዛ ዩሌታታ ጊደን ማርካ ጊዳና። ዋይፔ አንቴ ዜሬፋቲ ኑ ዜሬፋታ፡ ኦኒቴና ጎዳን ጋሊዛይ ኣይኮይካ ዴና ጋናሰ ዴንዳይቴና።

28 ኢሰቲ ኑና ዋይኮ ኑ ዜሬፋታ ዋይፔ ሄሳሶ ጊኮ ኦኒ ኢሰታሰ ዛሬዲ፡ «ሂኮ! ኑ ኣዋቲ ጎዳሲ ያርሺዛሶሆ ለሚሶ ኦሊዳይሳ ቤአቲ። ሃይሳ ኑ ኣዋቲ ጸጌቲዛ ያርሾኔ ሃራ ያርሾ ያርሻናሰ ጊደንታ፡ አንቴፊኔ ኑፔ ጊደን ማርካ ጊዳና ማላ ጊግሲዳ ጋና።

29 ጎዳ ኑ ጸሳ ዴንካኔዛ ሲንፋን ኤቁዳ ያርሾ ያርሺዛሶሆፔ ሃራ፡ ጸጌቲዛ ያርሾ፡ ካፋ ያርሾኔ ሃራ ያርሾ ያርሺዛሶሆ ጊግሲዲ ጎዳ ቦላ ማካሎይ ኑፔ ሃኮ!» ጊዳ።

30 ቁሴ ፊኒሃሲኔ ኢዛራ ዲዛ ኢሰራኤሌ ቆሞታ ሃላቃቲ፡ ኦርቤሌ፡ ጋዴኔ ሚናሴ ቆሞቲ ዮቲዳይሳ ሲዩዲ፡ ኬሂ ኡፋይቲዳ።

31 ቁሴ ኤልኤዜሬ ና ፊኒሃሲ ኦርቤሌ፡ ጋዴኔ ሚናሴ ቆሞታሰ፡ «ጎዳይ ኑ ጊደን ዲዛይሳ ኦኒ ሃች ኤሪደስ፤ ኣይሰ ጊኮ ሃ ዮኦዛ አንቴ ጎዳ ቦላ ማካላናሰ ኦሊቤኬታ። አንቴ ሃኢ ጎዳ ሃንቆፊ ኢሰራኤሌ ኣሳ ኣሺዴታ» ጊዴስ።

32 ሄሳፊ ጉዬ ቁሴ ኤልኤዜሬ ና ፊኒሃሲኔ ዴራ ካሌሊዛይቲ ጋላኣዴን ዲዛ ኦርቤሌኔ ጋዴ ቆሞታራ ሃሳይቲዳፔ ጉዬ ካናኔን ዲዛ ኢሰራኤሌ ኣሳኮ ሲሚዳ፤ ሂሰቲዲ ሃኒዳይሳ ኢሰታሰ ዮቲዳ።

33 ኢሰራኤሌ ኣሳይ ሄሳ ሲዩዲ ኡፋይሳን ጸሳ ጋላቲዴስ። ቃሴ ኦርቤሌ ቆሞቲኔ ጋዴ ቆሞቲ ዲዛ ቢታ ኦሊ ዳይሳናሰ ባና ጊዳይሳ ኣጊዴስ።

34 ኦርቤሌይኔ ጋዴ ቆሞቲ፡ «ጎዳይ ኢዚ ጸሳ ጊዲዳይሳሰ ሃይሲ ኑ ጊደን ማርካ» ጊዲ ያርሾሶሆዛ፡ «ማርካ» ጊ ሱንሊዳ።

## 23

ኢያሱይ ዴራ ካሌሊዛይታሰ ዮቲዳ ወርቤፋ ቃላ

1 ዳር ወደሰ ጎዳይ ኢስራኤል አሳ ኢስታ ዩሾን ዲዛ ሞርኬታ ኡባፌ ሽሞፒሲዴስ። ሄ ወደ ኢያሱይ ጨሚዲ ኬሂፔ ወደ ሱጊዴስ።

2 ኢያሱይ ኢስራኤል አሳ ኡባ፡ ጨማታ፡ ሹሜታ፡ ዳናታኔ ፒርዲዛይታ ኢሲፌ ያይጊ ሺሺዲ፡ «ታኒ ጨማዲስ፡ ወደይካ ታስ ኬሂ ቢዴስ።

3 ጎዳ ኢንቲ ያሳይ ኢንቲ ጊሻስ ሃ ካዋቱላታ ቦላ ኦሊዳ ኡባ ሚሽ ኢንቲ ኢንቲ አይፌን ቤዪዴታ። ኢንቲ ጊሻስ ኦሌቲዳይ ጎዳ ኢንቲ ያሳ።

4 ቤኢቲ፡ ዮርዳኖሴ ሻፋፔ ዶሚዲ አርሼይ ወሊዛሶ ባጋን ሜዲቲራኔ አባ ጋካናስ ዲዛሶታ ኡባ፡ ኢንቲ ያኒዳ ካዋቱላታፔ ኢንቲ ቡር ላቶንታ ቢታታ ታኒ ኢንቲ ቆሞታስ ሳማን ሳማን ዋስታ ጊሺዳኮ አኬኪቲ።

5 ጎዳ ኢንቲ ያሳይ ኢስታ ኢንቲ ሲንፋፌ ኢስቲ ዲዛሶዛፔ ኢስታ ዬዳላና፤ ጎዳ ኢንቲ ያሳይ ኢንቲስ ኢሚዳ ሂዶታ ቃላ ማላ ኢንቲ ኢስታ ቢታ ላታና።

6 «ሚኒቲ! ሃዲርሲኔ ኡሻኝ ጎፒቲ፤ ሙሴ ዋጋ ማጽፋን ጸፊቲዳ ኡባ ናጋናሲኔ ኦላናስ ኬሂፔ ሚኒቲቲ።

7 ሃይታ ኢንቲ ጊዶን አቲዳ ካዋቱላታራ ኢሲፌቶፍቲ፤ ኢስታ ኤቃ ያሳታ ሱንፋ ያይጎፒቲ፤ ኢስታ ሱንፋን ጫቆፍቲ፤ ኢስታስ ኦሶፍቲኔ ጎይኖፍቲ።

8 ጊዶ አቲን ሃኝ ጋካናስ ኢንቲ ኦሊዳ ማላ ጎዳ ኢንቲ ያሳ ሚንሊ ኦይኪቲ።

9 «ጎዳይ ጊታኔ ሚኖ ካዋቱላታ ኢንቲ ሲንፋፌ ጎዳ ኬሲዴስ፤ ሃኝ ጋካናስ ኦኒካ ኢንቲናራ ኤቄታናስ ዳንዳይቤና።

10 ጎዳ ኢንቲ ያሳይ ኢንቲስ ኢሚዳ ሂዶታ ቃላ ማላ ኢዚ ኦሌቲዛ ጊሻስ ኢንቲፌ ኢሲ አሲ ሺ አሰ ዬዳላና።

11 ሄሳ ጊሻስ ጎዳ ኢንቲ ያሳ ሚኒ ሲቁቲ።

12 ጊዶ አቲን ኢንቲ ጉዬ ሲሚዲ ሃንኮ አቲዳ ኢንቲናራ ዲዛ ካዋቱላታራ ኢንቲ ኢሲፌቲኮ፡ ኤኮን ጌሎን ኢስታራ ኢሲፌ ዋላኬቲኮ።

13 ጎዳ ኢንቲ ያሳይ ሃይሳፌ ጉዬ ኢንቲ ሲንፋፌ ኢስታ ኬሲ ጎዶንታይሳ ኢንቲ ኤራናስ ቤሴስ፤ ጎዳ ኢንቲ ያሳይ ኢንቲስ ኢሚዳ ሃ ሎኦ ቢታይፌ ኢንቲ ጳያና ጋካናስ ኢስቲ ኢንቲስ ወጸማዴኔ ያርዴ ጊዳና፤ ኢንቲ ዘኮስ ሊሶ፡ ኢንቲ አይፌሲካ አጉንሐ ጊዳና።

14 «ቤኢቲ ታስ ሃኢ ሃይቆ ወደይ ጋኪዴስ፤ ጎዳ ኢንቲ ያሳይ ኢንቲስ ኢሚዳ ሎኦ ሂዶታ ኡባፌ ኢሲኖካ ኢዚ አሾንታይሳ ኢንቲ

ኩሜላ ወዘናቴኔ ኩሜላ ሸምፖፌ ኤሬታ፤ ኢዚ ኢንቴሰ አማና ጊዳ ሂደታይ ፓጮይ ባይንዳ ሙሉራ ፖሌቲዴሰ።

15 ጊዳ ኣቲን ጎዳ ኢንቴ ጸሳይ ኢንቴሰ አሚዳ ሎኦ ሂደታ ኡባይ ሙሉራ ፖሌቲዳ ማላ ጎዳ ኢንቴ ጸሳይ ኢንቴሰ አሚዳ ሎኦ ቢታይፌ ኢንቴና ቆይሳና ጋካናሰ ኢታ ሚሽ ኢንቴ ቦላ ኤሃና።

16 ጎዳ ኢንቴ ጸሳይ ኢንቴሰ አሚዳ ጫቆ ቃላ ኢንቴ ላሊዛ ጊዲኮ፣ ቢዲ ሃራ ኤቃ ጸሳታሰ ሃጋዚኮኔ ጎይኒኮ ጎዳ ሃንቆይ ኢንቴ ቦላ ታማ ማላ ኤጺ ኬዛና፤ ኢዚ ኢንቴሰ አሚዳ ሎኦ ቢታይፌ ኢንቴ ኤሶን ቆያና» ጊዴሰ።

## 24

### ሴኬሜን ኦራጺዳ ጫቆ ቃላ

1 ሄሳፌ ጉዬ ኢያሶይ ኢሰራኤሌ ቆሞታ ኡባ ሴኬሜን ሺሺዴሰ። ጨማታ፣ ካሌሊዛይታ፣ ዳናታኔ ፒርዲዛይታ ኡባ ዴይጊዴሰ፤ ኢሰቲካ ጸሳ ሲንሐ ሸቂዳ።

2 ኢያሶይ ዴራ ኡባሰ፣ «ጎዳ ኢሰራኤሌ ጸሳይ፣ ነካሴ ኢንቴ ኣዋቲ ኣብራሃሜኔ ናኮሬ ኣዋ ታራ ጉጂዲ ኤፊራጺሴ ሻፋፔ ሄ ፒንላን ዴኢዳ፤ ኢሰቲ ሃራ ኤቃ ጸሳታሰ ጎይኒዳ።

3 ታኒ ጊዲኮ ኢንቴ ኣዋ ኣብራሃሜ ኤፊራጺሴ ሻፋሰ ሄ ፒንላፌ ኤሃዲሰ፤ ካናኔ ቢታንካ ካሌላዲሰ። ኢዛ ዜሬላታካ ዳርሳዲሰ፤ ዩሳቃካ ኢዛሰ አማዲሰ።

4 ዩሳቃሰካ ያቆቤኔ ኤሳዌ አማዲሰ። ኤሳዌሰ ጌዜቲዛ ሴይሬ ቢታ ጸንጾ ሂሰታ አማዲሰ፤ ያቆቤይኔ ኢዛ ናይቲ ጊዲኮ ዲጌ ጊብጼ ቢዳ።

5 « ነሃሳፌ ጉዬ ሙሴኔ ኣሮኔ ከታዲሰ፤ ታ ኤሂዳ ቦሻን ጊብጼታ ኡንኤላዳ ኢንቴና ሄፔ ኬሳዲሰ።

6 ታኒ ኢንቴ ኣዋታ ጊብጼፔ ኬሲን ዘኦ ኣባኮ ዩዴታ፤ ጊብጼቲ ፓራ-ጋሬታኒኔ ቶጋ ኣሳታን ኢንቴና ዘኦ ኣባ ጋካናሰ ኦይካና ካሊዳ።

7 ኢንቴ ኣዋቲ ማዶ ዴማናሰ ታኮ ዋሲዳ፤ ታኒ ኢሰታፌኔ ጊብጼታፔ ጊዶን ቆማ ዩጋዲሰ፤ ሂሰታዳ ኣባይ ኢሰታ ቦላ ሰማና ማላኔ ኢሰታ ሚታና ማላ ኦላዲሰ። ታኒ ጊብጼታ ቦላ ኦሊዳይሳ ኢንቴ ኢንቴ ኣይፌን ቤኢዴታ። ኢንቴካ ባዞን ዳር ዋዴ ዴኢዴታ።

8 « ሳህላፊ ጉዬ ዮርዳኖሴ ሻፋፔ ኣርሼይ ሞኪዛሶ ባጋራ ዲዛ ኣሞሬታ ቢታ ታኒ ኢንቴና ኤሃዲሰ። ኢሰቲ ኢንቴናራ ኦሌቲን ታኒ ኢሰታ ኢንቴ ኩሼን ኣፋ ኢማዲሰ፤ ታኒ ኢሰታ ኢንቴ ሲንፋፌ ጳይሳዲሰ፤ ቃሴ ኢንቴ ኢሰታ ቢታ ላቲዴታ።

9 ሳህላፊ ጉዬ ሞኣቤ ቢታ ካዎ ጸጊራ ና ባላቄይ ኢሰራኤል ኦላናሰ ዴንዲዴሰ፤ ኢንቴና ዪዲ ዶቃና ማላ ቢኦሬ ና ባላሜሰ ኪታ ዬዲዴሰ።

10 ታኒ ጊዲኮ ባላሜ ሲያና ኮያቤኬ፤ ሄሳ ጊሻሰ ኢዚ ኢንቴና ዛሬ ዛሬ ኣንጂዴሰ፤ ታኒካ ኢንቴና ባላቄ ኩሼፔ ኣሻዲሰ።

11 « ሳህፔ ኢንቴ ዮርዳኖሴ ሻፋ ፒኒዲ ኢያርኮ ዪዴታ፤ ኣሞሬቲ፣ ፓሪዘቲ፣ ካናኔቲ፣ ሂቲቲ፣ ጌርጌሴቲ፣ ሂዌቲኔ ያቡሴቲ ኢንቴናራ ኦሌቲዳ ማላ ኢያርኮ ኣሳይ ኢንቴናራ ኦሌቲዴሰ፤ ጊዶ ኣቲን ታኒ ኢሰታ ኢንቴ ኩሼን ኣፋ ኢማዲሰ።

12 ኢንቴፌ ሲንፋፌ ካዜ ኪታዳ ኢሰታኒ ኣሞሬ ካዎ ናሞኣታ ኢንቴ ሲንፋፌ ጎዳዲሰ። ሃይሲ ኡባይ ሃኒዳይ ኢንቴ ማሻኒኔ ኢንቴ ዎንዳፌን ጊዴና።

13 ኢንቴ ዳቡርንታ ቢታኒ ኢንቴ ኬጾንታ ካታማታ ታኒ ኢንቴሰ ኢማዲሰ፤ ሄኮ ኢንቴ ቶኮንታ ዎይኔ ኣይፌኔ ዎጋራ ኣይፌ ሜታን ጊዴሰ።

14 «ሄሳ ጊሻሰ ሃኢካ ጎዳሰ ያዪቲ፤ ኩሜፋ ዎዚናፔ ኣማኔቲፋን ኢዛሰ ሃሬቲቲ፤ ካሴ ኢንቴ ኣዋቲ ኤፌራጸሴ ሻፋፔ ሄ ፒንፋኒኔ ጊብጼ ቢታን ጎይኒዳ ኤቃ ጸሳታ ኢንቴፌ ሃሲቲ፤ ጎዳሰ ጸላ ጎይኒቲ።

15 ጎዳሰ ጎይናይ ኮሾንታ ሚሽ ሚሳቲ ኢንቴሰ ቤቲኮ ካሴ ኢንቴ ኣዋቲ ሻፋፔ ሄ ፒንፋን ዲሼ ጎይኒዳ ኤቃ ጸሳታ ዎይኮ ሃኢ ኢንቴ ዲዛ ኣሞሬቲ ጎይኒዛ ጸሳታ ጎይናና ጊዲኮ ኢንቴ ጎይናናይሳ ሃኙ ዶሪቲ፤ ታኒኔ ታ ኬፋ ኣሳይ ጊዲኮ ጎዳሰ ጎይናና» ጊዴሰ።

16 ሂሰቲን ኣሳይ ዛሪዲ፡ «ጎዳ ኣጊዲ ሃራ ኤቃ ጸሳታሰ ጎይናይ ኑፔ ሃኮ!

17 ጊብጼ ኣይሌቲፋ ቢታፌ፡ ኦናኔ ኦ ኣዋታ ኬሲዲ ኤሂዳይ፡ ሄ ጊታ ማላታታ ኦ ሲንፋን ኦሊዳይ፡ ኦ ቢዛ ኦጌ ኡባኒኔ ኦ ካንፊዳ ካዎቲፋታ ኡባ ጊዶን ኦና ናጊዳይ ጎዳ ኦ ጸሳ።

18 ቃሴ ጎዳይ ሄ ቢታን ዲዛ ኣሞሬታራ ጉጂን ዴራ ኡባ ኦ ሲንፋፌ ጎዲዴሰ፤ ሄሳ ጊሻሰ ኦኒ ጎዳሰ ጎይናና፤ ኢዚ ኦ ጸሳ» ጊዴሰ።

19 ኢያሱይካ ዳራሰ፡ «አንቲ ጎዳሰ ጎይናናሰ ዳንዳዬኬታ፤ ኢዚ ገሻ ጸሳ፤ ኢዚ ቃናቲዛ ጸሳ፤ ኢዚ አንቲ ማካላቴላኔ አንቲ ናጋራ ኣቶ ጌና።

20 አንቲ ጎዳ ኣጊዲ ኣላጋ ጸሳታሰ ጎይኒኮ ኢዚ አንቲሰ ሎኦ ኦሊዳፔ ጉዬ ሲሚ ዋዲዲ ኢዚ አንቲ ቦላ ኢታ ኦላናኔ አንቲና ቆይሳና» ጌዴሰ።

21 ሂሰቲን ዴሬዚ ኢያሱ፡ «ኣካይ ኑኒ ጎዳሰ ጸላ ጎይናና» ጌዴሰ።

22 ሄሳፌ ጉዬ ኢያሱይ ዳራሰ፡ «አንቲ ጎዳሰ ጎይናናሰ ዶሪዳ ገሻሰ አንቲ ሁኤሰ አንቲ ማርካ» ጌዴሰ።

አሰቲካ ዛሪዲ፡ «ኤ ኑኒ ማርካ!» ጌዳ።

23 ኢያሱይ፡ «ሂሰቲኮ፡ አንቲ ጊዶን ዲዛ ኣላጋ ጸሳታ ዲጊቲ፤ አንቲ ዋዚና ጎዳ ኢሰራኤል ጸሳኮ ዛሪቲ» ጌዴሰ።

24 ዴሬዚካ ኢያሱሰ፡ «ኑኒ ጎዳ ኑ ጸሳሰ ጎይናና፤ ኢዛሰካ ኣዛዜታና» ጌዳ።

25 ሄ ጋላሰ ኢያሱይ ዴሬዛ ጫቄሊዴሰ፤ ኢሰቲ ካላና ዋጋኔ ማራ ሄን ሴኬሜን ኢሰታሰ ኢሚዴሰ።

26 ኢያሱይ ሄ ቃላታ ጸሳ ዋጋ ማጽፋን ጸፊዴሰ። ሄሳፌ ጉዬ ኢሲ ጌታ ሹቕ ኤኪዲ ጌሽ ጊዲዳ ጎዳ ዲንካኔዛ ማታን ዲዛ ዋላ ጋርሳን ኤሲዴሰ።

27 ኢያሱይ ኩሜላ ዳራሰ፡ «ቤኢቲ፤ ጎዳይ ኑሰ ሃሳይዳ ቃላ ኡባ ሃ ሹቓይ ሲዬዳ ጊሻሰ ኢዚ ኑ ቦላ ማርካ ጊዳና። አንቲ ጸሳ ቦላን ማካሊኮ ሃ ሹቓይ አንቲ ቦላ ማርካ ጊዳና» ጌዴሰ።

28 ሄሳፌ ጉዬ ኢያሱይ ዴራ ኡባ ባ ጸንጸን ጸንጸን ሲማና ማላ ሞይዚዴሰ።

### ኢያሱ ሃይቆኔ ኤልኤዜሬ ሃይቆ

29 ሄሳፌ ጉዬ ጎዳ ኣይሌ፡ ናቄ ና ኢያሱሰ ላይላይ 110 ጌዲን ሃይቂዴሰ።

30 ኣሳይ ጋኣሼ ዙማፔ ፑዴሃ ባጋን፡ ሻራ ሜንሶን ዲዛ ኤፍሬሜ ዴሬን ዲዛ ኢዛ ጸንጸን ቲሚናቲ-ሴራሃን ሞጊዴሰ።

31 ኢያሱይ ፓጸ ዲዛ ዋዴ ኡባን፡ ኢያሱፔ ሲሚን ዴኢዳ ኣሳቲኔ ጎዳይ ኢሰራኤሊታሰ ኦሊዳ ኦሶ ኡባ ኤሪዛ ጨማቲ ዲዛ ዋዴ ኡባን ኢሰራኤሌ ኣሳይ ጎዳሰ ጎይኒዴሰ።

32 ኢሰራኤሌ ኣሳይ ጊብጼ ቢታፌ ኤሂዳ ዮሴፌ ሜቄላ ሴኬሜን ሞጊዳ። ሄ ሶሆዛ ያቆቤይ ሴኬሜ ኣዋ ኤሞሬፔ 100

ሳቂሌ ቢራን ሻሚደሰ፤ ሂሰቲን ጉዩፔ ዮሴፌ ዜሬላታሰ ጸንጾ ገዲደሰ።

<sup>33</sup> ቃሴካ ኣሮኔ ና ኤልኤዜሬይ ሃይቂደሰ፤ ኢዚካ ሻራ ሜንሶን ዲዛ ኢፍሬሜ ዳሬን ኢዛ ናዛ ፊኒሃሴ ሳማን ጋኪዳ ገቢኣ ካታማን ሞጌቲደሰ።

## ጌሻ ማጸፋ

### **Gamo: ጌሻ ማጸፋ Bible of Ethiopia, Ethiopic script**

copyright © 2024 The Word for the World International

Language: Gamotso (Gamo)

Contributor: The Word for the World Northern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

---

PDF generated using Haiola and XeLaTeX on 2 May 2025 from source files dated 3 May 2025

d0ee6825-f93e-584e-8c8f-567d8d068e4b